





AUB LIBRARY

AMERICAN
UNIVERSITY OF
BEIRUT



AUB LIBRARY




962.053
M214mA
V.1

محكمة الشعب

المضبطة الرسمية
لمحاضر جلسات محكمة الشعب

الجزء الأول

١٩٥٤



مختصر

الجلسة الاولى لمحكمة الشعب

المنعقدة علنا في الساعة العاشرة صباحا ، بمقر قيادة الثورة في الجزيرة ، يوم الثلاثاء ٩ نوفمبر سنة ١٩٥٤ ، الموافق ١٢ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ ، الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو مجلس قيادة الثورة ، وعضوية القائمقام انور السادات ، والبكباشي (ا . ح) حسين الشافعي ، عضوى مجلس قيادة الثورة .

وبحضور البكباشي محمد التابعى المدعى ، والاستاذ مصطفى الهلباوى رئيس نيابة امن الدولة ، عضوى مكتب التحقيق والادعاء .

وتولى تسجيل المحاكمات بالاختزال الاستاذان طلعت الصبان، وممدوح توفيق ، مندوبا مصلحة الاستعلامات .

قدمت القضية رقم (١) لسنة ١٩٥٤ (محكمة الشعب) المتهم فيها محمود عبد اللطيف محمد

(حضر المتهم)

الرئيس - فتحت الجلسة .. اولى جلسات محكمة الشعب الادعاء .. المتهم موجود ؟

البكباشى محمد التابعى - المدعى - المتهم موجود والقضية جاهزة ..

الرئيس - محاكمة المتهم محمود عبد اللطيف محمد ..
المتهم - افندم ..

الرئيس - بالادعاءين الآتيين :
« اتى افعالا ضد نظام الحكم الحاضر وضد سلامة الوطن فى الداخل والخارج ، وذلك لانه فى يوم ٢٦ من اكتوبر سنة ١٩٥٤ وما قبله بمدينة القاهرة والاسكندرية :

اولا - اشترك مع آخرين فى تنفيذ اتفاق جنائى الغرض منه احداث فتنة دامية لقلب نظام الحكم ، وذلك بانشاء نظام خاص سرى مسلح للقيام باغتيالات واسعة النطاق ، وارتكاب عمليات تدمير بالغة الخطورة ، وتخريب شامل فى جميع انحاء البلاد ، تمهيدا لاستيلاء الجماعة التى ينتمى اليها على مقاعد الحكم بالقوة »

ثانيا - شرع فى قتل البكباشى اركان الحرب « جمال عبد الناصر » رئيس الحكومة تنفيذا للاتفاق الجنائى المشار اليه فى الادعاء الاول » ..

(المادتان ٢ و ٣ من امر مجلس قيادة الثورة الصادر فى اول نوفمبر سنة ١٩٥٤ بشأن تشكيل المحكمة واجراءاتها) .
مذنب او غير مذنب ؟

المتهم -

الرئيس - سمعت الكلام الى انقال ؟

المتهم - ايوه ...

الرئيس - فاهم الادعاء المقام عليك ؟

المتهم - ايوه

الرئيس - مذنب او غير مذنب ؟

المتهم - مذنب ..

الرئيس - مذبذبة ؟

المتهم - ايوه ...

البكباشي محمد التابعي - المدعى - المتهم لما اعلن بالادعاء
المقام عليه سألناه اذا كان عنده محامى ، فقال انه مفيش
محامى ... وامر تشكيل المحكمة لايحتم وجود محامى ..
والقضية جاهزة والشهود مستعدين وموجودين .
الرئيس - موجهها كلامه للمتهم - مش عاوز حد يدافع
عنك ؟

المتهم - عاوز ...

الرئيس - عاوز مين ؟

المتهم - المحامى محمود سليمان غنام ..

الرئيس - واذا كان محمود سليمان غنام مايرضاش ؟

المتهم - يبقى فتحى سلامة ..

الرئيس - واذا كان فتحى سلامة مايرضاش ؟

المتهم - يبقى مكرم عبيد ...

الرئيس - واذا كان مكرم عبيد مايرضاش ؟

المتهم - يبقى اى واحد تختاره المحكمة ..

الرئيس - موجهها كلامه للمدعى - اتصل بالمحاميين دول
بالترتيب على حسب طلب المتهم .. الى يرضى منهم ييجى
يدافع عنه ييجى .. واذا ماكانش ولا واحد منهم يرضى ييجى
هلشان يدافع عنه ، يبقى ينتدب اى واحد تانى .
المدعى - حاضر يا افندم ..

الرئيس - اذن تؤجل الجلسة ثمانية واربعين ساعة ، على
ان تعود المحكمة الى الانعقاد فى الساعة العاشرة من صباح يوم
الخميس ١٥ ربيع الاول سنة ١٣٧٤ (الموافق ١١ نوفمبر سنة
١٦٥٤) .

(رفعت الجلسة فى الساعة العاشرة والدقيقة الخامسة
صباحا) .

مخضر

الجلسة الثانية لمحكمة الشعب

المنعقدة علنا في الساعة العاشرة والدقيقة العشرين صباحا ،
بمقر قيادة الثورة في الجزيرة ، يوم الثلاثاء ١١ نوفمبر سنة
١٩٥٤ ، الموافق ١٥ ربيع الاول سنة ١٣٧٤ .

المؤلفة وفقا للأمر الصادر من مجلس قيادة الثورة بتاريخ
اول نوفمبر سنة ١٩٥٤ ، الموافق ٥ ربيع الاول سنة ١٣٧٤ -
بناء على المادة السابعة من الدستور المؤقت .
والمشكلة برئاسة قائد الجناح جمال مصطفى سالم عضو
مجلس قيادة الثورة .

وعضوية القائمقام أنور السادات ، والبكباشي (أ. ح) حسين
الشافعي ، عضوى مجلس قيادة الثورة .

وبحضور البكباشي محمد التابعى المدعى العام ، والاستاذ
مصطفى الهلبساوى رئيس نيابة أمن الدولة ، عضوى مكتب
التحقيق والإدعاء .

وتولى تسجيل المحاكمات بالاختزال الاساتذة طلعت الصبان ،
وممدوح توفيق و ابراهيم فكرى أحمد فوده مندوبو مصلحة
الاستعلامات .

قدمت القضية رقم (١) لسنة ١٩٥٤ (محكمة الشعب)
المتهم فيها محمود عبد اللطيف محمد .

حضر المتهم

الرئيس - فتحت الجلسة ... المتهم موجود ؟

المدعى - المتهم موجود .

الرئيس - جاهز ؟

المدعى - جاهزين .

الرئيس - موجه الكلام للمتهم - سمعت الادعاء الى عليك ؟

المتهم - ايوه .

الرئيس - وقلت انك مذنّب ؟

المتهم - ايوه .

الرئيس - ايه اقوالك ؟ السيد حمادة الناحل رايح يترافع عنك واحب بالمناسبة دى اقول ان المحكمة تشكر السيد حمادة الناحل لتطوعه بالدفاع عنك .

الاستاذ حمادة الناحل - الدفاع - وانا بدورى اشكر المحكمة على هذه الثقة وادعو الله ان يمنحني القدرة على اداء دورى ويوفقنى فى مهمتى .

الرئيس - موجه كلامه للمتهم - اتفضل قول اقوالك للمحكمة .. تحب تتكلم انت او السيد المحامى يتكلم عنك .
المتهم - السيد المحامى

الدفاع - افكر ناخر مناقشته ونسمع اقوال الشهود اولاً .
رئيس النيابة - المتهم قال فى التحقيق كل حاجة .
الرئيس - بس يقول ايه اقواله قدامنا .
الدفاع - ما فيش مانع يقول وبرضه نناقشه تانى .

المدعى - المتهم قال كل حاجة فى التحقيق واعترف بارتكاب الحادث وقال عن المحرضين له وعن طريقة التدبير وكل التفاصيل .

الرئيس للمتهم - قول اقوالك .

المتهم - من مدة وأنا في الاخوان ... من سنة ١٩٤٢ ومن مدة
٤ شهور بسى انضمت للمنظمة السرية ودى مكونة من ثلاثة
اشخاص محمود عبد اللطيف وهنداوى دوير وسعد حجاج .

الرئيس - على صوتك شوية واتكلم على مهلك وخليك هادى .
المتهم - أنا في الاخوان من سنة ١٩٤٣ وما انضمتش للهيئة
السرية .. الخلية السرية الا من مدة اربعة شهور بسى . والخلية
السرية مكونة من هنداوى دوير ومحمود عبد اللطيف وسعد
حجاج . وفي الاربع شهور كنا نجتمع كل اسبوع من نصف ساعة
الى ساعة في بيت هنداوى دوير كل يوم اثنين وكان اجتماعنا
لحفظ القرآن ودراسة السيرة والجهاد في سبيل الله . وقبل
الحادث باسبوع واحد كان هنداوى دوير قال لنا على حكاية
الاتفاقية وان الرئيس جمال عبد الناصر وقع الاتفاقية وان
الاتفاقية دى غلط وخيانة في حق البلد واتفقنا احنا الثلاثة ان
اللى تتاح له فرصة ينفذ الاغتيال . وبعدين هنداوى دوير جاب
لى المسدس قبل الحادث بيومين وقال لى المسدس بتاع سعد
حجاج ماجاش فنفذ انت الخطة وبعدين قبل الحادث بيومين
قرأت ان الرئيس حيروح الاسكندرية لحضور المهرجانات الشعبية
فرحت لهنداوى الساعة العاشرة ونصف بالليل وقتله الى قبرته
في الجريدة فقسال مفيش مانع على بركة الله وقت على سعد
حجاج الصبح وقتل له بالامر فابدى تأسفه الى محضرش السلاح
بتاعه علشان يجى معايا وتوكلنا وسافرت على الاسكندرية في
قطر تسعة ونصف الى يوصل واحدة تقريبا وبعد كده رحت
محرم بك واتمشيت شويه ودخلت مطعم واتغذيت وبعدين رحت
لوكاندة دار السعادة واخذت حجرة خاصة وغيرت ملابسى وفي
الساعة اربعة وربع نزلت على ميدان المحطة وجدت جماعة
متظاهرين رايحين المنشية فمشيت وراهم وبعد ما وصلت
الميدان وقفت ولما جه الرئيس وهو بيتكلم كلمته اطلقت عليه
طلقت من المسدس .. بعد كده الناس قبضوا على ورحت

البوليس الحربى فى الاسكندرية وقلت الاقوال بتاعتى امام النائب العام وهو الى كتب المحضر .

الرئيس - للمدعى - عايز تسأله

المدعى - ايوه ... الشعبة بتاعتك فين ؟

المتهم - فى امبابه .

المدعى - بتقول انكم كنتم بتجتمعوا فى الشعبة وتذاكروا القرآن والسيرة والجهاد فى سبيل الاسلام ايه المقصود بالجهاد فى سبيل الاسلام ؟

المتهم - المقصود به محاربة اعداء الاسلام والحرية .

المدعى - مين دول ؟

المتهم - كنا بنفسرهم انهم الانجليز واليهود ومن يقف فى سبيل الدعوة الاسلامية ويعدين جت حكاية الاتفاقية وقبل الحادث بأسبوع واحد اجتمعنا واتكلمنا فيها احنا الثلاثة واقربنا ان الاتفاقية فيها خيانة البلاد وانها ابخست حق البلاد وادت الانجليز كل الحقوق فى البلد وعلى هذا الاساس بنينا حكمنا .

المدعى - انت قرئت الاتفاقية ؟

المتهم - قرئت ... وقرئت بعض الملاحق .

المدعى - فهمتها ؟

المتهم - الى أنا فهمته منها اذت الانجليز كل الحقوق وقرئت فى الجرائد انها استبدلت بالخمسمائة مليون جنيه الديون بتوع مصر مبلغ ٣٢ مليون جنيه ثمن اسلاك وكابلات فى القنال .

المدعى - الاستبدال ده كان مذكور صراحة ؟

المتهم - كان فيه الملاحق وفسرتها جريدة الاخبار .. كانت كتبت قالت استبدال الديون بين كل من مصر وبريطانيا باثنين وثلاثين مليون جنيه ثمن كابلات وبعض المنشآت فى القنال .

الرئيس - والا كان فيه حاجة ثانية مزعلاك في الاتفاقية ؟

المتهم - ايوه فيه حاجة ثانية وهى انه ما كانش ضرورى الاتفاقية لان وجودهم في مصر بعد سنة ١٩٥٦ حتى غير شرعى وحيطلوا من نفسهم خصوصا وان اساليب الحرب اتغيرت والنظم بتاع الحرب داوقت القوات بدل ما تكون مجموعة في حنة واحدة تلقى عليهم قنبلة ذرية فهم كانوا حيفرقوا قواتهم خوفا من القنابل الذرية .

الرئيس - يعنى انت كمان جنرال وتفهم في الشؤون العسكرية كويس ؟

رئيس النيابة - رايك ايه لو ما تعملتش الاتفاقية كان الانجليز خيخرجوا ازاى من القنال ... رايك ايه كمواطن او كاخ من الاخوان ؟

المدعى - ويتدعو للجهاد .

المتهم - خروجهم يحتاج الى جهاد والجهاد جربناه قبل كده في كتائب الجامعة لما راحت القنال كان الانجليز منزعين من الكتائب لفاية ما صرحوا في بعض الصحف وقالوا انهم مستعدين للجلاء بس توقف العصابات .

رئيس النيابة - انت قلت انك قريت معاهدة ١٩٣٦ تقدر تقول لنا ايه هى ؟

المتهم - هى كانت جعلت للانجليز كل حق في البلد انهم يستعملوا كل حاجة بالثمن مثل السكك الحديدية والتموين واى حاجة في المطارات والمواصلات ... كل ده بالفلوس من اجل ذلك كانت الديون التى على بريطانيا لمصر ترتبت من اجور المواصلات والسكك الحديدية .

رئيس النيابة - رايك ان معاهدة ١٩٣٦ احسن او الاتفاقية احسن ؟

المتهم - معاهدة ١٩٣٦ انتهت طبعاً .

الرئيس - افكر بلاش مناقشة المعاهدات احنا ما بناقش عبد الحميد بدوى وبنأخذ رايه فى الموضوع ... رئيس النيابة - انت دراستك ايه ؟

المتهم - انا درست الابتدائية اربع سنين فى القسم الليلى ورسبت فيها وكنت دارس قبل كده اولى .

المدعى - فهمت ايه الفكرة من النظام السرى ؟

المتهم - الفكرة هى الجهاد فى سبيل الله ودراسة القرآن والسيرة ... ده كل اللى فهمته .

المدعى - الغرض منه ايه ؟

المتهم - الغرض منه محاربة اعداء الاسلام واعداء الدعوة .

المدعى - مين اعداء الدعوة الاسلامية .

المتهم - اعداء الدعوة الاسلامية .

المدعى - مين ؟

المتهم - اللى يقف فى طريق الدعوة الاسلامية .

المدعى - انت قلت ان قبل الحادث بيومين هنداوى ؟ جابلك مسدس ... منين جابه ؟

المتهم - ما قالش منين جابه .. هو قال لى استعد وما قالش رجابه منين .

المدعى - ما اداكش طلقات ؟

المتهم - ١٥ طلقة .

المدعى - ما قالش منين جابه ؟

المتهم - لا ما قالش .

المدعى - ما اداكش فلوس ؟

المتهم - ادانى اثنين جنيهه علشان اصرف منها .

المدعى - ما اخذتس خمسة جنيه من على نوبتو .

المتهم - اداهم لى يوم السفر .

المدعى - ليه ؟

المتهم - هنداوى قال لى خد منه .

المدعى - ليه ؟

المتهم - علشان السفر والمصاريف ؟

المدعى - ما اخذتس حاجة ثانية ؟

المتهم - لا .

المدعى - لك دراية باستعمال المسدسات ؟

المتهم - ما فيش دراية الا معلومات ضعيفة كنت اخذتها فى

الحرس الوطنى عن الطبنجة وانها تضرب بالتوجيه ... وفى

فلسطين اخذت معلومات غير رسمية كانوا الاهالى يبطلعونا

نضرب نار .

المدعى - ايه اهتمامكم بالحرس الوطنى وايه الظروف

لانضمامك اليه ؟

المتهم - كان فيه نداء للمواطنين بالتطوع وكنت من ضمن

المواطنين الللى تطوعوا .

المدعى - ما صدرش لكم اوامر بالانضمام الى الحرس

الوطنى ؟

المتهم - دى حاجة كانت كل الناس بتنضم اليها وتطوعت زى

كل الناس .

المدعى - تعرف هنداوى من امتى ؟

المتهم - من سنة ١٩٥١ .

المدعى - وسعد حجاج من امتى ؟

المتهم - من ؟ اشهر .

المدعى - تعرف مين تانى من النظام السرى ؟

المتهم - دى المجموعة بتاعتنا وما اعرفش حد غيرها .

المدعى - من رئيس المجموعة ؟

المتهم - هنداوى دوير .

المدعى - اتفقتم على مين يقتل الرئيس جمال عبد الناصر ؟

المتهم - هنداوى قال كل اللي تتاح له الفرصة منا احنا الثلاثة .

المدعى - هل سبق حد حاول ؟

المتهم - المحاولة اللي قمت بها كانت محاولة استطلاع بس

ما كانش معايا مسدس .

المدعى - امتى وظروفها ايه ؟

المتهم - محاولة الاستطلاع كانت في مؤتمر الموظفين .

المدعى - اشرحها للمحكمة .

المتهم - في مؤتمر الموظفين قبل الحادث بيومين رحت عند

اشارة المرور وشفت الرئيس وما دخلتش جوه لان الحراس

مانعين الدخول .

الرئيس - الجهاز السرى كان بيشتغل لحساب مين ؟

المتهم - لحساب الاخوان .

الرئيس - اخوان مين ؟

المتهم - الاخوان المسلمين .

الرئيس - يعنى كنتم بتحاربوا اعداء المسلمين علشان

الاخوان المسلمين يتربسوا افرض انك قتلت الرئيس هل

انت فاهم ان الحكومة دى عدوة الاسلام وعلشان كده رحت

تقتل رئيسها والا فهمت ان الرئيس بس هو اللي عدو الاسلام

والا الحكومة كلها عدوة الاسلام .

المتهم - فهمت ان الرئيس عدو الاسلام .

الرئيس - هو لوحده ؟

المتهم - اه .

الرئيس - بس ؟

المتهم -

الرئيس - ده اللي فهموه لك .

المتهم - آه .

الرئيس - والجهاز كان بيشتغل لحساب الاخوان ؟

المتهم - أيوه

الرئيس - ما تعرفش من رئيس النظام الخاص ؟

المتهم - لا .

الرئيس - مين اللي يعرف .

المتهم - انا اعرف ان رئيسنا هنداوى والرئيس العمومى

ما اعرفوش .

الرئيس - تعرف صلاح شادى ؟

المتهم - اعرفه لانى فى سنة ١٩٥٢ كنت سافرت معاه لبور

سعيد لمؤامرة ضد الانجليز ولكن ماتمتش .

المدعى - وبعدين ؟

المتهم - العلاقة بعد كده ... كنت اقبله فى المركز العام

واسلم عليه .

المدعى - بس كده ؟

المتهم - وبعدين طلبتى من امبابة علشان احرس بيت

المرشد العام لغاية ما اعتقل وبعدين سبت الخدمة وجيت فى

امبابة .

المدعى - ليه اختارك انت

المتهم - ما اعرفش .

المدعى - تعرف عبد المنعم عبد الرؤوف ؟

المتهم - ما اعرفوش .

المدعى - ماشفتوش فى امبابة عند مصطفى الوردانى ؟

المتهم - لا .

المدعى - ما سبقش عرض عليك سلاح تانى لتنفيذ القتل

غير المسدس ؟

- المتهم - كان عرض عليه مسدس صغير .
الرئيس - فيه بينك وبين جمال عبد الناصر حاجة ؟
المتهم - لا .
الرئيس - شفته قبل كده ؟
المتهم - لا .
الرئيس - سلمت عليه ؟
المتهم - لا
الرئيس - امال ليه رحت علشان تقتله ؟
المتهم - فهموني ان الاتفاقية جناية .
الرئيس - مين اللى فهمك ؟
المتهم - هنداوى دوير .
الرئيس - اطلبوا هنداوى دوير نسمع كلامه .
المدعى - ماسبقش عرض عليك حزام تلبسه وتجريه عملية
النسف ؟
المتهم - هنداوى عرضه عليه الساعة اتناشر ونصف بالليل
لما رحت اخبره بالسفر فقال ده عندنا حزام تلبسه وتقابل
الرئيس جمال عبد الناصر وتعايقه وينفجر وتنسفوا انتم الاثنين .
المدعى - شفت الحزام ؟
المتهم - لا .
الرئيس - مارضتش ليه ؟
المتهم -
الرئيس - خفت على نفسك ؟
المتهم - لا ماخفتش على نفسى
الرئيس - ليه مارضتش ما هى كانت الطريقة دى اضمن
من المسدس ؟
المتهم -
الرئيس - ايه اللى خلاك ما قبلتش ؟

المتهم - لا ما قبلتش .

الرئيس - ما قبلتش ليه ؟

المتهم -

الرئيس - اتكلم حد ماسكك ماتخفش .

المتهم - قلت ماينفعش علشان الزحمة .

الدفاع - ويمكن الرئيس مايرضاش يحضنه .

المدعى - ما أخبرتش حد بعزمك على السفر ؟

المتهم - أخبرت سعد حجاج .

المدعى - مفيش حد ثانى ... ماقلتش ليحيى سعيد .

المتهم - أنا رحت له علشان آخذ الشنطة .

المدعى - ماقتلوش حاجة ؟

المتهم - لا ... يمكن يعرف من هنداوى .

المدعى - قابلت نويو .

المتهم - أيوه ... واخذت منه خمسة جنيه وبس .

المدعى - ماقتلوش حاجة ؟

المتهم - لا

المدعى - قابلت عبد الحميد البنا ؟

المتهم - أيوه وماقتلوش حاجة

المدعى - ما اخذتش منه حاجة ؟

المتهم - لا

المدعى - ماتعرفش الخطة ... انت رايح تقتل الرئيس

متفكرش تعمل ايه علشان تهرب ؟

المتهم - لا مفكرتش وهنداوى قال لى الحرس بعد كده

سيطلق عليك النار وتموت .

المدعى - كنت عارف انك رايح تموت ؟

المتهم - أيوه .

المدعى - مفكرتش فى طريقة للهرب ؟

المتهم - لا

- الرئيس - حفظت ايه في القرآن ؟
 المتهم - حفظت جزء من سورة البقرة .
 الرئيس - وايه تاني ؟
 المتهم - وبعض آيات .
 الرئيس - بس ؟
 المتهم - وبعض صور قصيرة وسورة يس (٣/٤ آل عمران)
 الرئيس - من سنة ١٩٤٢ حفظت ده بس ؟
 المتهم - أيوه .
 الرئيس - ده كل اللي حفظته في ١٢ سنة
 المتهم - كنت كل اسبوع بنحفظ ٥ آيات . وبعض الاسابيع
 تكسل ما نحفظش .
 الرئيس - الدين فيه كسل ؟
 المتهم -
 المدعى - النظام السرى كان مكون من مين ؟
 المتهم - كان مكون من هنداوى وسعد حجاج وانا .
 المدعى - ماتعرفش الرئاسة لمين ؟
 المتهم - لا
 المدعى - الاوامر كانت بتيجي منين ؟
 المتهم - ما اعرفش كان بيحييها هنداوى .
 المدعى - ماتعرفش بتيجي منين ؟
 المتهم - لا
 المدعى - على نويتو كان في النظام السرى .
 المتهم - لا اعرف .
 الرئيس - تعرف سورة « قل هو الله احد » .
 المتهم - أيوه .
 الرئيس - اقراها .
 المتهم - بسم الله الرحمن الرحيم « قل هو الله احد الله الصمد
 لم يلد ولم يولد ولم يكن له كفوا أحد »

- الرئيس - تقدر تشرحها لنا .
- المتهم - ماخذتش شرح .
- الرئيس - امال كانوا بيعلموكم الدين ازاي ؟
- المتهم - شرح عامى كده .
- الرئيس - كانوا بس بيعلموكم الاتفاقيات الدولية ؟
- المتهم -
- المدعى - تعرف ابراهيم الطيب .
- المتهم - كان مرة هنداوى عرفنى به فى بيته .
- المدعى - على أساس ايه ؟
- المتهم - قال لى أخوك ابراهيم الطيب .
- المدعى - عرفك بحد تانى ؟
- المتهم - واحد اسمه توفيق .
- المدعى - قال لك عليه ايه ؟
- المتهم - قال ده حيكون مندوب القيادة .
- المدعى - قيادة ايه ؟
- المتهم - قيادة الاخوان .
- المدعى - ابراهيم الطيب كلمك ؟
- المتهم - قعدنا نتكلم فى بيت هنداوى دوير فى الجهاد فى
مسبيل الله .
- المدعى - قال لك ايه ؟
- المتهم - حاجات عامة .
- المدعى - ماطلبش منك القيام بأى مأمورية ؟
- المتهم - لا . الى طلب منا توفيق .
- المدعى - قال لك ايه ؟
- المتهم - قال أن فيه السيد أنور السادات عاوزين تدرسوا
بيته كويس وكمان جريدة الجمهورية وتشوفوا اى طريقة اسلم
لأننا نقدم على اغتياله .
- المدعى - وبعدين عملتم ايه ؟

المتهم - رحنا هناك وشفنا البيت والجريدة وكان أن استقر الامر على أنه سيكون في الجريدة وبعدين قال لنا استنوا لما تصدر أوامر وبعدين انقطع ماجاش .

المدعى - كنت لوحذك ؟

المتهم - أنا وسعد حجاج .

المدعى - ما اداكوش مسدس ؟

المتهم - لا ..

المدعى - ابراهيم الطيب صنعته ايه ؟

المتهم - محامى ... هنداوى قال لنا انه محامى .

المدعى - تعرف صلته ايه بالجهاز السرى ؟

المتهم - هنداوى قال انه من الاخوان .

المدعى - ألم تسال عن السبب فى قتل أنور السادات .. قلت أن الرئيس جمال عبدالناصر كان عدو الاسلام طيب والسيد ابور السادات تقتله ليه ؟

المتهم - ما سالتش .

المدعى - مامورية خطيرة زى دى ما تسالش ؟

المتهم -

المدعى - انت تعرفه قبل كده علشان يكلفك بمهمة زى دى .

المتهم -

الرئيس - انت راجل صاحب دعوة والا متشرد تقتل الناس ؟

المتهم -

الرئيس - الدعوة وعرفنا انك ماتفهمش حاجة فى الدين قل هو الله أحد ماتعرفهاش وماتعرفش حاجة فى القرآن فى ١٢ سنة ... والاتفاقية ماطلعتش عبد الحميد بدوى . يبقى تقتل ليه ... الراجل الى يقول لك اقتل ده ماسك لك ذلة فيه لك ذلة عند هنداوى دوير .

المتهم - لا مافيش

الرئيس - أمال بتطاوعه ليه لما يقول لك اقتل ... اقنعك

بأيه بالنسبة لانور السادات ؟

المتهم - أقنعني بأنه يبحارب الاسلام في مقالاته .

المدعى - قرئت مقالاته ؟

المتهم - قرئت بعضها .

المدعى - فيها حرب على الاسلام ؟

المتهم - كان فيه مقالة يقول فيها ان الاديان اذا وقفت في

طريق تقدم الشعوب فالشعوب حيمكن ان تتخلى عن دينها .

المدعى - تتخلى عن دينها ؟

الرئيس - ايه تانى ؟

المتهم - قال ان الاديان اذا وقفت في طريق تقدم الشعوب

فالشعوب ممكن ان تسير في طريقها وما تكونش الاديان عاتق في

طريقهـا .

المدعى - قرئتها بنفسك ؟

المتهم - ايوه

الرئيس - طبعاً فهمتها زى الاتفاقية وزى قل هو الله أحد

مش كده والا فهمتها بطريقة ثانية .

المتهم - ...

الرئيس - تعرف ايه عن المؤتمر الاسلامى ؟

تعرف ان فيه حاجة اسمها المؤتمر الاسلامى للشعوب

الاسلامية ؟

المتهم - سمعت ان السيد انور السادات من سكرتير

المؤتمر الاسلامى .

الرئيس - كان

المتهم - وما يزال .

الرئيس - ايه فايدته والا ماقرئتش عنه حاجة ؟

المتهم - لا ماقرئتش عنه حاجة .

المدعى - بتقول انك كنت بتذاكر فى سـرـر سـرـان يحل

قتل المسلم ؟

المتهم - لا

المدعى - مه !!

المتهم - لا

المدعى - آمال ليه كنت عاوز تقتل الرئيس جمال عبد
الناصر والقائمقام أنور السادات هم دول مش مسلمين ؟
المتهم - مسلمين ... ولكن فهمونا انهم خارجين عن
الاسلام ..

الرئيس - مين اللى فهمك ؟

المتهم - - هنداوى دوير .

الرئيس - هنداوى دوير ده كلامه زى القرآن يعنى ؟ ..
القرآن اللى حفصهولك مش بيقول ان القتل حرام ؟
المتهم - ايوه ..

الرئيس - والا يمكن انت مابتفهمش كلام القرآن ؟

المتهم - صحيح انا اقدمت على العمل ده ... وقبل ما اقدم
عليه ما كنتش شاعر باى حاجة كان حاجة طبيعية .. ولكن
بعد ان اقدمت عليه شعرت بالندم وشعرت بانى خاطيء .
الرئيس - خاطيء ليه ؟ !

المتهم - لانه كان خلاف الاسلام ..

الرئيس - خلاف الاسلام فى ايه ؟

المتهم - فى الفهم اللى فهمته علشان قتل المسلم .
الرئيس - الادعاء ... فيه اسئلة ثانية ؟

المدعى - لا يافندم . واحنا مكتفين باقواله ..

الدفاع - لو سمح لى سيادة الرئيس بكلمة ..

الرئيس - ايوه اتفضل ..

الدفاع - خلال هذه المناقشة آمنت باننى الى جوار شخص
غير عادى ... غير طبيعى كنت قد فكرت فى هذا قبل
ان القاه ، وبعد ان لقيتنه مرة ومرة ، وبعد ان سمعته الآن آمنت

بأن هذه المهمة العصبية التي ألقيت على كاهلي ، إنما هي مهمة الدفاع عن شخص مجنون .. لا أريد أن أفرع عن هذا الجنون وعدم المسؤولية ، ولكنني أستهدف أولا وقبل كل شيء التدليل على أنه لا يوجد مصرى عاقل .. مصرى يسير كما يسير الأقوياء . مصرى طبيعى ، يقوم على الاعتداء على الرئيس جمال عبدالناصر لا أريد أن أعطل الدعوى بل نمضى فى سماع الشهود ، ولكنني أطلب بعد سماع الشهود اليوم إحالته على الطبيب الشرعى علشان يقعد معاه ساعتين ويدينا تقرير عنه يجينا يوم السبت الصبح .. وده ماأظنش أنه يكون موضوع جدل بيننا وبين الادعاء لانه لاصلة له بتعطيل الدعوى . ونحن هنا قد جئنا لانتحدث فى الصغائر وانما لنشترك جميعا محكمة وادعاء ودفاعا فى رفع خطر عن بلادنا ، ولذلك أرجو أن تقدروا هذا الطلب وتفصلوا فيه .

وكيل النائب العام - الادعاء يعترض على هذا الطلب ، وقد تكلم المتهم طويلا فى التحقيقات كما تكلم طويلا اليوم امام حضراتكم واعترف تفصيليا بأنه ارتكب الحادث وبيت النية منذ اسبوع كامل على ارتكاب الحادث ، ثم سافر الى الاسكندرية وارتكب الحادث ثابتا جامدا كما هو الان وذكر لحضراتكم الدافع الذى من اجله ارتكب هذا الحادث وذكر لحضراتكم فى التحقيقات ايضا اسماء من حرضوه ومن سلموه الاسلحة فاذا جاء اليوم لحضراتكم واعتذرعن فعلته ، واراد ان يتظاهر بان ضميره قد انبه ، وان ضميره قد استيقظ .. الان اذا فعل هذا فيكون رجلا عاقلا كل العقل وليس مجنونا كما يريد الدفاع ان يدرا عنه المسؤولية . وانما لعل الدفاع يريد من هذا ويستهدف من وراء ذلك ان يطلب استعمال الرافة مع المتهم .. ولكن ان يقول عنه انه مجنون فلا يقبل عقل سماع هذا اطلاقا .

الدفاع - استميع المدعى فى كلمة هادئة .. اريد ان اقول له ان معارضته هذه إنما هي معارضة تقليدية .. معارضة تقليدية

لان من شأن الادعاء ان يعارض الدفاع فنحنا زميلي الكريم هذا النحو ولم يستهدف فيه مصلحة الدعوى ولم يستهدف فيه مصلحة العدالة لان ثبات المتهم وجموده هو عندي آية جنونه .. هذا الجمود حينما يقدم انسان على قتل قاتلين من قادة بلده - هذا الجمود حينما يلزم انسان على هذا النحو لا يدل فحسب على ان جانبه قد خلا من كل قلب بل يدل كذلك على ان جمجمته قد خلت من كل راس ... ثم ماذا يهم المدعى ايخشى ماسيتلو هذه الدعوى ؟ مش حيقال ولا يمكن ان يقال ان الجهاز السرى وقد بلغ عدده ما بلغ كله مخبول . وعلى اية حال فاننا لا اريد ان اتعرض للدعاوى اخرى اذن فلا مصلحة الدعوى ولا مصلحة العدالة ولا ما يراد لهذا البلد من سمعة كريمة تريد ان تبقى عليها اننا نقول انه اكثر مايكون عقلا .. الى شرع في قتل انور السادات لانه كتب مقال في الدين .. واللى شرع في قتل جمال عبد الناصر غداة اخراج الانجليز بعد جهاد سبعين سنة .. يبقى ده عاقل ؟! .. او ان في هذا مصلحة العدالة ؟! .. بالطبع لا ، ولهذا سميت معارضة المدعى بانها معارضة تقليدية لا اكثر ولا اقل .

المدعى - دى مش معارضة تقليدية بل دفع تقليدى مداولة قصيرة بين السادة اعضاء المحكمة

الرئيس - المحكمة معترضة على احالة المتهم على الطبيب الشرعى ، لان المتهم لما ارتكب هذه الجناية لم يرتكبها بدافع داخلى من نفسه بل من املاء بعض اشخاص كانوا يجتهدون به وبتأثيرات خارجية ، وكان المتهم عاقلا عندما كان يسمع هذه التأثيرات ويتناقش معهم ، وكان عاقلا عندما اقدم وذهب ودبر ولذلك يبقى خط الجنون مش واضح هنا ... كل فرد منا يمكن يكون له نصيب من الجنون ، فهل نحال جميعا على الطبيب الشرعى ؟

المدعى - هذه محاولة اشترك فيها اكثر من واحد واكثر من محرض وهم موجودون خارج القاعة ونحن نطلب من المحكمة الان

سماع شهادة الشاهد الاول او المحرض الاول هنداوى دوير .

الرئيس - اذن يستدعى هنداوى دوير .

(حضر الشاهد)

وقد اخرج السيد رئيس المحكمة مصحفا صغيرا من جيبه ووضعه على حافة المنصة وطلب سيادته من الشاهد ان يتقدم ثم قال له .

طبعا عارف ده (مشيرا الى المصحف)

الشاهد - ايوه ..

الرئيس - قل ، والله العظيم اقول الحق ولا شيء غير الحق والله على ما اقول شهيد .

(حلف الشاهد اليمين)

الرئيس - ايه اللي تعرفه عن موضوع التهمة بتاعة محمود عبد اللطيف في تعديده على الرئيس جمال عبد الناصر ؟

الشاهد - ايوه يا فندم ..

الرئيس - نرجوك ان تكون هادئا واذا كنت عاوز كوباية ميه نجيبلك كوباية مية ..

الشاهد - تسمح لى اتكلم فى الموضوع على طول

الرئيس - اتكلم زى مانت عاوز ... اتكلم على راحتك ..

الشاهد - فى الاشهر الاخيرة .. من خمس شهور او اربع شهور او بعد مارس بالتحديد اتقسم اعضاء الهيئة التأسيسية للاخوان المسلمين الى ثلاثة اقسام ، احدها وعلى رأسها بعض الاخوان زى الاستاذ البهى الخولى يؤيد الثورة ويرى ضرورة ان الاخوان يقوموا بتأييد الثورة .. وفريق آخر وقف موقف حياد او على الاقل مائع .. ما قدرشى يحدد موقفه بالضبط وما ارادشى انه يغضب دول او دول . وكان على رأس هذا الفريق الدكتور خميس حميدة اللي هو وكيل الاخوان .. والفريق الثالث كان يرى ان الثورة ماشية فى طريق يعارض الاتجاه الاسلامى .. على اثر هذا الخلاف الشديد الهيئة التأسيسية كاعضاء فقدت

احترامها في نفوس الاخوان ومكتب الارشاد لم يستطع ان يقوم بمهمته في توجيه الاخوان وكذلك فقد احترامه فعلا في نفوس الاخوان حتى أصبحت التعليمات التي تصدر منه لا تلقى تأييدا من الاخوان . وكان لابد من تعديل الحال فرؤى ان هذه الهيئة لا تمثل الاخوان ، فما دامت لها صفة من صفات الإبدية وهى التعيين مدى الحياة فلا بد من تغييرها الى وضع آخر يستقيم مع الامور . . وهم كانوا ينتخبوا اخوان ممن يستطيعون تأييدهم ويتوجهوا بالدعوة الوجهة التي يريدونها باعتبارهم ممثلين للاخوان تمثيلا كاملا فرؤى تعديل القانون ، وفعلا عدل القانون . . في هذه الفترة ازاء هذا الاضطراب الشديد - سيطر على الدعوة بعض افراد غير رسميين يعنى افراد مالهش الصفة الرسمية زى ابراهيم الطيب . . الاستاذ ابراهيم الطيب المحامى . ووجدنا ان الاجهزة الادارية في الاخوان المسلمين أصبحت كلها معطلة ماعدا الجهاز الخاص الجهاز السرى في الاخوان المسلمين وانا ارجو بهذه المناسبة ان يكون هذا آخر عهد الاخوان المسلمين بالنظم السرية ، وأن تكون هذه المطلقات الاخيرة آخر طلاقات تسدد الى صدر مصرى بهذه الصورة الاسييفة التى اسف عليها أشد الاسف . . كان الجهاز السرى يسيطر على الموقف ويصدر تعليماته الى الاخوان . وعلى اثر هذا بدأت التعليمات تيجى تلقائيا من المسئول ، وكان في هذه الفترة من الاستاذ ابراهيم الطيب المحامى المسئول عن النظام السرى في القاهرة وانا في امبابه كنت رئيس المنطقة وكنت طول عمرى في المنطقة رئيس النظام السرى . . وفي اثناء المعاهدة او بعد الاتفاق المبدئى الى وقع بالحروف الاولى ، قامت الخلافات حول ما اذا كانت المعاهدة صالحة او ضارة وبدأت تشحن نفوس الاخوان بانها ضارة وصدر قرار مكتب الارشاد الى وجه الى السيد الرئيس بخصوص رأى الاخوان في المعاهدة والى قيل فيه ان ده مجرد نصيحة وانه غير ملزم للحكومة وان من واجبنا ان نوجه اى حاجة للحكومة

باعتبارنا من الشعب وتطورت الامور بعد هذا يا سيدى الى ان بدأت المنشورات تنزل وكانت تيجى للاخوان علشان يقرأوها وعلشان ينزلوها ويوزعوها على الناس .. الاستاذ ابراهيم الطيب كان يقول ان الخطة اللى اتخذها النظام السرى هى تعبئة نفوس الاخوان من الوجهة الشعبية وتعبئة نفوس الناس ضد المعاهدة . وعلى هذا الاساس نزلت جملة منشورات باعتبار أن الاتجاه هو اتجاه تبصير الناس كما يقول الاستاذ ابراهيم الطيب - على اساس ان المعاهدة ضارة . فى الفترة دى ياسيدى شحنت نفوس الاخوان شحنا شديدا ضد المعاهدة وكان على اثر هذا ان الاخوان طبعى كانوا متضايقين من المعاهدة ضيقا شديدا وكانوا يقولون : ما المصير ؟! ايه يعنى ، حنعمل ايه ؟ .. وبعدين بصينا فجأة وجدنا المنشورات انقطعت نهائيا ، فسالت ابراهيم : انتم عبيتونا وفرغتنا ليه ؟ .. فقال ان الاتجاه مش حيكون اتجاه شعبى بل احنا قررنا ان الاتجاه يكون اتجاها ارهابيا .. فقلت له يا استاذ ابراهيم ان الاتجاه الارهابى ده لن يؤدى الى نتيجة وذكرته بما تحمله الاخوان فى ايام فاروق ، وقلت له ان احنا والبلد مش حانجنى من هذا الطريق شىء ، فقال لى ان هنالك خطة كاملة واحنا حانفذها .. طيب ياسيدى .. قبل الحادث بحوالى خمستاشر يوم او اكثر قليلا جانى وقال لى ان خطتنا هى ان النظام قرر انه هو يعتدى أولا على الرئيس جمال عبد الناصر وبعد كده يتخلص - بتحديد اللفظ - يتخلص من الضباط الاحرار باى صورة سواء بالاعتقال او بالاختطف او بالقتل . فقلت له يعنى انتم حققتم المسائل دى اسلاميا فقال لى آه .. ولعل حضراتكم تعرفون ان النظم السرية دى المسائل اللى تناقش فيها ماتناقش بشكل اوسع وفعلنا قال لى انه انتخب محمود عبد اللطيف ليقوم باطلاق الطلقات الاولى ، وهى الاعتداء على الرئيس جمال عبد الناصر ، وجاب لى المسدس الى

شفته في القضية وبعدين أنا أدبت المسدس على طول لمحمود
عبد اللطيف . وقلت لابراهيم الطيب ، ايه الخطة يا سيد
ابراهيم ، فقال لي الخطة ان الرجل الصعيدي - مع الاعتذار
طبعاً عن هذا التشبيه - ان الرجل الصعيدي يتبع خصمه
سنة كاملة لغاية ما يتخلص منه . . فالخطة ان محمود يعتمد
على مجهوده الشخصي في تتبع الرئيس جمال عبد الناصر ،
ولا سيما انه بعد المعاهدة نزل الى الميادين والى الشعب ويمكن
ان محمود ينال منه . وفعلاً قلت لمحمود هذا وقد سلمته
المسدس وسلمته الطلقات . . وفي هذه الانباء - وأنا أقولها
يا سيدى الرئيس لوجه الحق ولوجه الله زارنى الاستاذ محمود
الحواتكى والاستاذ عبد الفتاح القرشى في البيت يمكن الساعة
تسعة وقالوا لي ان احنا بلغنا ان النظام - قالوا لي كده ودى
كلمة تطلق على النظام السرى - قالوا لي ان النظام قرر ان يتجه
اتجاهاً ارهابياً وأن الحواتكى علم ان الاستاذ المرشد غير موافق
على هذا الاتجاه وأنه قال لي بالتحديد اننى برىء من دم جمال
عبد الناصر اذا قتل . . قلت له : مين اللى قال لك هذا الكلام
فقال لي : قاله شخص لست في حل من ذكر اسمه . وقد
سبق ان قلت هذا الكلام في التحقيق . . وبعدين سألت نفسى
احنا رايعين فين . . ثم قابلت محمود بعدها على طول وقلت
له اوقف كل حاجة وهو موجود امامكم واسأله واعتقد انه
صادق وحيقول الحق . . وبعدين جانى زارنى ابراهيم ، وهو
كان بيزورنى في هذه الفترة كل يوم باعتبار ان دى خطوة اولى،
وان دى هى اللى حتمشى في هذا الطريق . . جانى ابراهيم تانى
يوم فقلت له على حكاية الاستاذ الحواتكى والاستاذ القرشى . .
وبهذه المناسبة ماكنش الاستاذ ابراهيم يعرفنى بمكانه أبداً وانما
كان يبجى عندى . . جانى الاستاذ ابراهيم فقلت له على حكاية
الاستاذ الحواتكى . فقال لي ان الكلام ده كلام غلط ،

وان الناس دول متصلين بالمفصولين وبالأستاذ البهى .
وانهم عاوزين يعطوا شغلنا . فقلت له يعنى الامر صادر من
الأستاذ المرشد ، فقال لى أبوه . . فقلت لمحمود أمش فى طريقك .
قبل الحادث بثلاث أو أربع أيام كان الأستاذ ابراهيم بيتفق معى
فقال لى انا حاجيب لك عدة حاجات لتكون بمثابة العمل الاول اللى
تبدا بعدها الخطوة ، وهى مدفعين على أساس انهم يبقوا كمين
يوجه ضد ركب جمال عبد الناصر وجاب لى لغم على شكل حزام
وشرح لى طريقة العمل وقال ان محمود يبقى يتحزم به وجاب لى
طبنجة ثانية وقال لى ان محمود على نصيرى ياخدها ويقوم بدور
محمود عبد اللطيف . . اللغم والمسدس جابهم لى يوم الثلاثاء . .
محمود بعد ما اخذ المسدس نزل وراح مؤتمر الموظفين ولم يعمل
حاجة . . وفى نفس اليوم الاثنين . . جانى يوم الاثنين بالليل
الساعة عشرة حداث ونص اتناشر وقال لى انا مسافر اسكندرية
فقلت له علشان ايه يا محمود فقال لى الرئيس مسافر النهارده
اسكندرية . . فقلت افرض انه مفيش حاجة هناك فورانى جريدة
القاهرة وكان منشور فيها ان الرئيس مسافر اسكندرية . . انا
طبيعى الآن فى موقف الشاهد ومش عاوز ابرىء نفسى باعتبار ان
مكتب الادعاء انهى هذه القضية وانما اقرر اننى قلت لمحمود بلاش
هذا المشوار فقال لى لازم اسافر وبهذه المناسبة اقرر - وان كان
هذا الكلام يغلط العقاب على محمود - اقرر ان محمود كان
متحمسا لهذا العمل فعلا . فقلت له طيب ياسيدى سافرو سافر
فعلا . هو سافر يوم الثلاثاء وكان الكلام ده يوم الاثنين بالليل
الساعة اتناشر اللى هو بدء يوم الثلاثاء جانى الأستاذ ابراهيم
الطيب يوم الثلاثاء وجاب لى اللغم والطبنجة وقال لى ابقى اعرض
احدهما على نصيرى . . محمد على نصيرى رفض انه ياخذ اللغم
وانا كنت ابدت اعتراضاتى على اللغم ، ولكن ابراهيم قال لى
العسكريين قالوا انه كويس كده وان احنا مالناش ان نعترض على

الناحية الفنية ... طيب ياسيدى يوم الثلاثاء الساعة اثنين ...
اولا انا كنت فى المحكمة فى هذا اليوم لغاية الساعة واحدة ونص
وكنت اترافع فى حداثر قضية وهذا ثابت فى محضر الجلسة كما
هو ثابت فى التحقيقات التى اجراها رجال الادارة وبعدين روجت
البيت الساعة اتنين اتغديت انا واولادى وخلصت غدا .. الساعة
اتنين ونص جانى الاستاذ ابراهيم ومعه اللغم والطبنجة . ويظهر
ان الاستاذ ابراهيم كان جاى فى السكة ووراه الاخ الاستاذ
عبد العزيز كامل لانه جبه بعده على طول فقال لى هات ابراهيم
يتغدى عندى ... وبهذه المناسبة اقرر ان الاستاذ ابراهيم الطيب
قال لى ماتقولش الحاجات دى للاستاذ عبد العزيز كامل لانه كان
معارض فى هذا الاتجاه ويمكن يقتنعك انك تعدل عن تنفيذ الخطه
.. وبعدين قعدت انا وابراهيم فى اودة المكتب وجبت له على
صينية الشاى طبق خضاروشوية رز وبدا ابراهيم يتغدى وفعلا
وجبه وجه الاستاذ عبد العزيز كامل فقال يبجى ابراهيم يتغدى
معيا فقال ابراهيم انا جاتغدى هنا فقال عبد العزيز ابعت حد
ينزل للحاجة اللى هى الست الوالدة يجيب لنا شوية حاجات
ودخلت انا اللغم وكان ملفوف فى ورقة وكذلك المسدس فى اوضة
من اوض البيت وقعد ابراهيم وعبد العزيز يتغدوا وفضلوا قاعدين
يبجى ساعة . وبعدين الاستاذ عبد العزيز كامل جاله واحد
فلسطينى من الاخوان فجت واحدة خدامة تقول له ان فيه واحد
عاوزه فنزل الاستاذ عبد العزيز وبقيت انا وابراهيم وقعدنا لغاية
الساعة خمسة ونص وكان فيه ميعاد ان نصيرى حيچى فجبه
وعرضت عليه اللغم فقال لا ده ماينفعشنى واخذ المسدس على
اساس انه يقوم بنفس المهمة الموكولة لمحمود عبد اللطيف وعلى
اثر ذلك انصرفنا .. انصرف ابراهيم وخرجت انا ورجعت لمكتبى
وفضلت فيه لغاية الساعة تسعة . وكنت قاعد مع الدكتور
موريس اسكندر وهو جارى وصاحب اجزخانة .. وبعدين روجت

البيت فعلمت في الطريق - وأنا كنت عارف ان محمود في الاسكندرية وما كناش سمعنا الراديو لان الحته الى احنا كنا فيها مفهانش راديو - وأنا في السكة عرفت ان محمود عبد اللطيف اعتدى على الرئيس

الشاهد - (مستمرا) - ومن حمد الله ان الرئيس ما اعتديش عليه ونجى بحمد الله بعد كده أنا قدرت انه سيقبض على فأخذت الست بتاعتي الساعة ٩٣٠ ونزلنا بسرعة اخذنا قطر ١٠ر١٥ من الجيزة وروحنا المنيا ودخلنا الساعة ١٣٠ ورجعت صباحا في قطر التاسعة ونزلت الى مركز امبابه وسلمت نفسى الى البوليس وأنا جاي في القطر قدرت عدة مسائل منها ان زعماء الاخوان منقسمين على انفسهم وان الدعوة في هذه الفترة يسيطر عليها أناس غير مسئولين وغير معروفين للاخوان وان الاتجاه الارهابي اتجاء صورته الطبيعية الواضحة البسيطة انه غير اسلامى ان القتل على هذه الصورة قتل غير اسلامى قدرت هذا وقدرت انه لو وقعت العمليات التي تحت يدى ففيتها ارهاق للاخوان وارهاق للبلاد وعلى الامن واذا كانت دى ما اصابتش يمكن حاجة ثانية تصيب وقررت لذلك ان اسلم نفسى للبوليس وأضع نفسى تحت تصرف المسئولين ولذلك قابلت الضابط وقلت له أنا عايز اسلم نفسى للبوليس ده الحادث وأنا تحت تصرفكم في اى اسئلة .

الرئيس - قول اى حاجة عايز تقولها اذا كان عندك حاجة ثانية عايز تقولها .

الشاهد - ابراهيم قال ان الخطة هي الاعتداء على الرئيس وبعد كده خطف أو الاعتداء على الضباط الاحرار فيه اظن حوالى ٥ واحد وكذلك اعضاء مجلس قيادة الثورة .
الرئيس - الضباط الاحرار دول الجهاز السرى بتاع الجيش ؟

الشاهد - انا ما اعرفش ان فيه جهاز سرى فى الجيش وهو كلامه فى الحقيقة عن الضباط الاحرار بس وهو الاسم الذى يطلق على الضباط الذين يتعاونون مع رجال الثورة .
الرئيس - يعنى الجهاز السرى بس فى الاخوان ؟

الشاهد - أيوه ... ومن المؤسف أن الاعتبارات دى قدرتها وأنا فى القطر ما قدرتهاش قبل الحادث وهذا محل الاسف .
والواقع أن الانسان يظل يسير فى الخطأ ولا يعلم أنه خطأ حتى يقع فيه والانسان يظل يدخن وهو يعلم أن التدخين ضار ولا يحس حقيقة بضرره الا اذا أصيب بكحة ... أو مرض يبقى يعالجه ... ومحل الاسف أننى لم أفكر فى الحادث قبل وقوعه وانما بعد ذلك وأنا مفروض أنى كمحامى ادافع عن المتهمين لا ان أقف موقفهم .

الدفاع - دلوقت كمحامى لسه ... محامى ايه ... يجب ان ادافع عن كرامة مهنتى .

الرئيس - الشاهد يقول اللى هو عايزه .. والدفاع لازم يكون باله طويل .

الشاهد - انا يا سيدى الرئيس محام ولا زالت صفتى قائمة واذا كان موقفى هذا الآن مؤسفا فأننى آسف كل الاسف وأنا مطمئن الى أى مصير تقدره المحكمة بالنسبة الى واتحمله بكل شجاعة وصبر باعتبار ان كل واحد يعمل حاجة يتحمل نتيجة عمله .

الرئيس - ماعدكش حاجة ثانية عايز تقولها ؟

الشاهد - لا اذا كان فيه أسئلة أنا مستعد للإجابة .

الرئيس - ترفع الجلسة للاستراحة .

(رفعت الجلسة فى الساعة الحادية عشرة والدقيقة الخامسة

والعشرين) .

(أعيدت الجلسة في الساعة الثانية عشرة ظهرا)

الرئيس - أعيدت الجلسة - الشاهد فيه عنده حاجة ثانية عايز يقولها ؟

المدعى - هو كان خلص كلامه .

الشاهد - بخصوص الحادثة نفسها خلاص .

الرئيس - فيه حاجة ثانية ؟

الشاهد - بخصوص النظام السرى ؟

الرئيس - هل لك أقوال ثانية عايز تقولها من غير أسئلة ومن غير ماناقشك في الموضوع .. فيه عندك حاجة عايز تقولها ؟

الشاهد - ايوه يا فندم ... بس انالى شكوى صغيرة بخصوص اعتراض الاستاذ حماده الناحل على اننى محام .

الرئيس - انا ردبت عليه .

الشاهد - الانسان لا يصح أن يجهز على جريح ولم يكن يليق به ان يطعننى وانا فى هذا الموقف وبينى وبينه خصومة لانه يحضر ضدى فى قضايا خاصة .

الرئيس - مفيش طعن .

الشاهد - ايوه يا فندم .. مسألة النظام السرى فى الاخوان المسلمين . النظام السرى هذا ترك من ايام البنا الله يرحمه وانشئ هذا النظام اصلا لمحاربة الانجليز ولمحاربة الملك السابق وكان على رأسه الاستاذ البنا كمشرف مسئول باعتباره المرشد العام وكان يرأسه فى ذلك الوقت على ماوضح فى قضية سيارة الجيب - الاستاذ عبد الرحمن السندى وقد اشترك هذا النظام فى حرب فلسطين والطلائع الاولى فى حرب فلسطين كانت من الاخوان - ومن النظام الخاص بالذات وكان يختار أفراده من المخلصين المؤمنين المضحين بأرواحهم وأموالهم فى سبيل الله وذلك لتحرير البلاد العربية والإسلامية من الاستعمار الاجنبى . هذه هى فكرة النظام الخاص فى الاصل واساس هذه الفكرة لا غبار عليه لان المسلم

يجب ان يجهز تجهيزا اسلاميا كاملا فقد قال رسول الله صلى الله عليه وسلم من لم يغز ولم تحدثه نفسه بالغزو مات ميتة جاهلية كما قال أرموا واركبوا ولئن ترموا خير من أن تركبوا . بقى أن الدولة تحارب التسليح فكان لابد من التخفى ولقد اشترك هذا النظام في حرب فلسطين وفي معركة القنال وعمر شاهين . والمنيسى وغيرهما من الشهداء كانوا من اعضاء هذا النظام . وبعد ما انتقل البنا الى رحمة الله كان عبد الرحمن السندى يرأس النظام وكان مكونا من عدة جماعات الجماعة مكونة من خمسة اشخاص على رأسهم واحد والشعبة المهمة بها عدة جماعات وكل جماعة يرأسها واحد وتدرج على نظام هرمى يرأسه عبد الرحمن السندى ومعظم هذا النظام في القاهرة وقد توجد مراكز او مناطق ادارية تخلو من هذا النظام مثل اسوان وذلك لانها بعيدة ولا تيسر لها فهم اغراضه الجماعات منتشرة أصلا في القاهرة ويرأسها عبد الرحمن السندى ولما انتقل الاستاذ البنا الى رحمة الله وجه الاستاذ الهضيبي اختيار مرشدا عاما وبهذه المناسبة اقرر كيف اختيار مرشدا عاما ... الاستاذ البنا ترك ١٠٠ شخص او اكثر كلهم قد بعض ولا يدينون لاحد بالولاء والاستاذ البنا كان غاوى بترينات ..

الرئيس - غاوى ايه ؟

الشاهد - بترينات .. يعنى بقى المحل مثلا في اظاهر والبترينة في شارع فؤاد ومعنى ذلك انه كان يضم الى الجمعية التأسيسية اناس لا صلة لهم بالاخوان المسلمين فمثلا به واحد من النيابة خرج برشوة وبصينا لقيناه عضو في الجمعية التأسيسية . الواقع ان الشيخ حسن البنا كان يضعهم جميعا في الظل لانه رجل عملاق فلما الاستاذ البنا اخذ بهذه الصورة - لم يكن للهيئة التأسيسية قوة ادارية او اى صفة . كانت تحتج به ليقدر ما يشاء فلما مات برزت واخذت طابع التوجيه وهم لا يلتفون نحو شخص منهم .. اختلفوا ولم يتفقوا على شخص منهم فرؤى اختيار احد الناس القربين من الاخوان وله اتجاه اسلامى فرشح الهضيبي وانتخب

انتخابا حرا على مانعلم . وبدأ الصراع بين الهضيبي والسندى لان الهضيبي اول ماجه اعلن ان هذا الاتجاه خطأ واعلن ان قتل الخازندار قتل غير اسلامي وان قاتله يدخل النار ولذلك بدأ الصراع بين الهضيبي والسندى وانتهى هذا الصراع بفصل عبد الرحمن السندى وبعض زملائه من الاخوان المسلمين واستمرت الحال على ما هي عليه وقيل انهم جابوا قيادة اخرى لهذا النظام ودى يفرها بعدين ومشيت الامور الى ما بعد الثورة بفترة كبيرة الى ان فصل السندى وجاب الهضيبي قيادة جديدة للنظام وبدأت تتصل بالاخوان وبعدين هرب عبد المنعم عبد الرؤوف .

الرئيس - مين ده ؟

الشاهد - ده ضابط في الجيش كان يحاكم وهرب فرات قيادة النظام السرى انها تستعين بمعلوماته في الناحية العسكرية وأنا شخصيا استصفته يومين ثلاثة جابهولي ابراهيم الطيب وقال لي ده ضيف سرى مايصحش حد يتصل بيه وفلا قعد عندي يومين ثلاثة وكان ابراهيم بيحى يقعد معاه فترة طويلة وعلى اثر هذا طرأ تعديل جديد على النظام السرى ونظم الجهاز السرى الى جماعات كل جماعة من سبعة وكل اربع جماعات تكون فصيلة وهذه الفصيلة تسليح بالاسلحة مدافع والقنابل والطبقات ده الترتيب اللي جه في النظام السرى زى ما ادليت باقوالى الاولى بمجرد تسليمى نفسى للبوليس وافكر دى صورة معقولة للنظام الخاص .. نرجع بقى للخططة العامة فى مسألة المعاهدة قيل بعد الانفاقية ان الثورة تتجه بالبلاد بعيدا عن الاسلام ولا بد اننا نجيب حكومة اخرى تتجه نحو الاسلام ولا يحكم الاخوان لسببين الاول ان بعض الاخوان ما يمشلوش الاسلام وما يدروش يطبقوا الاسلام والسبب الثانى ان البلاد غير مستعدة لتقبل النظام الاسلامية ككل لا يتجزأ ولهذا يحسن ان نسير بالتدريج حتى تستقر صورة واضحة ولذلك

اقول انه لم يكن في ذهن الاخوان او المسؤولين ان يحكموا وعلى هذا الاساس رتبت الخطة على ان يعتدى على الرئيس جمال عبد الناصر واعضاء مجلس قيادة الثورة والضباط الثانئين يعتقلوا او يخطفوا أو شيء من هذا القبيل وابراهيم الطيب قال ان فيه اتصال بالرئيس محمد نجيب والاتفاق على اساس انه يبقى يهدى البلاد أثناء هذا الاضطراب وانا سألت ابراهيم قلت له يا أستاذ ابراهيم انتم عاوزين تستغلوا الرئيس محمد نجيب في فترة الاضطراب ده علشان يهدى الشعور العام والا انتم واثقين ان فيه صلة قال فيه صلة فسألته ايه كنهها فقال ما يصحش اننا نكشف كل اوراقنا - وبهذه المناسبة اذكر انه ليلة مآجه المرشد من سوريا كنا في البيت عنده في الصالون وبعدين الساعة اتناشر ونصف .. واحدة تقريبا ضرب التليفون فواحد من الاخوان لا اذكره الان رد على التليفون ولما سألناه مين قال ده الرئيس نجيب بيسال على المرشد وعازب يكلمه ضرورى وقال لما يقوم من النوم قولوا له ان الرئيس نجيب سال عليك وانا اذكر المحادثة على التفصيل كما رواها لنا ذلك الاخ .

- آلوه .. مين ؟

- انا الرئيس نجيب .. الاستاذ الهضيبي موجود انا عازب اكلمه .

- ده جه من الساعة ٩ ونام .

.. انا عاوز اكلمه - انا سمعت انه جه دلوقت وعازب اكلمه ضرورى .

- لا ده جه من الساعة ٩ وراح المركز والتقى بالاخوان وخطب فيهم وهو دلوقت نايم .

- طيب لما يقوم قولوا له ان الرئيس محمد نجيب سال عنك ده في ليلة مآجه المرشد من سوريا بالذات فلما يكون ده في ذهني ويقول ابراهيم الطيب ان فيه صلة .. معقول انى اصدقه

• ده من حيث الخطة العامة يافندم •

الرئيس - الادعاء عايز يناقشه ؟

المدعى - ايوه ... انت قلت ان الخطة العامة هي قتل الرئيس جمال ثم تهديئة الحالة هل كان مقصود ان تقوم ثورة شعبية او ايه دى عايزين تفسرها ؟

الشاهد - ايوه ... تفسيرها ان الاخوان كان مقصود انهم يعملوا ثورة شعبية

الرئيس - ايوه •

الشاهد - وبعدين فى الايام الاخيرة انتهوا الى انهم يقوموا بعملیات ارهايية تنتهى باضطرابات فى البلاد يسيطر عليها الرئيس محمد نجيب وينتهى من اعضاء مجلس قيادة الثورة وتكون حكومة تتجه بالبلاد اتجاه اسلامى لعل ده واضح •
الرئيس - ايه الخطة ؟

الشاهد - الاعتداء على الرئيس واطعاء القيادة • والضباط الاحرار فيحدث اضطراب يسيطر عليه محمد نجيب •

الرئيس - ازاي الخطة بتوضع ومنين بتيجى ومنين بتنفذها ؟
الشاهد - الخطة بتوضع فى قيادة النظام السرى اولاولا اعرف منه الا اشخاص معدودين ويطلع عليها المرشد والمفروض ان يصادق عليها وانا اعرف المسئول عن قيادة النظام السرى والمسئول يعرف الى يليه وانا اعرف ابراهيم الطيب ويوسف طلعت فى القسم المدنى واعرف صلاح شادى وانه مسئول عن الضباط فى الجيش والبوليس والخطة بتوضع فى القيادة وتعرض على المرشد ليقرها او لا يقرها فان اقراها تنزل للاخوان لينفذوها •

المدعى - مين المهيمن على النظام ... مين الرئيس بتاعه ؟

الشاهد - مكتب النظام انا اعرف منه ابراهيم الطيب باعتباره رئيس مناطق القاهرة ويوسف طلعت وصلاح شادى فيما اعتقد ودول يقرروا والمفروض انهم يعرضوا الامر على المرشد فيوافق او لا يوافق •

المدعى - اذن النظام تبع المرشد ؟

الشاهد - لازم يتبع المرشد .

الرئيس - فى ايام المرحوم الاستاذ البنا قلت انه كان يراس النظام بنفسه وان كان فيه رئيس آخر هو عبد الرحمن السندى .

الشاهد - ايوه كان يتلقى اوامره من البنا مباشرة .

الرئيس - يعنى النظام كان يتبع الاستاذ البنا مباشرة ؟

الشاهد - ايوه

الرئيس - وبعد المرحوم حسن البنا ؟

الشاهد - نفس الحال

الرئيس - يعنى استبدلت رئاسته برئاسة ؟

الشاهد - ايوه

الرئيس - وبعد قتل الاستاذ البنا هل تبعية هذا النظام لمكتب

الارشاد او الجمعية التأسيسية او المرشد ؟

الشاهد - للمرشد

الرئيس - بنفس الطابع القديم ؟

الشاهد - ايوه

الرئيس - افكر ده الى المدعى عايز يعرفه ؟

المدعى - ايوه وعازين نعرف كمان التسليح .

الشاهد - قبل ماييجى عبد المنعم عبد الرؤوف كان النظام

مقسم الى خمس

الرئيس - نسهل الموضوع شوية .

الشاهد - طيب .

الرئيس - فيه مرشد .

الشاهد - ايوه .

الرئيس - يتبعه نظام خاص له رئاسة منها ابراهيم الطيب

ويوسف طلعت وصلاح شادى .

الشاهد - صلاح شادى فيما اعتقد ... ولكن دكهم

من علم .

الرئيس - ينزل من هذه الرئاسة نظامين مدنى مسئول عنه ابراهيم الطيب ويوسف طلعت وعسكرى خاص بضباط الجيش والبوليس ومسئول عنه صلاح شادى .

الشاهد - قسم الضباط لا اعلم عنه شيئاً لانه كان ايام البناء تابع له مباشرة ولكن القسم المدنى مقسم الى فصائل وجماعات والفصيلة مكونة من ٣٠ شخص لها قائد ورديف له وبعدين يفضل ٢٨ ودول يقسموا انفسهم الى ٤ جماعات كل جماعة منها ٧ اشخاص .

الرئيس - ايه اللى تعرفه عن النظام السرى الموجود الان وايه هى مناطقه تقدر تعددها ؟

الشاهد - كل منطقة فيها فصيلة او اكثر حسب قدرتها .

الرئيس - القاهرة فيها كام منطقة ؟

الشاهد - ٧ مناطق والجيزة ٣ مناطق . منطقة امبابه .

الرئيس - ويراسها ؟

الشاهد - انا ومنطقة بين السرايات ويراسها على القيومى والجيزة ويراسها اخ اسمه يوسف مش فاكى بالضبط اسمه يوسف ايه ومنطقة الفسطاط ويراسها فيما اعتقد الاستاذ عبد العزيز احمد والعباسية ويراسها اخ اسمه الخضرى ومنطقة شبرا اخ اسمه محمد شديد ومنطقة وسط القاهرة ويراسها اخ اسمه سيد ابو سالم .

الرئيس - مش فاكى المناطق الثانية ؟

الشاهد - هم بقو قد ايه ... هم تسع مناطق كل منطقة

بها فصيلة وقد يكون رئيس المنطقة لا يراس الفصيلة لكبر

سنة فيجوز ان يكون واحد تانى هو رئيس الفصيلة

والمسئول عنها .

الرئيس - تعرف حد ... تقدر تضرب مثل ؟

الشاهد - فى منطقة امبابه مثلاً رئيس المنطقة الدكتور حسن

الباشا وده مدرس فى كلية الآداب وكان لا يعلم عن النظام السرى

شيء ؟ وانا وكيل المنطقة كنت المسئول عنه ورئيسه .
رئيس النيابة - فيه منطقة جنوب القاهرة او شرق القاهرة ؟
الشاهد - انا قلت الى جنوب القاهرة وشرق القاهرة الى هي
العباسية .

الرئيس - الجزء الى شرحته خاص بالقاهرة المسئول عنه
ابراهيم الطيب ؟
الشاهد - ايوه .

الرئيس - فيه تنظيم آخر عن المناطق الثانية ؟
الشاهد - جازي لكن ما اعرفوش .
الرئيس - ماهي مسئولية يوسف طلعت ؟
الشاهد - مسئول عن القسم الخاص في غير الضباط و ابراهيم
الطبيب عن القاهرة .

الرئيس - يوسف طلعت عن القاهرة وغير القاهرة والا
ما تعرفش عنه حاجة ؟
الشاهد - ايوه جازي ولكن الحقيقة النظام معظمه في
القاهرة ؟

الرئيس - طيب المكتب بتاع رئاسة النظام لما يعمل خطة
وانت احد الاعضاء ورئيس منطقة ورئيس فصيلة ما تعرفش ..
الشاهد - ما كنتش في امبابه فصيلة حتى الان ماكانش فيه
غير انا ومحمود عبد اللطيف في الجهاز السرى .
الرئيس - كنت تراس الجهاز او النظام الموجود ؟
الشاهد - ايوه .

الرئيس - وانت كنت رئيس احد الاجهزة السرية ؟
الشاهد - ايوه في امبابه ومكنش في امبابه الا انا ومحمود
عبد اللطيف في الجهاز السرى اما بقية الاخوان فكنا لسه رايعين
نعمل منهم جهاز ، انما ما كناش عاملين والاخوان الى كانوا
موجودين كنا حنختارهم .

الرئيس - مين اللى كان بيختارهم فى امبابه ؟

الشاهد - انا باعتبارى رئيس منطقة .

الرئيس - على اساس ايه ؟

الشاهد - فهم الدعوة والتضحية من اجل مبادئها ونضع العضو فترة تحت الاختبار ونديله دراسات اسلامية كحفظ القرآن والاحاديث النبوية الشريفة الى ان يمر ستة شهور فاذا اثبت بعد ذلك انه قادر والشخص عنده استعداد نديله تدريبات عسكرية وبعد هذا كله اذا ثبت صلاحيته نفهمه انه فى النظام وبعدين ندرجه تدريبات عملية .

وهذه المراحل كلها لم تطبق فى امبابه ، وكل ما طبق فيها اننا شكلناها .

الرئيس - باعتبارك شخص ذو نفوذ ومسئول فى هذا النظام لابد ان تعرف قوانين هذا النظام او الطرق المتبعة . فمثلا اذا الرئاسة اقترحت وضع خطة تعرضها على مين ؟

الشاهد - المكتب يتفق على خطة ثم يعرضها على المرشد ثم تنزل من ابراهيم الطيب الى لانفذه .

الرئيس - واذا لم يوافق المرشد ؟

الشاهد - امتنع

الرئيس - هل يبلغ لك القرار فى هذه الحالة ؟

الشاهد - لايقول لى احنا حنعمل كذا ولايقول المرشد موافق او غير موافق وفى حادثة محمود عبد اللطيف لما الحواتكى قال لى هذا الكلام اضطرت ان استفسر من ابراهيم الطيب .

الرئيس - عندك اعتقاد ؟

الشاهد - فى كل حاجة لازم تيجى من المرشد العام .

الرئيس - ده النظام الموجود ؟

الشاهد - ابراهيم الطيب هو صلتى بهذا النظام .

المدعى - تعرف على نويتو وما وظيفته ؟

الشاهد - ايوه وعلى نويتو امين صندوق المنطقة .

المدعى - مش فى النظام ؟

الشاهد - لا

المدعى - مش رديف لك ؟

الشاهد - مفيش واحد فى النظام الا انا ومحمود عبد اللطيف ودلى على هذا اننا لما جيتانخطار واحد تانى عشان يقوم بنفس عمل محمود عبد اللطيف جابوا لنا واحد من بره وهو محمد على نصيرى . وهذا دليل على انه ليس عندى احد غير عبد اللطيف وجايز يكون عندى اخوان كويسين انما لاعطى هذه التعليمات الا لشخص من الجهاز حتى يكون موافق على كل عمل اصدره اليه .
وام يكن فيه احد فى النظام الا انا ومحمود عبد اللطيف والاخوان فى امبابه احنا شكلناهم وعملناهم جماعات وفات عليها ٢٠ يوم لا تزيد او شهر ولسه لا اخذوا التدريبات ولا اخذوا اى شىء ولسه مجرد تشكيل اى نعلمهم كالاسرة .

الرئيس - فيه سلاح فى امبابه ؟

الشاهد - ايوه وانا سلمته للحكومة وكان بخصوص العمليات التى قلتها فى التحقيق .

المدعى - من فىن - وايه عدد السلاح ده ؟

الشاهد - الاستاذ ابراهيم لما وضعت الخطة للاعتداء على الرئيس جمال عبد الناصر جاب لى اربع عمليات عملية محمود عبد اللطيف بالطبنجة وعلمية محمد على نصيرى بالطبنجة وجاب لى حزام فيه لغم وهذا الحزام يلبسه الشخص الذى يروح للعملية والمفروض انه يروح يتابط الرئيس ويوصل توصيلة معينة عشان يموتوا هم الاثنين وابراهيم الطيب جاب مدفعين كما قلت فى التحقيق ودول معدين على اساس ان ابراهيم يختار الناس لعمل كمين فى طريق الرئيس جمال عبد الناصر انما لم يكن عندنا اسلحة للفصيلة لانه لم يكن عندنا فصيلة .

الرئيس - فى اقوالك قلت ان النظام السرى كان له هدف

مخصوص أيام المرحوم حسن البنا ايه الهدف ده ؟
الشاهد - كما قلت فى اول الادلاء باقوالى ان هذا النظام اصلا
وضع لمحاربة الانجليز وللجهاد فى سبيل الله ومحاربة الملك السابق
فاروق لانه كان مقدر طغيانه فى البلد .

الرئيس - وماهو الهدف الذى تبلور اليه هذا النظام الخاص
بعد الثورة ؟

الشاهد - والله ياسيدى قبل الثورة وقع النظام فى اخطاء
يعنى حصلت منه عدة اغتيالات مثل اغتيال المرحوم الخازندار
وكان هذا أيام المرحوم حسن البنا ففهم ان هذا من تقاليد النظام
اى لمحاربة اى شخص يعتدى على الدعوة فالنظام يحارب هذا
الانجاء .

الرئيس - الغرض من هذا النظام كان عشان محاربة الانجليز
والملك الفاسد ومحاربة او تعضيد وجهة نظر الدعوة لكن بعد
اثورة كان بيحارب ايه ؟

الشاهد - الى ما قبل المعاهدة كان الانجليز لسه موجودين .

الرئيس - ده واحد من الاهداف ... وبعدين ؟

الشاهد - الملك السابق فاروق مشى وفضل حماية الدعوة
اى للمحافظة عليها من اى شخص يعتدى عليها باعتبار انه موجود
تحت تصرف الدعوة .

الرئيس - باعتبارك الشخصى هلا فكرت ان الثورة قامت
وفتحت معسكرات للتجنيد العام واعادت تنظيم القوات المسلحة
مافكرتش ان هذه المعسكرات كالحرس الوطنى ومعسكرات
الشباب غرضها ايه ؟

الشاهد - غرضها تجنيد كل شخص له رغبة فى خدمة البلاد
لمحاربة الانجليز طبعا .

الرئيس - هل اعتقدت فى داخلية نفسك ان الاخوان يقدروا
يعملوا تنظيم اقوى من هذه التنظيمات .

الشاهد - لما ييجى وجه مقارنة وانا لم يات فى ذهنى مقارنات

الرئيس - الهدف واحد ؟

الشاهد - مجاش في ذهنى وجه المقارنة ، وكان الاخوان يثيرون مسألة لازمة هاء النظام الخاص خاصة وانه كان يحارب من عدة جهات من الاسوان .

الرئيس - ليه ؟

الشاهد - كائن يحارب من مكتب الارشاد لانه كان يعتقد انه فيه افتيات على سلطته وكان يحارب من ناس في الاخوان وجدوا ان النظام انحرف عن أسسه من أيام حسن البنا واتجه الى اغتيالات معينة فكان يحارب لانهم يعتقدوا ان هذا وضع غير اسلامى .

الرئيس - ذكرت في اقوالك ان الاخوان ابتدأوا يشحنوا نفوس الاخوان ضد الانفاقية .

الشاهد - ايوه .

الرئيس - ازاي شحنتوهم ؟

الشاهد - ينزل لهم بيان من مكتب الارشاد وبيان المرشد الى عمله في سوريا والبيان الاول عدت فيه اخطاء المعاهدة على اساس ان هذه المعاهدة ضارة بالبلد وكان هذا مقدمة لاقامة حكومة جديدة .

الرئيس - مين المسئول عن المنشورات ؟

الشاهد - كانت المنشورات تجينا من ابراهيم الطيب والنظام

الرئيس - مين المسئول عن المنشورات ؟

الرئيس - كانت تجيلك باعتبارك احد افراد النظام الخاص .

الشاهد - كانت تجينا من ابراهيم الطيب يعنى من قيادة النظام مباشرة .

الرئيس - الاوامر التى تصدر من النظام الخاص تناقش او لاتناقش

الشاهد - اقول يافندم . أيام الاستاذ حسن البنا كانت ثقة الاخوان فيه من الوجهة العلمية والتربوية ثقة لاحد لها ، فكانت

الأوامر لاتناقش على الإطلاق فلما وقعت الأخطاء في أيام الاستاذ حسن البنا من النظام السرى أصبحت الأمور لما تيجى تناقش وهذه حقيقة أقرها ، ولذلك أنا شخصيا قلت لمحمود انت حانتدب لعمل يمكن تتهم فيه انك خائن وفكر في هذا أدامك ثلاثة أيام واسالوه وانه سيجيب على هذا .
انما الاصل ان هذه الأوامر لاتناقش ولكن أنا شخصيا كنت اناقشها .

الرئيس — وليه ماناقتش ابراهيم الطيب لما سمعت من الحواتكى ؟
الشاهد — ناقشت واكد لى ان هذا صادر من المرشد ، وما دام اكد لى ...

الرئيس — اكد لك كلاما يعنى قال لك بكلامه لا بيان .
الشاهد — ايوه بكلامه شخصيا .

الرئيس — يعنى دكتاتورية ؟

الشاهد — طبعا .

الرئيس — نظام دكتاتورى .

الشاهد — فيه معنى من معانى الدكتاتورية .

الرئيس — وهل هذا يمشى مع الدعوة الإسلامية ؟
الشاهد — لا

المدعى — فيه نقطة الاسلحة ، انت قلت ان قبل الحادث جاءت لكم اسلحة في امبابة فأين وضعت هذه الاسلحة .

الشاهد — الاسلحة التى سلمتها للحكومة هى التى جاءت والاخ عبدالحميد البنا هو من الاخوان ساكن في بلدة وراق العرب فجيت وقلت له اجر شقه لانه كان ساكن في اودة واحنا ناخذ اوده مالكنش دعوة بيها وفعلنا اجرنا شقة اودتين واحنا اخذنا اوضه حطينا فيها الحاجة دى وعبد الحميد البنا لايعرف من امرها شيئا وحقيقة ان ركن العلم مش متوفر عنده لانه لايعلم حقيقة هذه الحال وكنا ناخذ منها .

المدعى - يعنى عبد الحميد البنا ماكانش فى النظام .
الشاهد - أناقلت لما جينا نكون الفصيلة وضعته فيها باعتبارها
 الاساس فى النظام لكن لم تتكون الفصيلة بعد . والفصيلة كانت
 فى البداية منى ومن محمود عبد اللطيف وعلى نويتو
المدعى - قلت ان مكتب الهيئة التأسيسية كان فيه ثلاث
 شيع - فرقة برياسة بهى الخولى وفرقة اخرى برياسة الدكتور
 خميس وفرقة ثالثة فما هى هذه الفرقة الثالثة ومن رئيسها وما
 هى ميولها ؟

الشاهد - الفريق الثالث كان يرى ان الثورة تتجه اتجاها غير
 اسلامى وان هذا الوضع ضار بالدعوة الاسلامية ويمكن يكون
 رئيسه الاستاذ المرشد ولكنى لا أعرف احدا من أفراد هذا
 الفريق أو رئيسه أو المسئول عنه وأنا لا يمكننى ان احدد شخصا
 بالذات لانى لست عضوا فى الهيئة التأسيسية .

المدعى - ما معنى عبارة « المسائل تحقق اسلاميا » ؟
الشاهد - المقصود هو هل هذه الاعمال أو عملا بالذات
 جائز أو غير جائز من وجهة الشرع .

المدعى - يعنى قسم للافتاء وما طريقته او كيف تحقق
 التصرفات من الوجهة الاسلامية فى النظام ؟

الشاهد - مكتب النظام الى هم المسئولين عن قيادة النظام
 لما يقترح امرا يعرضه على الاستاذ المرشد والمفروض ان هذه
 القيادة لما تقترح شيئا يكون متفق مع الاسلام وهم فيما بينهم
 يحققون هذا الاسلام اى هل تجوز أو لا تجوز شرعا ثم يعرض
 المكتب بعد التحقق هذه الاقتراحات على الاستاذ المرشد .

المدعى - عاوزه توضيح .
الشاهد - يرجعوا الامر الى الاصل العام فى الاسلام .
المدعى - هل فيه قتل اسلامى وقتل غير اسلامى ؟
الشاهد - الاسلام حدد خمس حالات على سبيل الحصر
 للقتل ولا يجوز قتل المسلم الا فى حدودها . وليس منها طعنا

فكرة الاغتيال السياسى باعتبار ان القتل السياسى قتل عمد
وقاعله يدخل النار ومع هذا أصبح القتل من تقاليد النظام
السرى من أيام الاستاذ حسن البنا فقتل النقراشى والغازندار
اى انها أصبحت مسألة مفترضة .

الرئيس - يفهم من كلامك ان الفرق الثلاث التى انقسمت
اليها الاخوان هى الفريق الاول برياسة بهى الخولى والثانى برياسة
الدكتور خميس والفريق الثالث برياسة المرشد ، والفريق الاول
مع الثورة والفريق الثانى موقفه مائع والفريق الثالث كان ضد
الثورة لانه معتقد ان الثورة متجهة اتجاهها ضد الاسلام ومن
سياق الحوادث فهم أنك كنت تتلقى الاوامر يعنى كنت عضواً فى
النظام الخاص اى أنك تبقى من الفريق الثالث .
الشاهد - هذا منطقى .

الرئيس - هل كنت فى الفريق الثالث ؟
الشاهد - انا كان لى وضعين رئيس منطقية تابع لمكتب
الارشاد وكأحد افراد النظام السرى اتبع النظام السرى .
الرئيس - لكن فيه واحده تجيب الاخرى بمعنى انى لما
اضرب واحد واقتله فالقتل يجيب الضرب واحاكم لانى قتلته
وانت قلت ان المرشد كان رئيس الجهاز السرى وهو مسئول عنه .
الشاهد - لما يجبنى أمر من النظام السرى انفذه لكن هل
هذا النظام السرى تابع لبهى الخولى او تابع للدكتور خميس او
تابع للمرشد فهذا مالا اعرفه .

الرئيس - لكن انت قلت ان النظام السرى تابع للمرشد
وانت تعلم ان المرشد كان متريس هذا الفريق لانه يعتقد ان
الثورة متجهة بالبلد ضد الاسلام . والفروض ان المرشد هو
الرئيس فى هذا الجهاز فى خصوص الهيئة وفى الوقت نفسه المرشد
مسئول عن الجهاز وعن النظام السرى وانت أحد افراد هذا
النظام السرى واذا لم تكن متفقاً معه فى الفكرة العامة كنت تسبب
الجهاز السرى ولا تنسب اليه .

الشاهد - الواقع أننا كنا بتتردد على هذه الأجهزة الثلاث .
الرئيس - لكن أنت نفذت قرارات خاصة بالجهاز السرى .
الشاهد - أيوه .
الرئيس - أرجوك تمشى معايا ببساطة .
الشاهد - حاضر .

الرئيس - انت كنت أحد اعضاء الجهاز السرى وهو يتبع المرشد باعترافك واقرارك كويس ، المرشد كان منتحى رأى وله هذا الرأى وهو أن الثورة متجهة ضد الاسلام فهل انت متفق معه على هذا ؟

الشاهد - أقول لحضرتك بمنتهى الصراحة أنا كنت ماشى فيه كعضو فى النظام .

الرئيس - بدون تفكير .

الشاهد - الحته دى لم تتوضح وهى أنى ضد الثورة .

الرئيس - أنا لم أسألك هل انت ضد الثورة أو معاها ، إنما انت كنت على الاقل فى داخلية نفسك من غير ما تبلورها تعتقد أن الثورة ماشية ضد النظام .

الشاهد - أيوه مادمت كنت عضو فى هذا النظام ابقى كده .

الرئيس - باعتبارك محامى ومتعلم وحاصل على أكبر درجة تعليم فى بلادنا بل فى العالم اجمع تقدر تفسر لى ازاي الثورة متجهة بالبلاد ضد الاسلام ؟

الشاهد - الثورة حققت أعمالا كثيرة وحققت أعمالا طيبة .

الرئيس - مليش دعوة بالأعمال ، نحن نتكلم عن النقاط التى أثارت فى نفسك فكرة أن الثورة متجهة ضد الاسلام .

الشاهد - دلوقتى مفيش .

الرئيس - وقبل الآن ؟

الشاهد - الاخوان كانوا يشحنوا بمنشورات أن الثورة على اتصال بالانجليز وهذه المعانى كانت مسيطرة على ذهن الاخوان لدرجة أنهم لا يفكرون فيها .

الرئيس - يعنى النقطة التى كانوا يشحنوا فيها اذهان الاخوان
مع ايام الاتفاقية .

الشاهد - ابوه .

الرئيس - وما هو الموقف قبل الاتفاقية ؟

الشاهد - كان الاخوان عامة زى ما تعرفوا مؤيدين الثورة اى
مشوا فى طريق الثورة الى ان جاءت حوادث مارس فاختلف
الاخوان مع الثورة على هذه المعانى وقبل مارس كان الاخوان
مع الثورة « صافى يالبن » و ٢٤ قيراط انما بعد مارس بدأت
هذه الخلافات تشور وكان يقال لنا دائما ان الثورة بتجيب
ناس من الاخوان وتديلمهم مناصب معينة وهؤلاء لا يصح ان
يصرفونا عن انه عمل خطير ضد الدعوة بقصد فركشة الاخوان .

الرئيس - لكن قبل مارس كان مامعنى قيام الجهاز السرى ؟

الشاهد - الاخوان كانوا قبل مارس قلبا وقالبا مع الثورة
اما استمرار بقاء الجهاز السرى فهذه مسألة استقرت مع
الاخوان منذ ايام الاستاذ حسن البنا ومشيت كما هى .

الرئيس - هل الاسلام يرتضى وجود قوتين فى البلد ؟

الشاهد - الاسلام يامرنا بالسير وراء الحاكم فى اى اتجاه
كما يامرنا بان نصلى وراء الامام حتى ولو علمنا انه فاجر .

الرئيس - اى انك ارتضيت قبل مارس ان تكون فى الجهاز
السرى فهل يسمح الاسلام بوجود قوة عامة مكونة من افراد
هذا الشعب وقوة مختفية كهذه وهل عللت حكم الاسلام فى
داخلية نفسك حتى انك قبلت هذا الوضع ان الاسلام لا يجيز
هذا ، والا فاية دعوة هذه واية رسل دعوة هؤلاء ارجوك ان
تحللها لى ؟

الشاهد - المسألة بقيت منذ الاستاذ حسن البنا واستمرت
بعد ذلك كما سبق ان قلت ثم حصل الخلاف فيها بين الاخوان
وبدعوا يفكرون فيما اذا كان هذا النظام يتفق مع الاسلام او لا يتفق
ولو ان المسألة سارت بعد ما مات الاستاذ البنا وظل النظام كما

هو اما انها قوة غير قوة الحكومة فهذا شيء آخر وانما الذي حصل
ان الامر استقر دون تفكير كمسألة تقليدية للاخوان .

الرئيس - مش تقليدية ؛ لانها لو كانت تقليدية لبقيت حاجة
مستمرة وانما هناك نقط خاصة ثارت وتثور في اذهان الناس
وهم انهم يفكرون في هذا النظام السرى ولما فكر الاستاذ المرشد
الهضبي فكر في تغيير رئاسة هذا الجهاز وقال تصريحاً كبيراً
ايامها تذكره اولاً ؟

الشاهد - لا اذكره . قال ايه ؟

الرئيس - قال ان الدعوة ما فيها سرية .

الشاهد - ايوه قال هذا والمفروض ان الاستاذ المرشد لما
يقول هذا لا يصح ان يقول ان هناك اشياء سرية لان هذا يكون
اعترافاً بوضع غير مشروع في البلد .

الرئيس - يعنى كان نفاق وهل الاسلام وافق على نفاقه ؟

الشاهد - هذه مسائل يسأل فيها هو وانما انا اذكر ان
هذه المسألة استقرت من ايام الاستاذ حسن البنا وظلت قائمة
الى ما قبل المعاهدة وكان فيه سبب مشروع لقيامها وهو ان
الانجليز كانوا موجودين في البلد اما بعد المعاهدة وهذه ايام قليلة
فانا لا اجد مبرراً لبقاء الجهاز السرى .

الرئيس - الادعاء يجب يسأل الشاهد .

المدعى - الشاهد ما عندوش معلومات ان الحكومة طلبت حل
هذا النظام قبل ٢٥ مارس ما عندكش فكرة .

الشاهد - لا

الرئيس - انت بتقول ان النظام السرى بعد الثورة كان من
اهدافه ان يحارب الانجليز وبعدين جه الاستاذ المرشد الهضبي
ايام لما حصل فيه كلام عشان محاربة الانجليز في القتال بعد
الثورة وقال انه مدخر قوة الاخوان ليحارب بها كيفما يشاء ان
شاء الله في الجزائر اذا راي الاسلام هذا ولم يقبل ان يصرح بانه

سيحارب الانجليز مما يفهم من التصريح انه مش عاوز يشترك
في حرب الانجليز في القنال فهل هذا لم يوجد في نفسك شك
لتبين حقيقة الاتجاه الذي يستعمل من اجله هذا الجهاز ؟
الشاهد - قطعاً مسألته متناقضة .

الرئيس - الحكومة الموجودة تقول انى اجهز لمحاربة الانجليز
وتعلن هذا فما الذى يجعل المرشد يحجم عن التصريح بهذا ؟
الشاهد - كان الاخوان يقولون فيما بينهم لازم نروح نجاهد
في القنال انما المسألة ان الاستاذ المرشد وهو الشخص المسئول
قد يصرح بتصريحات لا يقصد من ورائها نفس التصريحات كما
قال انه ليس لديه نظام سرى .

الرئيس - انت تعرضت في كلامك الى أن الجهاز السرى ذهب
وحارب في فلسطين وفي القنال وكان من بينهم بعض الشهداء
وهذا سبب من الاسباب الى جعلك تعتز او يعتز الاسلام ببعض
الناس انهم يدافعون عن دعوتهم والجهتين التى اشتركتهم فيها
فلسطين والقنال والدولة فى واحد منهما اشتركت رسمياً وهى
حرب فلسطين فهل قارنتم شهداءكم بشهداء الدولة ؟
الشاهد - لا ، لم نقارن كان عندنا شهداء وكان الجيش فيه
شهداء كثير .

الرئيس - الجيش والمتطوعين .
الشاهد - كانت كتيبة الجامعة العربية معظمها من الاخوان
يا سيدى الرئيس .

الرئيس - وده ماخلشك ليه تخش فى نظام الدولة بدل من
ان تكون نظاما داخل نظام الدولة .
الشاهد - ايوه - كان الاستاذ حسن الهضيبي متصرف فى
الشئون كلها وكنا نسمع ونطيع

الرئيس - كيف تسمح لنفسك وانت رجل متعلم ان تسير
وراء شخص ومفروض ان تعرف ان فيه مشتركين فى هذا الجهاز
اقل منك علما مثل محمود عبد اللطيف ازاى ترتضى لنفسك هذا

الوضع وتفضلوا ماشيين وراء حاجة مفهضين باسم الدين كيف ترتضيه لنفسك كمتعلم ؟

الشاهد - لو بقيت الحال خمسة أو ستة شهور لحل هذا النظام بطبيعته لسببين السبب الاول ان الاخوان بدأوا يناقشوا هذه المسائل والسبب الثانى هو ان بعد محنة ١٩٤٨ بعض الاخوان من النظام خرج .

الرئيس - زى مين ؟

الشاهد - فيه عدد من الاخوان خرج ، فيه ناس خرجوا فعلا وقالوا ان هذا اتجاه غير اسلامى وأنا من ضمن هذا الفريق وكنت ارى ان الاساس الفكرى للنظام من حيث محاربة الانجليز ومحاربة الملك السابق كما سبق ان قلت لحضراتكم بصرف النظر عن قيام الثورة اساس فكرى صحيح ، وانما الاخطاء التى وقع فيها النظام ما يصحش ان يبقى هذا النظام بعد ذلك ولما قامت الثورة استمر هذا النظام باعتبار انه تراث من ايام الاستاذ حسن البنا ، واى واحد من الاخوان كان يريد ان يمس هذا النظام كانوا يصرخوا فى وجهه على اساس ان الاستاذ حسن البنا هو الذى عملته ولا يجوز مناقشته هذا هو الاساس الذى استمرت عليه الفكرة وكنا نحاول اصلاح الاخطاء التى وقع فيها النظام . ومفيش شك ان بقاء مثل هذا الحال خطأ وأنا سلمت به ولذلك قررت ان اضع كل مالى من بيانات تحت تصرف الحكومة .

الرئيس - عندما صدر امر حل الاخوان فى يناير سنة ١٩٥٤

اصدرت الحكومة بيانا بحل الاخوان ، فايه اللى فهموه لكم ؟

الشاهد - قرانا هذا البيان وعرفنا ان من ضمن الاسباب التى من اجلها حلت الاخوان حاجة اسمها النظام السرى ، وهذا كان واضحا فى البيان والاخوان فى هذه الفترة كان شعورهم انهم معتدى عليهم لانهم لم يعملوا شيئا وعلى هذا الاساس قامت فى اذهانهم ان الثورة مش عاوزه بعد ان حلت الاحزاب حاجة من بقايا العهد الماضى يكون موجود هذا هو الذى استقر فى اذهانهم ولما الثورة افرجت عن الاخوان مشيت الامور كما كانت .

الرئيس - انت قلت في الاول كان فيه نظام سرى وهذا النظام كان قائما وقلت ان هذا النظام السرى من اسمه « السرى » انه غير شرعى .

الشاهد - هذا من وجهة نظر الدولة طبعاً .

الرئيس - هل تريد كمواطن ان تعيش في دولة لاتحترم فيها قوانينها ؟

الشاهد - قطعاً لا - وانا ابديت اسفى في اول اقوالى لهذا السبب وعشان كده سلمت نفسى لادلى بكل ما لدى من معلومات .
الرئيس - انا اتكلم الان عن يتاير ، فهل الدولة المحترمة تكون كذلك اذا لم تكون قوانينها محترمة وان تعين المواطنين ليعيشوا في كنفها ؟

الشاهد - انا لا ارضى هذا طبعاً .

الرئيس - وهل لما يكون مثل هذا النظام سبباً في حل الاخوان فهل لا يكون سبباً كافياً ؟

الشاهد - اعتقد هذا وانه سبب كاف .

الرئيس - ألم تفكر في هذا ؟

الشاهد - ولكن حل الاخوان لا يحل النظام السرى لسبب واحد وهو انهم يتحولون جميعاً الى نظام سرى ولذلك فان اجراء حل الاخوان كفكرة لا يحل النظام السرى . وعلى هذا الاساس يحل النظام السرى وانما لا يجوز حل الاخوان نفسها على اعتبار انها اعمال غير اسلامية لا يجوز ان ياتيها مسلم .

الرئيس - مفيش مسلمين غير الاخوان المسلمين ومحدثش يدخل الجنة غير الاخوان ؟

الشاهد - لا - فيه ناس اكرم من الخارج .

الرئيس - وهل يحل الاخوان تحل الدعوة الاسلامية ؟

الشاهد - ابداً .

الرئيس - اשמعنى قصرتم على انفسكم هذه الدعوة الا يوجد مسلمون في مشارق الارض ومغاربها ؟

الشاهد - فيه طبعاً فهناك جماعة شباب محمد وغيرها .
الرئيس - كل مسلم يدعو ويطبق الاسلام في داخلية نفسه
وفي علاقته دون ان يعمل نظاماً سرياً .

الشاهد - حل الاخوان كفكرة ومصادرة املاكهم بطبيعة الامر
ينتهى بأن الاخوان يظلوا على ترتيباتهم وهو النظام السرى .

الرئيس - معنى هذا ان فكرة الاسلام خرجت من جماعة
تدعو الى الاسلام الى فكرة جماعة صاحبة نظام خاص يكون في
العلانية تحت دعوة الاسلام واذا حلت ينزل تحت الارض ويستقل
من تحت الارض .

الشاهد - ايوه

الرئيس - اظن الفكرة بعيدة عن دعوة الاسلام .

الشاهد - الفكرة اصبحت جماعة معينة .

الرئيس - الاسم للاسلام وحقيقتها لا يعلمها الا الله

الشاهد - نعم يعلمها الله .

الرئيس - في كلامك قلت ان الاخوان لا يفكرون في انهم يقيموا
حكومة .

الشاهد - الان على الاقل .

الرئيس وقلت في كلامك ان فيه ناس من الموجودين في رئاسة
الاخوان لا يفهمون الاسلام ولا يعرفون كيف يطبق الاسلام فكيف
ترضى ان تكون في جماعة تدعو للاسلام والرئاسة فيها لا تفهم
الاسلام ولا تطبق الاسلام ومن هم هؤلاء ؟

الشاهد - الكلام من ناحية الهيئة التأسيسية فهذه الهيئة
كانت معينة من ايام الاستاذ حسن البنا .

الرئيس - كانت عبارة عن « وش البترينة »

الشاهد - كيف ارتضى لنفسى هذا ؟ انا كنت اعتبر هذا خطأ
وكنا نحاول اصلاحها لان الهيئة التأسيسية في يدها التشريع
والتنفيذ ولها القيادة وكان لها صفة الابدية والاخوان تحت كانوا
« يرفسوا » ويتخانقوا ولكن مش قادرين يعملوا حاجة لانهم باقين

من تراث الاستاذ حسن البنا - كل هذا وقع - والاخوان كشعب قاموا بمجهود ضخم الى ان اقتنعت الهيئة بحل نفسها وفعلوا في الاجتماعات الاخيرة عدل القانون على اساس اختيار أعضاء الهيئة التأسيسية بالانتخاب وهذا ولاشك اصلاح وضمع معين وهو البقاء في الهيئة التأسيسية باعتبار انها هيئة تدعو للاسلام . اما ان اشخاص الهيئة التأسيسية لم يكونوا من الاخوان ولا دراية لهم بالاسلام فقد ادى ذلك الى عدم احترام هذه الهيئة . وكما قلت ان الهيئة التأسيسية اخذت شيئا من القداسة والاخوان اعدوا يحطموا في انفسهم لدرجة انها فقدت سيطرتها وثقتها في نفوس الاخوان الى ان اضطرت الى حل نفسها بعد ان وجدت نفسها في عزلة عن الاخوان فعدل القانون . وهذا لا ينفي ان فيها اشخاصا مسلمين من طراز المسلمين . مع وجود الاشخاص الذين لا صلة لهم اصلا بالاخوان .

الرئيس - احنا ما قلناش الكل . احنا قلنا البعض .

الشاهد - مثلا فيه واحد اسمه الاستاذ احمد مطر وهو مفتش في وزارة المعارف ولا صلة له بالاخوان وانما هو رجل مسلم والاستاذ عبد الحكيم عابدين وهو شخص تركه من ايام الاستاذ حسن البنا وهذه التركة عليها ديون ونحن كشعب شلناها . وكان لا يرضى عنه الاخوان لاسباب كثيرة انما كنا نعمل ايه . الهيئة التأسيسية تنتخب مكتب الارشاد وقد وضعوا عددا كبيرا من الناس في الهيئة التأسيسية فكل ما ييجي انتخاب ينتخبوه وياخذ اغلبيه ويبقى سكرتير عام رغم انف الاخوان ونحن كنا « نرفس » ولو امتد الاجل بالجماعة الى ان تجتمع الهيئة التأسيسية لكان حصل الكثير لكن هذه ارادة الله وانا بقيت ببعيدة هي امكان اصلاح الاخوان لاننا كنا في جماعة من مبادئها الاصلاح فممكن اني اصلح هذه الهيئة لاالفرار منها وانا شخصيا اعتكفت سنة ولا ادخل فيها المركز العام للاخوان المسلمين كما اني احب الافراد الذين لم يحضروا درس الثلاثاء من ايام الاستاذ البنا .

الرئيس - في اقوالك قلت ان الشيخ حسن البنا سب لكم تركة مثقلة في جماعة الاخوان وانكم استحملتوها الى ان تصلحوها معتمدين على الوقت فهل التركة الموجودة في الاخوان انقل او التركة الموجودة في البلد انقل . كمواطن رايتك ايه ؟

الشاهد - التركة الموجودة في البلد انقل بكثير جدا لان الاخوان جزء من البلد

الرئيس - هل ممكن ان الاخوان يحاربوا الجمعية التأسيسية القديمة وفي الوقت نفسه يتفرغوا للدعوة ؟

الشاهد - لاشك ان الخلافات القديمة استنفذت جزء ضخمة من مجهودهم الى ان انتهينا الى هيئة ارتضت ان تحل نفسها .

الرئيس - هل نسيتم موقف البلد المثقلة بالديون ؟

الشاهد - انا كمواطن اترك هذا للحكومة .

الرئيس - وهل انت تركت لها فرصة ، ده انت اشتغلت في الجهاز السري وعامل رئيس وتتضرب .

الشاهد - انا اعترف اني اخطأت .

المدعى - انت قلت ان فيه ناس لا يصلحون للحكم مثل عبد

الحكيم عابدين فايه الاسباب ؟

الشاهد - فيه اخطاء شخصية وخلقية وانا اعفى نفسى من ذكرها .

الرئيس - لاداع للتعرض للاشخاص بسبب اشياء شخصية .

المدعى - وايه وكيل النيابة اللي طلع بتهمة رشوة ؟

الشاهد - هذا مساس بشخص معين ، وما قدرش اقول اسمه خاصة اذا كانت النيابة قد حفظت القضية .

المدعى - قلت ان ابراهيم الطيب كان بيديك منشورات فما نوعها ؟

الشاهد - بيان الاستاذ المرشد في سوريا .

المدعى - هل هذا البيان كان بموافقة مكتب الارشاد او بدون موافقته ؟

الشاهد - بدون موافقته طبعاً .
المدعى - اعمال خطيرة كهذه فهل يوافق عليها مكتب
الارشاد ؟

الشاهد - لا أعلم
الرئيس - هوه قال لك ان الامور ماشية دكتاتورى
المدعى - كمل لنا مسألة المنشورات .
الشاهد - جاء لنا خطاب الى الرئيس موجه من الاستاذ
المرشد .

المدعى - بس
الشاهد - كانت بتيجي لنا مجلة « اسمها الاخوان في
المعركة » .

المدعى - كانت بتطبع في الجهاز السرى .
الشاهد - نعم وهذه المجلة التى عنوانها الاخوان في المعركة
عبارة عن نشرة دورية فيها تفسيرات للقرآن وأحاديث وتفسير
للموقف السياسى من وجهة نظر الاخوان المسلمين .
الرئيس - ليه ما رحتش انت تقتل الرئيس جمال عبد
الناصر وانت راجل بتجند الناس وقرأت الاتفاقية على الاقل
احسن من محمود عبد اللطيف خصوصاً وانك بتنفذ الاوامر
في الجهاز السرى . ليه ما رحتش تنفذ ؟

الشاهد - أنا غير مدرب تدريب كافى .
الرئيس - ومحمود عبد اللطيف مدرب لانه كان في فلسطين
والقنال ؟

الشاهد - المفروض ان كل واحد يسافر يكون مدرب .
الرئيس - هل تعلم انه كان مدرب على المسدس ؟

الشاهد - لا مش مدرب .
الرئيس - انتم تبقوا متساوين في التدريب .
الشاهد - أنا لم اطلق في حياتى اكثر من خمس رصاصات

في الحرس الوطني لانى أعدت خمس أيام فقط ولم يمكنى أن أوفق بين عملى فى المكتب وبين التدريب فى الحرس الوطنى اذ تراكمت المذكرات على .

الرئيس - انما قدرت توفق بين فكرة التدريب فى الحرس الوطنى والتدريب لحاجة خاصة .

الشاهد - لو سألتنى عن عقيدتى فانا كنت باتدرب للحرس الوطنى للفكرة الوطنية .

الرئيس - والنظام السرى ؟

الشاهد - مسألة تقليدية .

الرئيس - هل لدى المدعى أسئلة يريد توجيهها للشاهد .

المدعى - يقولوا ان البلد غير مستعدة لمحاربة الانجليز ، فليه ما استنتوش لما تؤهلوا الراى العام ، فليه عاوز تعمل حركة بدون تأهيل ؟

الشاهد - يسأل المسئولون .

المدعى - من يتولى الحكم من الناس دول ؟

الشاهد - المفروض انهم يكونوا ناس يتجهوا بالبلاد نحو الاسلام ، وانا معنديش معلومات وانما كان بيدور فى اذهان الناس بعض اسماء معينة مثل الاستاذ محمد العشماوى واكثرهمش بالتاكيد عبد الرحمن عزام اللى كان أمين عام الجامعة العربية . ومعلوماتى عن هذا الوضع انها اسماء ترددانما ليه ما ستتناش فلا اسأل لانى لا اعرف هذا ؟

المدعى - ألم تناقش فيه ؟

الشاهد - لا

المدعى - الحزام اللى جابه لكم الضباط - مين هؤلاء

الضباط ؟

الشاهد - لم يقل لى اسماء الضباط ، انما انا قلت ان هذا الحزام غير عملى انما ابراهيم الطيب قال لى لا تتكلم لان اخواننا

العسكريين قالوا لى انه سلاح كويس فضلا عن اتى مش من
حقى ان اسأل لانى لو سألت عنهم تبقى الحكاية مكشوفة .

المدعى - مين صاحب الاقتراح بتاع الحزام ؟
الشاهد - ابراهيم الطيب على اساس انه اقتراح الجماعة
العسكريين .

المدعى - الا تعرف سبب اختفاء المرشد والرياسة بتاع
الجهاز السرى ؟

الشاهد - ايوه اقول لحضراتكم ، لما اختفى المرشد انا
سألت ابراهيم الطيب ليه اختفى المرشد فقال لى ان الاستاذ
المرشد اعتقلوه المرة الماضية وفيه فكرة الآن لاغتياله فاخفى
واحنا محافظة عليه خليفاه يختفى ، فانا قلت له هل معنى
هذا انه راح يقلت مفيش طريقة الا اذا طلع بره البلد خالص ،
وقلت له هذا كلام غير منطقى كما انى غير مقتنع وانا عاوز
تحقيق واطلب تحقيق لانه وضع غير طبيعى ومش كل ساعة
يعتقل الاخوان ويحصل دربكة فيها . وبعد هذا اجتمعت
بالاستاذ يوسف طلعت على اساس انه يحقق معى فى هذه
المسألة وفى هذه الفترة قلت لابراهيم الطيب لا تنزل امبابه بعد
هذا لانك تتصرف تصرفات هوجاء ، فجاء لى يوسف طلعت
فسألته فقال لى ان الذى حصل ان المرشد بات بره فجاء
البوليس وفتش منزله فى الليلة دى فرؤى انه لا يعود الى بيته
فقلت له الا تعلم ان هذا الاختفاء يشير فزعا فى نفوس الاخوان
فقال دى غلظة وخلص ولا يصح ان تحدث فقلت له لازم يظهر
فقال لى مش دى الوقتى .

المدعى - المرشد اختفى انما ليه اختفى اعضاء الجهاز
السرى ؟

الشاهد - اختفى اعضاء الجهاز السرى لانهم معروفون
للبوليس

المدعى - ولكن هؤلاء الاعضاء كانوا معروفين للبوليس واذا
ظهروا فان البوليس سيقبض عليهم وبهذا يتعطل الجهاز
باعتبار انه تعطيل لقادته .

الرئيس - ما الدافع ان الحكومة تعتقل اعضاء الجهاز
السرى ؟

الشاهد - لان الحكومة ميصحش ترتضى ان يكون فى البلد
مثل هذا الجهاز

الرئيس - لكن ليه ما اعتقلتهمش من زمان ، والا هم فى
داخلية نفوسهم كانوا عارفين انهم قادمين على الخطه دى
سلفا فاستخبوا .

الشاهد - يصح يكون هذا فى ذهنهم ومن الجائز الا يكون
هذا قائم فى ذهنهم

الرئيس - انت تعرضت فى كلامك الى مسألة رئيس
الجمهورية وقلت ان ابراهيم الطيب قال لك ان فيه اتصال
بين محمد نجيب والاخوان ، عاوز هذه النقطة التى قالها لك
ابراهيم الطيب انك تعيد الحادثة كما حصلت فسرهما ؟

الشاهد - ابراهيم الطيب لما جانى وقال لى خطة الاعتداء
على الرئيس جمال عبد الناصر وبعدين قتل القادة والضباط
الاحرار فى هذه الفترة رايح الرئيس محمد نجيب يلقي بيان
فى الراديو يهدىء فيه الخواطر وتشكل حكومة غير الحكومة
القائمة ، فانا سألته هل معنى هذا ان فيه اتصال بينه او اتفاق
على هذا المعنى والا حنبقوا تستقلوه - وهذا نفس الكلام فقال
لى فيه اتصال بالرئيس محمد نجيب ، فانا سألته والاتصال
ده كنهه ايه فقال لى الواحد ما يصحش يسال واحنا لا تكشف
أوراقنا . وانا لم اعتقد ان فى هذا الكلام كذب لانه كان فى ذهنى
مسألة اتصال محمد نجيب بالاستاذ المرشد ليلة ما حضر من
سوريا فاعتقدت ان فيه اتصال واما وسيلة هذا الاتصال فلا
أعرفها والا لقلتها بصراحة للمحكمة .

الرئيس - ما هي واقعة اتصال اللواء محمد نجيب بالاستاذ المرشد اذكرها لنا ثانية ؟

الشاهد - وصل الاستاذ المرشد الساعة ٩ او ١٠ مساء وأعد مع الاخوان في المركز العام الى الساعة ١١ وبعدين راح البيت وراح معه عدد من الاخوان واعدنا في اودة الصالون .

الرئيس - كان مين موجود

الشاهد - عدد كبير

الرئيس - الا تذكر منهم احدا

الشاهد - هم كانوا خمسين واحد ، والواقع ان الحادثة نفسها متعلقة بواقعة معينة وليست بأشخاص وانا لا اذكر اشخاص وانما اذكر الواقعة .

الرئيس - اذكر الواقعة

الشاهد - بعض الاخوان انصرفوا ولكن بقي عدد كبير ، وبينما نحن قاعدين ضرب جرس التليفون حوالى الساعة ١٢:٥٥ او واحدة صباحا فقام واحد من الاخوان - والله لا اذكره - وتكلم في التليفون وكنا نسمعه يرد فيقول « لا يا افندم » - « جه من الساعة ٩ » - « نام ومانقدرش نقومه » وبعدين قلنا له مين ده فقال : الرئيس محمد ، فقلنا له اش عرفك فقال واحد بيقول انا محمد نجيب وطبعا تفاصيل المكالة حيننا نعرفها لان لما الرئيس محمد نجيب يتصل بالاستاذ المرشد يثور في نفوسنا معرفة تفاصيل الحادثة فقال ان محمد نجيب قال هوه الاستاذ المرشد موجود فقلت له ايوه يا افندم فقال انه عرف انه وصل الساعة ١٢ فقلت له لا ده وصل الساعة ٩ وراح المركز العام واتصل ببعض الاخوان وجه المنزل نام ، فقال له انا بلغني انه جه البيت على طول فقلت له لا ده راح المركز العام اولاً . وقال لنا انه الرئيس نجيب لان صوته فيه لكنة معينة وظاهرة في الكلام ومفিশ واحد يتنحل شخصية الرئيس محمد نجيب .

الرئيس - ألا تذكر واحدا ممن كانوا معك في هذه الليلة .
الشاهد - بشرفي لا أذكر - والواقعة هذه تذكرتها اليوم ولو
تذكرت أحدا لقلت .

الرئيس - وإيه التعليق اللي دار بين الاخوان الموجودين في
الصالون ؟

الشاهد - هو لما قال قول له ان الرئيس محمد نجيب سال
عليك لم يخطر في ذهننا معنى غير أنه وصل من السفر فييسال
عليه وبعدن إنا ربطت بين الحكاية دي وبين كلام ابراهيم الطيب
وان فيه اتصال بالرئيس محمد نجيب واعتقدت ان هذا معقول،
وان فيه صسالة منطقية ان واحد بيجي من السفر الرئيس
نجيب يتصل بيه .

الرئيس - جه في أقوالك في التحقيق ..

الشاهد - أيوه يا فندم

الرئيس - ان المفهوم في شعب الاخوان ان هناك اتصالا بالرئيس
محمد نجيب ..

الشاهد - أيوه يافندم .

الرئيس - انت لم تذكر هذا الكلام المحدد في أقوالك بتاعة
حادثة التليفون ..

الشاهد - أيوه يافندم .

الرئيس - كان مفهوم في شعب الاخوان ان هناك اتصال
برئيس الجمهورية

الشاهد - أيوه .. ولذلك لما سألت ابراهيم قال لي هذا
الكلام ..

الرئيس - طيب إيه اللي خلى هذا الكلام يدور في صفوف
الاخوان إيه هي الدوافع بمعنى ؟

الشاهد - كان المفروض أو اصل الخطة وان المفروض ان
يعتدى على الرئيس وعلى أعضاء مجلس قيادة الثورة ، وأن
الرئيس محمد نجيب يبقى له ((رول)) معين ..

الرئيس - ايه الصورة اللى كنت تنتظرها ؟
الشاهد - كنت منتظر أن الرئيس محمد نجيب يتكلم في
الراديو ويهدى الخواطر .. ده اللى كنت متصوره في نفسي .
الرئيس - بغرض أن عملية اغتيال الرئيس جمال عبد الناصر
نجحت ، كان حيتبعها ايه .. ايه الصورة اللى في دماغك ؟
الشاهد - كان حيتبعها محاولة الاعتداء على أعضاء مجلس
قيادة الثورة والضباط الاحرار يخطفوا او يعتقلوا ، وعلى هذا
الاساس تبقى فيه دوشة في البلد والرئيس محمد نجيب ييجي
يهديها أو يخلصها وتتكون حكومة جديدة والكلام ده برضه أنا
قلته في التحقيق ..

المدعى - تعرف صلاح شادى ؟
الشاهد - أبوه يافندم اعرفه ..
المدعى - ايه صلتك به ؟
الشاهد - أنا صلتى به .. كل صلتى به مرتبطة بانى أنا من
الاخوان وهو من الاخوان .
المدعى - ما اشتغلتش معاه في حاجة ؟
الشاهد - اطلاقا ..
المدعى - هل كان له علم بهذه الخطة ؟
الشاهد - هو المسئول عن الضباط فطبعاً لازم يكون عنده
علم ..

المدعى - ايه رايتك في الاتفاقية ؟
الشاهد - رايتى أنا شخصياً
المدعى - أبوه .. وانت رجل محامى ..
الشاهد - أنا قلت في التحقيق أن الاتفاقية لما وقعت
بالحروف الأولى ..

الرئيس - مفيش داعى للتعرض لمسائل الدولة ..
المدعى - اصل هو له رأى ثانى قاله في التحقيق وهو أنه كان
فاهم الاتفاقية فهم غلط ..

الشاهد - موجهها كلامه لسيادة الرئيس - اذا ما كنتش
سيادتك عاوزنى اتكلم فى الموضوع ده بلاش .

الرئيس - البلد مش مسئولة انها تفهم شخص فاهم غلط ..
ومفيش داعى لمعرفة رايه فى الاتفاقية ..

المدعى - ايه هو الحكم فى الاسلام .. كيف يكون الحكم
بالاسلام فى تطبيق مبادئ الشريعة الاسلامية كما ورد فى
القرآن الكريم .. الجماعة من اهدافها الحكم بالاسلام .

الشاهد - هدفها الوحيد الحكم بالاسلام .
المدعى - والم تضعوا ابحاثا عن كيفية الحكم بالاسلام زى
الدستور والقانون الخ ؟

الشاهد - ايام الاستاذ البنا طلبت منه ان يكتب فى هذا فقال
لى .. اذكر بالضبط انه قال لى ان احنا شعبنا كتب وكتابات ،
وان المكتبة الاسلامية مليانة ، وان مهمتنا مش اتنا نعمل كتب ،
بل مهمتنا اتنا نعمل رجالة ، ومعنى هذا ان هو مهمته ان يربى
الامة تربية اسلامية تنتهى بان نطبق ما هو موجود فى المكتبة
الاسلامية .

الرئيس - ما هى التربية الاسلامية ؟

الشاهد - اعداد الفرد المسلم من حيث تطبيق الواجب اللى
عليه نحو الله

الرئيس - ازاي ؟

الشاهد - الصلاة والصوم .. يعنى اعداد الناس وتفهمهم
ان الاسلام دين صالح فى كل مكان وزمان ، وتكوين الجماعة
التي تقوم على هذه المعانى .. ولما تتكون غالبية الشعب على
هذا النحو ونيجي نطبق القرآن كما كان فى ايام الرسول صلى
الله عليه وسلم يبقى معقول ومقبول .

المدعى - الحكم ازاي يكون يعنى ؟

الشاهد - يعنى شكل الدولة ؟

المدعى - شكل الدولة وقوانينها .. هذه المسائل الم يعمل لها أبحاث ؟

الشاهد - اتعمل لها أبحاث ، ولكن في شكل فردى .. أما شكل الدولة وكونه يبقى جمهورى ... ملكى ... حكم على أى صورة من الصور المعروفة لا .. ما اتعملش شيء في هذا الصدد ، وإنما الشكل كان يتحدد في صورة اسلامية تختلف عن الديمقراطية وعن الدكتاتورية وعن الشيوعية ..

المدعى - يعنى مفيش تحديد ولا نص مضبوط ؟

الشاهد - الواقع ان الاخوان لم يعدوا هذا الدستور .. وأنا قلت لحضراتكم اننى قلت للاستاذ البنا احنا عاوزينك تفضى شوية على أساس انك تكتب لنا ايه اللى يطبقه الاخوان ، واذكر انه قال في مناسبة ما ان الناس يجتمعون على مبادئ لا على تفاصيل لاننا اذا دخلنا في التفاصيل فسنختلف ونتفرع ولا ننتهى الى خير كثير ، وان احنا ماشيين على مبادئ اسلامية ، ولو تعرضنا للتفاصيل فيمكن ييجى فقيه ويختلف معنا ، وجايز نستهلك في مسائل فرعية ..

الرئيس - تستهلك لما تيجوا في الحكم .. مش كده ؟ طيب ايه شكل الحكومة اللى هى الحكومة الانتقالية اللى حتفرض حكم الاسلام وتنتظر منها ايه ؟ افرض انه حيحصل اغتيال فرد او خمسين او مائة وحيحصل هياج شعبى وبعدين ييجى محمد نجيب يهدى الخواطر ويكلف ناس علشان يحكموا .. والحكومة دى حتكون تحت وصاية الاخوان طبعا ؟

الشاهد - ايوه المفروض هذا ..

الرئيس - يعنى زى ما الاخوان يقولوا لها تمعمل وتؤهل الشعب والبلد علشان حكم اسلامى ، لان المرشد قال ان البلد غير مستعدة للحكم الاسلامى ورياسة الاخوان مفيهاش ناس او ان اغلبيتهم لا يمثلوا الاسلام ولا يعرفوش يطبقوا الاسلام .. طيب افرض ان الجهاز نجح في تنفيذ الخطة .. طبيعى هو

يرمى للوصول الى مأرب وهدف .. فايه الى كنت تنتظره من هذه الحكومة ... كانت حتعمل ايه ؟

الشاهد - آه .. الى كنت انا انتظره او يعنى زى ما كان ثابت فى ذهننا ان يعلن الدستور اللي يوضع وان تستقى مبادئه من المبادئ الاسلامية على اساس انها مبادئ يعنى صالحة لحكم البلد ، وده يعنى الاساس ..

الرئيس - دستور تستقى مبادئه من المبادئ الاسلامية على انها صالحة لحكم البلد ؟

الشاهد - ايوه يافندم ..

الرئيس - زى ايه كده ... قل لنا .. اضرب لنا مثل ..

الشاهد - الواقع ان دى كلها مبادئ ..

الرئيس - اذا كنت فاكرنى باتجنى عليك .. فمفيش مانع اذا كنت عاوز وتحب ان اى واحد من اللي قاعدين يجاوبك ..

الشاهد - لا يافندم .. استغفر الله انا ماقلتش كده ..

الرئيس - انت قلت ان ده مش متمشى مع الاسلام .. طيب يحصل ايه لما الوضع يتغير ، وتتغير الحكومة بحكومة ثانية ؟

الشاهد - من حيث ايه ؟

الرئيس - ايه النقاط المحددة .. هل اوافق مع الحكومة او

اختلف مع الحكومة .. يعنى ايه النقاط المحددة اللي تيجي الحكومة على اساسها .. مش لازم يكون فيه خط مرسوم لحكم

البلاد عاوزين نعرف ما هو هذا الخط ؟

الشاهد - مثلا التشريع الجنائى والتشريع المدنى .. التشريع المدنى يستقى كل مبادئه من التشريعات الفرنسية . وكان القانون القديم .. اقصد ان المفروض والظن ..

الرئيس - انا باسسال عن الجماعة مش عن ظنك انت .. يجوز انت تختلف مع الجماعة فيما تأتى به هذه الحكومة .. وكان موقفك موقف المعارض للاخوان المسلمين وتروح عامل

جهاز سرى ، ويبقى فيه كمان جهاز للطيب وآخر لمحمود
وهكذا .. فايه رأى الجماعة فى الموضوع ده ؟

الشاهد - رأى مثلا بدل ما تستقى مبادئ التشريع المدنى
من المبادئ الفرنسية تبقى تستقى من مبادئ (أبو حنيفة) ..
الرئيس - هل هناك مبادئ وخطط ونقط موضوعة علشان
الحكومة تيجى تشتغل على أساسها ؟

الشاهد - فى الجماعة لا ... مفيش وانما فى المكتبة
الاسلامية مخلفات الائمة الاربعة وهى فيها ما يفى بهذا الفرض
من الناحية الدينية .

الرئيس - يعنى الجماعة ما كنش عندها خطة مرسومة . ؟
الشاهد - لا ما كنش عندها .. وعلشان كده هم كانوا
بيؤخروا انفسهم ؟

الرئيس - كيف كانوا بيؤخروا انفسهم وكيف بدءوا بالعملية ؟
الشاهد - هم ما كانوا عاوزين ينفذوا الخطة فورا لانهم
كانوا خايفين لينكشفوا ..

الرئيس - طيب ما هو الفرض اللى ثار فى نفسك .. يعنى ما
هو الفرق بين الحكومة اللى حاجبوها والحكومة الموجودة ؟
ما هما الاثنين فى « الهوا سوا » ..

الشاهد - الاخوان كانوا بيتهموا بانهم عاوزين يصلوا للحكم ،
فيجوزهم عاوزين يداروا عن انفسهم هذه التهمة .

الرئيس - يعنى هم كانوا عاوزين يجيبوا حكومة صورية
تكون زى (الاراجوز) وزى المثل اللى ضرب فى جماعة الاخوان
اللى هو « وش الباترينة » بتاع الجمعية التأسيسية ..

الشاهد - يجوز ده اثر فى نفس الاخوان وترك طابع عميق
فى نفوسهم ..

المدعى - ايه رأيك فى الاسلوب الذى اتبع فى القتل .. وهل

هو يتفق مع اسس واحكام الاسلام .؟؟

الشاهد - هذا الأسلوب من حيث شرعية العمل في الإسلام محرم ، ومحرم على الإطلاق ، وإنما كيف وافقت عليه ؟ زى ما قلت لحضراتكم أنه كان من تقاليد الجماعة في أيام الاستاذ البنا القيام بمثل هذا العمل ، وعلى هذا الأساس أصبحت هذه التقاليد مستقرة .. وإنما من الناحية الإسلامية لا يجوز القتل بهذه الصورة وده اللى خلانى اهتزبت وده خلانى سلمت للحكومة بكل الحاجات اللى عندى علشان أوقف التيار الجارف من الارهاب ..

الرئيس - تقدر تقول لنا ايه القانون اللى يحكم الاخوان المسلمين ..

الشاهد - اللى يحكم جماعة الاخوان لائحة داخلية تشكل الاخوان الى مرشد عام ، وهيئة تأسيسية ، ومكتب ارشاد ، ومناطق ، ورؤساء مناطق ، .. يعنى تشكيل ادارى ... ده تشكيل العمل فى الاخوان ، وبعد كده يستقوا المبادئ من القرآن نفسه ..

الرئيس - دلوقتى كل اللى فهمناه من الاسئلة والاجوبة عليها اتنا وجدنا ان الحكم فى الاخوان يرجع الى المرشد ، وهناك جمعية تأسيسية صورية ، وجهاز سرى للضغط عليها ، وهذا الجهاز السرى الحكم فيه دكتاتورى ، والحكم الدكتاتورى مستقى من المرشد ، اذ ان نظام الجماعة كله دكتاتورى . فلنفرض - وانت شخص متعلم فى هذا النظام - لنفرض انك لاتوافق الحكومة اللى جايوها لاعداد البلاد نحو الاسلام واختلفت الجماعة ... فايه اللى يحددك من ان تنفصل او ان تذهب اى مذهب من المذاهب او ان تعمل عملا ايجابيا .. ايه اللى يحددك ؟

الشاهد - فى حالة الاختلاف سواء مع الجماعة او مع الحكومة ، المفروض لما الانسان يختلف يبقى لا يتبين وجه الحق ، فالمفروض عليه اسلاميا انه يقعد فى بيته ولا ياتى عملا معيناً

لما تبقى فيه فتنة - من حيث وجهة النظر - المفروض ان الانسان يقعد في بيته ..

الرئيس - انتم اصلا بتعتبروا الحكومة الموجودة في الحكم مش مسلمة ؟

الشاهد - ايه يا فندم ..

الرئيس - انت انت مش نفذت أوامر الجهاز السرى

الشاهد - ايوه ..

الرئيس - يعنى انت اعتبرت ان الحكومة الحاضرة والناس بتوع القيادة مش مسلمين .. بدليل انك لما اختلفت معاهم ما قعدتش في بيتك ..

الشاهد - انا اعترفت ان ده كان خطأ ..

الرئيس - انت من يوم مسلمت نفسك كنت قاعد ولكن ..

الشاهد - ده كان رأى قيادة الاخوان ، وانما يجوز راى

لا يختلف عن هذا ..

الرئيس - واذا واحد تانى اختلف رايه عن رايك ؟

الشاهد - يقعد في بيته ..

الرئيس - واذا واحد تانى ما قعدش في بيته ؟

الشاهد - يمشى تبع قيادة الاخوان ..

الرئيس - افرض انه مش موافق ..

الشاهد - ما دام مش موافق لازم يقعد في بيته ..

الرئيس - هل ده حكم الشورى بتاع الاسلام ؟

الشاهد - قطعاً دى حالة طبيعية من غير شك ..

الرئيس - الادعاء يحب يسأل حاجة .

المدعى - لا خلاص ..

الرئيس - طيب ترفع الجلسة لمدة ربع ساعة للاستراحة .

(رفعت الجلسة في الساعة الواحدة والدقيقة الاربعين

بعد الظهر) .

(أعيدت الجلسة في الساعة الثانية والدقيقة

الخامسة والعشرين بعد الظهر)

الرئيس - الادعاء عنده أسئلة ؟

المدعى - لا ...

الرئيس - الدفاع يحب يوجه للشاهد أسئلة ؟

الدفاع - لى سؤالان فقط ..

الرئيس - اتفضل ..

الدفاع - ما الذى يعرفه حضرة الشاهد عن أخلاق محمود

عبد اللطيف من حيث سرعة استجابته للتأثير عليه من عدمه ؟

الشاهد -

الرئيس - والله لو يتكرم السيد المحامى باعادة السؤال تانى ،

لانى انا نفسى مش فاهمه ..

الدفاع - ما الذى يعرفه حضرة الشاهد - بحكم الصلة بينه

وبين المتهم - ما الذى يعرفه حضرة الشاهد عن طباع المتهم

محمود عبد اللطيف من حيث سرعة استجابته للتأثير من عدمه

.. هل هو الشخص الذى له قيادة خاصة أو شخص هوائى

يسهل التأثير عليه ؟ .. أرجو ان اكون واضحا ..

الرئيس - موجهها كلامه للشاهد - فاهم السؤال ؟

الشاهد - أيوه انا فهمت السؤال ..

الرئيس - طيب جابوب عليه ..

الشاهد - أنا سبق انى قلت ان محمود عبد اللطيف بالذات

كان متحمسا لهذا العمل ، وسبق أن قررت في التحقيقات أن

محمود عبد اللطيف هو الذى اقترح أن يسافر الى الاسكندرية

لهذا العمل وان الاصل ان محمود عبد اللطيف كان سيركب

الحادث في القاهرة وهو الذى اقترح ان يسافر الى الاسكندرية

... ومعنى هذا أنه صاحب تفكير مستقل استقلالا كاملا

لا سيما وأنا أعلم أنه صاحب شخصية ولا يتأثر بسرعة وأنا بهذا لا أريد اتهمه وإنما هذه هي الحقيقة فهو شخص صاحب تفكير مستقل ويحفظ جزءا كبيرا جدا من القرآن وكان متحمسا بالذات لهذا العمل ، وأدل شيء على هذا أنه هو اللي اقترح على السفر الى الاسكندرية ، ولما قلت له بلاش مشوار اسكندرية ده يا محمود قال لى لا ، أنا عاوز أسافر اسكندرية . واعتقد أنه صاحب تفكير مستقل وأنه لا يتأثر بسرعة ..

(هنا أوما المتهم برأسه ومال تجاه الاستاذ حمادة الناحل المحامي يسر في أذنه بوضع كلمات)
الرئيس — موجهها كلامه للمتهم — اتكلم اذا كنت عاوز تقول حاجة ..

المتهم — حضرته بيقول انى كنت متحمس وأنا اللي اقترحت عليه السفر الى الاسكندرية ..
الرئيس — زعق شوية يا محمود ..

المتهم — حاضر .. أنا عاوز أقول أنه بصفته الرئيس بتاعى لو عاوزنى ما أروحشى اسكندرية ، مش حا أقدر اعصى له الأمر علشان هو رئيسى .. ولكن الحكاية مش حكاية تحمس — لو كان كده ...

الرئيس — المفهوم من كلام الشاهد أنك انت طبيعتك لك شخصية وأنت متحمس فما بالك اذا كان هناك أمر بهذا .. تبقى متحمس لهذا الأمر ..

الشاهد — ورد على هذا أنه صاحب تفكير مستقل وأنه هو اللي اقترح السفر الى الاسكندرية ..

الرئيس — يعنى هو كان متحمس للفكرة ؟
الشاهد — أيوه .

الرئيس — موجهها كلامه للمتهم — يعنى المفهوم أن الأمر صدر لك وأنت تنفذ الأمر ده ... الدفاع ...
الدفاع — أفندم ...

الرئيس - فيه نقطة أخرى ؟

الدفاع - هل كان يمكن لمحمود عبد اللطيف مش بوصفه الشخصى بل بوصفه عضوا فى النظام السرى أن يخالف الامر الذى صدر اليه ؟

الشاهد - كان ممكن يافندم .. ودليلي على هذا - وهو صادق ولو سالتوه يقول لكم اننى قلت له كده - انا قلت له ... فكر وشوف اذا كنت توافق على الفكرة أو لا ... وأقعد ثلاث ايام فكر ، وانت حر فى هذا ولك مطلق الحرية ، ولك أن تفكر ومن حقت أن تقول لا ؛ ولا ضير عليك فى هذا .. ومع هذا جاني وقال لى انامطمئن لآى عمل يصدر الى وكان من الممكن أن يخالف وان يرفض هذا الطلب ولا ضير عليه وما كنش النظام حيقتله .

الدفاع - فى حالة رفضه ، هل كان حيستمر عضوا فى الجهاز السرى رغم ترده ورفضه لما صدر اليه ؟

الشاهد - ما افكرشى .. المعقول انه هو طبعى ينحى بس عن الجهاز السرى ويظل عضوا فى الاخوان المسلمين ..

الدفاع - قلت انه كان من المفروض بعد الفوضى التى تعم أن الرئيس نجيب يهدىء الشعب بكلمة ثم بعد ذلك تتولى الامر حكومة أخرى .. من هم افراد الحكومة الاخرى التى كانت فى ذهنكم كهيئة ترونها أداة انتقال من حال الى حال .. وقد قلت ايضا أن الاخوان ماكانوش صالحين أو الظروف مش ممهدة ..

الشاهد - بس عدالة المحكمة توافق على هذا السؤال .

الرئيس - اذا حبيت تجاوب جاوب .. واذا ما حبتش بلاش .

الشاهد - بس هل هذا السؤال يخص الدفاع عن محمود

عبد اللطيف .

الرئيس - انت شاهد ولك مطلق الحرية فى ان تجيب او لا تجيب ، فاذا كنت تعترض على السؤال قل هذا أنت شاهد ولك الحرية الكاملة فى الاجابة أو عدم الاجابة ..

الشاهد - سبق انى اجبت عن هذا السؤال في معرض
التحقيقات واليوم في هذه الجلسة ، وعلى هذا الاساس فلا داعى
للتكرار وانما اذا امرتنى المحكمة ان اعيد ما سبق ان قلته فانا
مستعد لذلك ...

الرئيس - اذا حببت .. عيد الكلام ..

الدفاع - احنا سمعنا منك اسمين .. اسم على وجه التوكيد
واسم على وجه الاحتمال .. فهل دول اللى حيكونوا الحكومة ؟
حيحلوا محل مجلس القيادة ... انا باسال عن اسماء افراد
الحكومة اللى تتولى الحكم فى مرحلة الانتقال وتسيطر على شئون
البلد ..

الرئيس - هل يقصد الدفاع ان الافراد اللى كانت تحتكون
منهم الحكومة فيما بعد هذا الانقلاب اخذ رايه فيهم ام لا ..
الدفاع - نعم ... او جرى عليه نحو العرف .

الرئيس - موجهها كلامه للشاهد - هل اخذوا رايك فى هذا ؟
الشاهد - المسائل دى مايختصش بها افراد امثالنا ، بل احنا
تيجى لنا تعليمات بهذا .. وفيه اسماء انا ذكرتها فى التحقيقات
وانما هذه المسألة قطعيا انا لا اعلمها ...

الرئيس - يعنى المسألة دى ليست من اختصاصكم ..

الشاهد - أيوه .. ودى من مسئولية الناس اللى فوق على
اساس اننا نعملها كاشاعة ، لان المفروض ان المسائل الخطيرة تيجى
بهذا الشكل وتشاع على اعتبار انه كان ييجى بها الناس اللى فى
القيادة سواء وافق الافراد المختارون او لم يوافقوا ... هذا
مش من شأننا ..

الدفاع - قلت بأن بروجرامكم منذ ان تورط الجهاز السرى فى
الاطعاء كان اصلاح هذه الاخطاء .. هل كان يعاونكم لتحقيق
هذا الهدف الاعتداء اولا على الرئيس وثانيا على اعضاء مجلس
قيادة الثورة ثم ثالثا على الضباط الاحرار ... هل ده مما يوصلكم
الى هذا التطهير ؟

- الشاهد - السؤال ده متناقض خالص . . .
- الرئيس - السؤال ده يمكن يكون خارج عن الموضوع . . .
- أحنا عاوزين سؤال يتعلق بالموضوع اللي إحنا بننظره الآن . .
- الدفاع - وهو كذلك يافندم . . . أنا مكتفى بهذا القدر . .
- الرئيس - الادعاء عاوز يسأل حاجة ؟
- المدعى - لا يافندم . . .
- الرئيس - الادعاء عاوز يسأل حاجة ؟
- المدعى - لا يافندم . . .
- الرئيس - طيب . . . تؤجل الجلسة للساعة السادسة . .
- الدفاع - أنا لى طلب . .
- الرئيس - اتفضل . .
- الدفاع - إحنا لنا شاهد دفاع واحد ممكن نحضره اذا ما وافقتم عليه . . شاهد دفاع واحد هو الاستاذ الهضيبى . . علشان اذا قررتم حضراتكم احضاره يبقى يجهزه الادعاء . . وأنا اطلب سماعه كشاهد دفاع . . .
- الرئيس - هل الادعاء له اعتراض على هذا ؟
- المدعى - هو متهم وحييجى دوره . . .
- الرئيس - ليس هناك مانع، ويطلب الاستاذ الهضيبى كشاهد والآن ترفع الجلسة على ان تعود الى الانعقاد فى الساعة السادسة مساء . .
- « رفعت الجلسة فى الساعة الثانية والدقيقة الخامسة والثلاثين »
- « بعد الظهر »

محضر

الجلسة الثالثة لمحكمة الشعب

المنعقدة علنا في الساعة السادسة والدقيقة الخامسة عشرة مساءً ، بمقر قيادة الثورة في الجزيرة ، يوم الثلاثاء الموافق ٩ نوفمبر سنة ١٩٥٤ ، الموافق ١٣ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ ، الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو مجلس قيادة الثورة ، وعضوية القائمقام انور السادات ، والبكباشي (ا.ح) حسين الشافعي ، عضوى مجلس قيادة الثورة .

وبحضور البكباشي سيد سيد جاد المدعى ، والاستاذ على نور الدين وكيل النائب العام ، عضوى مكتب التحقيق والادعاء وتولى تسجيل المحاكمات بالاخترال الاساتذة : طلعت الصبان وممدوح توفيق ، وابراهيم فكرى احمد فوده مندوبو مصلحة الاستعلامات .

قدمت القضية رقم (١) لسنة ١٩٥٤ (محكمة الشعب) المتهم فيها محمود عبد اللطيف محمد (حضر المتهم)

الرئيس - فتحت الجلسة ... الادعاء

البكباشي سيد سيد جاد - المدعى - الشاهد موجود ... محمد علي نصيري .

(نودى على الشاهد)

(حضر الشاهد)

الرئيس - اسمك ايه

الشاهد - محمد على نصيرى

الرئيس - عارف ده .

الشاهد - ايوه .

الرئيس - ايه .

الشاهد - مصحف .

الرئيس - طيب قول والله العظيم والله العظيم والله العظيم

اقول الحق و لاشئ غير الحق والله على ما اقول شهيد .

(ردد الشاهد صيغة اليمين)

الرئيس - المدعى

المدعى - هل انت من جماعة الاخوان المسلمين ؟

الشاهد - ايوه .

المدعى - من اى منطقة ؟

الشاهد - انا من الزقازيق اصلا وجيت فى بين السرايات .

المدعى - لك صلة بهنداوى ؟

الشاهد - اخيرا .

المدعى - متى كانت آخر زيارة لك بهنداوى ؟

الشاهد - يوم الحادث .

المدعى - ليه ؟ . . صف الموقف لآخر زيارة ؟

الشاهد - هو كان اتصل بى وادانى مسدسين ادانى الاول

وقال لى جربه فجربته وجدته مينفعش اديته له والثانى جربته

فى ملاعب كلية الزراعة ف ضرب طلقة ولم ينفع فاعدته له فقال

لى فيه حزام فيه مفرقات ليه تامينين وشرح لى طريقة العمل به وقال لى تاخده وترتكب به جريمة فقلت له لا لا ما اقدرش اشيل حاجة زى دى وانا شمرت بان فيه حاجة خطيرة فقال على العموم انت مش مكلف بحاجة فخذ المسدس ده جربه فاخذه وانصرفت وفى المساء سمعت الخبر فى الاسكندرية وكنت ازور صديق مريض اسمه على شاهين وقبض على .

الشاهد - لماذا وقع الاختيار عليك بالذات للذهاب الى هندواى ؟

الشاهد - لا ادرى . ايام طرد محمد نجيب كنت قد اشتركت فى الحرس الوطنى وخرجنا فى مظاهرة ثم اخذنا نطالب بالكفاح المسلح ولما طلعنا الى قصر النيل البوليس اطلق علينا الرصاص وقتل اثنين من زملائنا فقلنا ان ده يبقى شىء خطير وثارت ثورة الجامعة فواحد صاحب اسمه حسين عرفنى بهندواى وطلب منى ان انضم الى مجموعة قبل الدور الثانى فقلت ما اقدرش لانى ما دخلتش الدور الاول لانى كنت مريض وبعدين دخلت قبل الدور الثانى .

المدعى - هل تذكر افراد المجموعة التى كنت تنضم اليها فى الجهاز ؟

الشاهد - ايوه السيد عواد واحمد القيوى وعلى شاهين ويوسف عليان وطلعت ابراهيم وسلامة خليل وانا وفيه واحد اظن كمان بس مش فاكر اسمه داوقت .

المدعى - لماذا اعطاك هندواى المسدس ؟

الرئيس - مين كان رئيس المجموعة ؟

الشاهد - سيد عواد

- الرئيس - شغلته ايه الجهاز ده ؟
الشاهد - كنا بنتمرن على القتال وحرب العصابات .
الرئيس - حرب العصابات ؟
الشاهد - ايوه .
الرئيس - ايه الغرض ؟
الشاهد - هو قال الغرض تكوين حكومة اسلامية .
الرئيس - مين اللي قال ؟
الشاهد - سيد عواد قال الغرض تكوين حكومة اسلامية
وطرد المستعمرين وعمل جيش .
الرئيس - هل كان كل واحد من جماعة بيدرب ؟
الشاهد - لا مش كلهم بعد ما ينضم لفترة ويلاقوه صالح
يدربوه وينضم للمجموعة .
الرئيس - المجموعة داخله في تكوين الشعب ؟
الشاهد - كلها تابعة للشعب
الرئيس - معروفة لافراد الشعب كلهم ؟
الشاهد - لا مش كلهم .
الرئيس - التنظيم ده مسمينه ايه ؟
الشاهد - التنظيم السرى
الرئيس - وغرض التنظيم السرى هو اقامة حكومة اسلامية ؟
الشاهد - ايوه
الرئيس - امال ايه غرض الجماعة كلها ؟
الشاهد - تكوين حكومة اسلامية والفرد اللي يصلح بعد
ما ياخذ دور التربية والتكوين ينضم للتنظيم
الرئيس - يعنى الجماعة معمولة علشان تكون دور تكوين
للاعضاء علشان يخشوا الجماعة السرية وايه التنظيم السرى ده ؟
الشاهد - انا دخلته اخيرا ولا اعرف قوانينه ونظمه معرفة
وثيقة .

الرئيس - الطاعة عمياء ؟

الشاهد - لا .

الرئيس - امال دخلت ازاي دون ان تعرف قانون الجمعية ؟

الشاهد - لما ادخل اعرفه .

الرئيس - لما تخش الجامعة تخش من غير ما تعرف

قوانينها ؟

الشاهد - لا اعرف القانون الاول .

الرئيس - امال تدخل ازاي جماعة سرية من غير ما تعرف

تنظيمها ، معقول الكلام ده ؟

الشاهد - لا .

الرئيس - طيب نحب انك تقول لنا الكلام المعقول . هو انت

تبقى في سنة ثانية حقوق وتدخل جماعة متعرفش قانونها ؟

الشاهد - لا يا افندم .

الرئيس - طيب قول الكلام المعقول يا تبقى بتخبى .

الشاهد - الجماعة : فيه فصايل والفصايل بتكون مجموعات

والفصيلة / ٢٨ والمجموعة فيها / ٧ افراد .

الرئيس - رئيس الجماعة بيتصل بمين ؟

الشاهد - برئيس الفصيلة .

الرئيس - ومين رئيس الفصيلة بتاعتك ؟

الشاهد - اللي كان بيزورنا واحد انا استنتجت انه رئيس

الفصيلة ولكن مش فاكر اسمه .

الرئيس - انت انضميت للجماعة امتى ؟

الشاهد - سنة ٤٩ .

الرئيس - وانضميت امتى للجهاز السرى ؟

الشاهد - قبل الدور الثانى على طول .

الرئيس - امتى يعنى فى سبتمبر فى اكتوبر ؟

الشاهد - فى اواخر سبتمبر .

الدفاع - لما ادالك هنداوى المسدس قال لك ايه ؟

الشاهد - قال لى جربه .

المدعى - علشان ايه ؟

الشاهد - مقلش .

المدعى - عرفت ان فيه خطة وضعت

الشاهد - لايه ؟

المدعى - لتحقيق فكرة الحكومة الاسلامية والا مكنتش لسه تعرف ؟

الشاهد - لا .

المدعى - والحزام تستعمله ازاي ؟

الشاهد - قال لى تربطه على وسطك وان فيه تأمينين وشرح لى طريقة العمل به .

المدعى - وتروح فين ؟

الشاهد - مقلش انا لما قلت ان دى حاجة خطيرة مقدرش اشيها قال على كل حال انت مش حتتكلف بحاجة تنفيذية ودانى المسدس .

الرئيس - طيب بعد الفصيلة اللي قلت عليها دى ...

الشاهد - ايوه رئيسها انا افكرت اسمه دلوقت اسمه سعد

زغلول .

الرئيس - د الرئيس بتاع بين السرايات ؟

الشاهد - ايوه .

الرئيس - ورئيس الجماعة بتاعتك . اسمه سيد عواد ...

طيب ورئيس الفصيلة بيتصل بمين ؟ انتم بتعملوا لحسابه ؟

الشاهد - لا لازم فيه واحد اعلى منه .

الرئيس - مين ؟

الشاهد - ما أعرفش .

الرئيس - شعبان كان معاك فى الجماعة ؟

الشاهد - لا دا فى المنطقة .

الرئيس - فى النظام السرى ؟

الشاهد - مادام بيدى اوامر يبقى فى النظام .

الرئيس - وانت تسمع كلامه على طول ؟

الشاهد - لا .

الرئيس - مش قال لك روح لدوير فرحت ؟

الشاهد - زى ما اى واحد يقول لى روح لفلان اروح . وهو

قال لى اتصل بهنداوى .

الرئيس - مقلش علشان ايه ؟

الشاهد - لا .

الرئيس - ولما رحت اتصلت بهنداوى وانت متعرفوش

وشعبان مقالش الغرض من المقابلة وهنداوى قال لك خد

طبينة وجريها مفكرتش ليه بيديك الطبينة . مائرتش فى نفسك

بعض الهواجس ؟ مفكرتش ان فيه حاجة . ؟

الشاهد - هوه يوم ما ادانى الحزام قال لى انت مش مكلف

بعمل تنفيذى واحنا باعتين ناس وراهم وقال لى انت تراقب

الحفلات بس وانت مش مكلف بتنفيذ شىء . فلما قلت له انى

ما اقدرش اشيل الحزام اللى زى ده فادانى المسدس علشان

اجربه فقلت له الدنيا ليل .

الرئيس - انت مش جربت واحد ومضربش ؟

الشاهد - لا دا الثانى والأولانى ماضربش خالص .

الرئيس - يعنى جربته . ولما ما ضربشى ادالك واحد غيره

وجربته ؟

الشاهد - أبوه .

الرئيس - وقال لك تراقب مين ؟

الشاهد - قال لى تروح الحفلات وتراقب ، وتشوف مدى

استقبال الناس والحماس اد ايه ورحت مؤتمر الموظفين وقت

اطلاق الصواريخ .

الرئيس - ايه الحماس اللى شفته ؟

الشاهد - كان فيه هتافات كثيرة وناس كثير وانا رجعت

قلت لهنداوى .

الرئيس - وهل مراقبة الهتافات تستدعى انك تشيل طبنجة ؟

الشاهد - لا وهوه قال لى وقت ماتروح ماتشيلش حاجة .

الرئيس - ما سالتش الطبنجة علشان ايه امال ؟

الشاهد - لا ماسالتش .

الرئيس - تحب تكون عاقلين شوية فى الاجابة . واحد

ماتعرفوش ورحت تقابله وادالك طبنجة علشان تجربها مانفعتش

ادالك واحدة تانية نفعت وقال لك ماتشيلشى السلاح معاك لما

تروح الاحتفالات امال تشيل السلاح امتى وليه ؟

الشاهد - قال لى خليك جاهز لما يطلب منك حاجة .

الرئيس - ماسالتش جاهز ليه ؟

الشاهد - علشان اقامة حكومة اسلامية . عندما يطلب منا

العمل .

الرئيس - ايه التعليمات الاسلامية اللى علموها لك ؟

الشاهد - حفظ القرآن والحديث .

الرئيس - القرآن قال انك تقيم حكومة اسلامية بالقتل

والسلاح ؟

الشاهد - السلاح لطرد المستعمر وطرد المستعمر يحتاج

الى سلاح ولازم تكون مستعدين لان العالم الاسلامى كله مستعمر

فلازم تكون جيش اسلامى علشان نموت فى سبيل الله وهم

عودونا ان نعد انفسنا لهذا .

الرئيس - لما رحى تقابل هنداوى دوبر قال لك ايه غير

حكاية السلاح ؟

الشاهد - اتكلم معايا عن المعاهدة وقال لى انها ضارة بالبلد

وان الانجليز ممكن يخرجوا لانهم عاوزين استقرار فى الشرق

الاوسط . واحنا دلوقت حانكون قاعده لهم وحنضر كثير جدا

لارتباطنا بالاحلاف العسكرية وحانظل مرتبطين بالشرق الاوسط

وده يضر البلاد فى حين اننا لو حاربنا الانجليز ممكن يخرجوا .

وقال كمان ان البلد موجودة في ظل احكام عرفية ومحدثش قادر يتكلم ودى حالة متسرش وشايقين الطلبة اطلق عليهم الرصاص لانهم ينادون بالكفاح المسلح للحرس الوطنى .

الرئيس - هو الحرس الوطنى الغى ؟

الشاهد - لا ماشى .

الرئيس - انت دخلت الحرس الوطنى ؟

الشاهد - ايوه .

الرئيس - دربتك الحكومة علانية او سرا ؟

الشاهد - علانية .

الرئيس - علشان تروح تنضم للجهاز السرى ؟

الشاهد - لا .

الرئيس - انت راجل في كلية الحقوق وتقدر تفكر
ونجحت وانتقلت سنة ثالثة ؟

الشاهد - لا .

الرئيس - يعنى سقطت لما اتضميت للجهاز السرى ؟

الشاهد - أنا كنت مريض .

الرئيس - مين رئيس الجهاز ؟

الشاهد - أنا أعرف ان رئيس الجماعة بتاعى السيد عواد .

الرئيس - ومين رئيسه ؟

الشاهد - ما أعرفشى .

الرئيس - يعنى ماشى عميانى كده ؟

الشاهد - لا . . . في الاول خالص ماكنشى فيه حاجه ولكن

بعد طرد محمد نجيب . قالوا مايصحش ان الرئيس يطلع ويرجع

من غير ان الشعب ما يفهم ايه المقصود من هذا وان ده يسوء الى

البلاد امام الدول الاجنبية ومصطفى البساطى في الجامعة قال

يصح انكوا تطلعوا تعبروا عن شعوركم فطلعنا ، وبعدين اطلق

علينا الرصاص . وفضلت الجامعة نائرة مدة .

الرئيس - ازاي تسمح لنفسك انك تنضم في جمعية سرية
ماتعرفش أغراضها ايه او نظامها ايه ؟
الشاهد - الغرض هو اقامة حكومة اسلامية .

الرئيس - لما انتوا ماشيين كده عميانى ليه ممشتوش ورا
الحكومة عميانى لما طلعت رئيس الجمهورية وبعدين جابتوا ؟
مش هوه ده المبدأ اللى خلاك تنضم للجهاز السرى ؟ ولا انت
بتدين بمبدأين مبدأ سرى والاخر علنى ؟

الشاهد - احنا كنا بنعمل للوطن والاسلام .
الرئيس - ايه اللى عرفك ان الحكومة دى مابتعملش للوطن
او الاسلام علشان ماتمشيش وراها ؟
الشاهد - مظاهرة الجامعة كانت للوطن . صحيح كان الشعور
ثائر لطرده محمد نجيب ولكن تحولت الى مظاهرة تطلب الكفاح
المسلح .

الرئيس - ومين اللى يقرر الكفاح المسلح ؟
الشاهد - الحكومة .
الرئيس - يعنى اللى يقرر هو المسئول .. القائد ؟
الشاهد - ايوه .

الرئيس - ليه ماخرجتوش بالنظام بتاعكم وعملتوا عمل ؟
الشاهد - احنا في المعركة كنا بتدرب في تل بسطة وحاولت
النزول للميدان ولكن فاجانى المرض .

الرئيس - انتوا كنتوا عاوزين حكومة اسلامية ؟
الشاهد - ايوه ودا احنا اعلناه في الجامعة وقلنا اننا نتعاون
مع الموجودين على قيام الحكومة الاسلامية لان مافيش حاجة
بتيجى مرة واحدة .

الرئيس - عاوزه استعداد ؟
الشاهد - الجيش موجود يراقب البلاد مراقبة كويسة
والحكومة تضع لها الانظمة وتمشى .

الرئيس - وبعدين ايه اللي غير الحال ؟

الشاهد - مافيش تغيير .

الرئيس - امال شلت السلاح ليه في الخفاء ؟

الشاهد - انا رديت له السلاح .

الرئيس - انت رديت المسدس الاول والثاني ولكن الثالث
فضل معاك ؟

الشاهد - أيوه لاني ماخرجتش من البيت .

الرئيس - شلت معاك سلاح ليه قبل الحادث ؟ وقبل
ما تعرف أن في الامر جنائية وان الامر خطير ؟

الشاهد - هنداوى قال لى خد المسدس وجربه .

الرئيس - يعنى بتشتغل مجرب أسلحة ؟

الشاهد - هوه قال لى كده وماكنتش عارف ايه اللي عايزينه .

الرئيس - تبقى انت طالب في الجامعة ودرست الدين وعرفت
أنك انت عاوز تكون حكومة اسلامية وبتقود مظاهرات الجامعة
بدون ما تعرف سببها ؟ وبتنضم للجهاز السرى وما تعرفش مين
الى يقوده وواحد يدك سلاح تجربيه وترجعاه وتانى وتالت
وترجعاه وما تعرفشى الغرض ايه ... الكلام ده لو اخوك قالهوك
كنت تصدقه ويخس دماغك ؟

الشاهد - دا اللي حصل بالضبط . ولكن في مظاهرات الجامعة
كنا فاهمين الى بنعمله .

الرئيس - كنت فاهم ايه ؟ وايه غرضها ؟

الشاهد - قالوا ...

الرئيس - مين اللي قال ؟

الشاهد - الوعي السياسى الى موجود .

الرئيس - موجود فين ؟

الشاهد - في الجامعة .

الرئيس - مع مين ؟

الشاهد - مع الطلبة .

الرئيس - طلبة ايه ؟

الشاهد - طلبة الجامعة .

الرئيس - زى مين ؟ تفكر مين منهم ؟

الشاهد - كان موجود عدد كبير منهم وهم قالوا الجيش
حيختلف مع بعضه والاحسن ان الجيش يكون موجود .
ويراقب الحكم وييجى ناس فى الحكم يراقبهم الجيش وده كان
الراى الموجود .. يعنى الجيش يوجد بره الحكم ويقوم على
الحكم افراد يراقبهم الجيش .

المدعى - ايه ميل البساطى الى انت سمعت كلامه . ؟

الشاهد - من الاخوان

المدعى - جابها منين الاوامر دى ؟

الشاهد - لازم من المركز العام .

الرئيس - يعنى من مكتب الارشاد ؟

الشاهد - ايوه وهو مقسم الى اقسام : قسم الطلبة - قسم
العمال الخ ... وهو الى يرسم السياسة .

الرئيس - ايه العلاقة بين خروج محمد نجيب وبين انكوا
تتجندوا تجنيد مسلح ؟

الشاهد - دكته فى فبراير او يناير واحنا فى ابريل دلوقت .

الرئيس - احنا دلوقت فى ابريل ؟

الشاهد - لا فى اكتوبر .

المدعى - ايه تسليح الجماعة ؟ نظامه ايه ؟

الشاهد - واحد يكون معاه طينجه وواحد يكون معاه برن
واتنين استن والباقي بنادق .

الرئيس - ايه تانى غير السلاح ده ؟

الشاهد - بس كده .

وكيل النيابة - حصل فى مارس بمناسبة المظاهرات مؤتمر
الطلبة اعلن فيه الكفاح المسلح .

الشاهد - ايوه

وكيل النيابة - يعنى ايه الكفاح المسلح ؟

الشاهد - يعنى نروح القتال .

وكيل النيابة - ايه علاقة انكوا تعملوا مظاهرة عشان محمد نجيب بالكفاح المسلح ؟

الشاهد - المظاهرة بدأت بخروج محمد نجيب وانتهت الى مطالبة الحكومة بالكفاح المسلح والنزول الى القتال .

وكيل النائب العام - وهل يكون الكفاح المسلح بعمل مظاهرة ؟

الشاهد - الغرض من عمل المظاهرة هو لتكوين الراى العام والحكومة تسمع رايه .

وكيل النائب العام - بالنسبة لهنداوى لما رحت له آخر مرة

وقال لك انت مش مكلف فسرهما شوية .

الشاهد - ساعة ما ادانى الحزام شرح لى عمل الحزام فقلت

له انا ما اقدرش اشي له فقال لى طيب جرب المسدس ده .

الرئيس - يعنى خفت على نفسك .

الشاهد - شعرت ان المسألة بقت خطيرة .

الرئيس - الحزام اخطر من المسدس .

الشاهد - لما اجرى المسدس مفيش حاجه .

الرئيس - لكن لما تجرب المسدس تروح ، فهل هذه هي

الشجاعة اللى علمها لك الدين الاسلامى ؟

الشاهد - هو ما قالش جرب الحزام انما قال لى بس خليك

دايما على استعداد ، فقلت له انا ما اقدرش اشي له حاجة زى دى

الرئيس - خفت لتتنسف بيته ؟

الشاهد - الحزام خطر على الموجودين وهنداوى قال لى احنا

باعتين ناس وراهم .

وكيل النائب العام - ايه معنى عبارة « احنا باعيتين ناس

» راهم ؟

الشاهد - هو قال لى انت مش مكلف واحنا باعيتين ناس

وراهم .

وكيل النائب العام - ورا مين ؟

الشاهد - ورا رجال الثورة .

وكيل النائب العام - لكن هندأوى أعترف انه كلفك بانك

تشيل مسدس وتستعد لضرب الرئيس جمال عبدالناصر اذا
اتاحت لك فرصة ، وان الحزام ده تلبسه ولما تقابل الرئيس
جمال عبد الناصر تبقى توصل سلكين فينسفكم الحزام .

الشاهد - هو قال لى خذ الحزام الى ان نطلبك فى عمل
تنفيذى فقلت له انا ما أقدرش أشيله .

الرئيس - مارايك فى كلام هندأوى فى انه قال لك خذ
المسدس ده عشان تقتل بيه الرئيس جمال عبد الناصر .

الشاهد - جايز عنده النيه دى لكن لم يصرح لى بيها وأنا
معرفتش منه حاجة .

الرئيس - لكن هوه صرح لك بيها .

الشاهد - ماعرفتش منه حاجة .

الرئيس - هل تعرف محمود عبد اللطيف ؟

الشاهد - لا .

الرئيس - ماشفتوش ؟

الشاهد - لا ما أعرفوش (نظر الى الجهة التى يجلس فيها
المتهم محمود عبد اللطيف)

الرئيس - دى أول مره تشوفه فيها ؟

الشاهد - ايوه .

الرئيس - انه واحد فيهم .

الشاهد - الى أعد جاره الشاويش ولازم هو ده (أشار
على المتهم) لان الى جانبه لابس كويس (أشار على الاستاذ
حماده الناحل) .

الرئيس - مفروض ان محمود عبد اللطيف لابس مش كويس

الشاهد - بعد الاعتقالات يكون لابس الواحد وحش .

الرئيس - اשמعنى انت لابس كويس ؟
الشاهد - عشان كنت قالع هدومى ولابس ملابس ثانية .
الرئيس - تعرف ايه عن رياسة الاخوان المسلمين والجمعية التأسيسية والناس اللى بيشتغلوا فيها ؟
الشاهد - طبعا المرشد هو الرئيس وفيه مكتب الارشاد والجمعية التأسيسية وبعدين فيه مناطق والمناطق تضم الشعب . هذا هو النظام .
الرئيس - ايه الحاجات اللى حصلت فى الجمعية التأسيسية ومكتب الارشاد ؟

الشاهد - يقال ان فيه راي يقول انه يجب ان نمشى مع الحكومة لانها خطوة كويسه ونساعدنا وكان فيه راي ثانى يقول انه يجب ان تقام حكومة على أسس سليمة وكان ممكن فى المعاهدة ناخذ حقوق اكثر من هذا وكان فيه خلافات على مناصب لانعرفها بالضبط ولكن هذا حسب ما سمعته .

الرئيس - هل تعرف أعضاء الجمعية التأسيسية ؟
الشاهد - بعضهم .
الرئيس - ناس كويسين ؟
الشاهد - الذى اعرفهم من جهة الشرقية ناس كويسين .
الرئيس - كلهم كويسين ؟
الشاهد - اللى عندنا فى الزقازيق فى الجمعية التأسيسية كويسين .

الرئيس - زى مين ؟
الشاهد - الشيخ احمد نار وفارس فريح مدرس .
الرئيس - بيشتغلوا ايه ؟
الشاهد - فارس فريح مدرس .
الرئيس - فين ؟
الشاهد - مدرس ابتدائى فى ههيا .
الرئيس - تعرف انه كويس ازاي ؟

- الشاهد - كان يعمل كتائب تربوية ، كان مربى .
 الرئيس - مربى ازاي ؟
 الشاهد - يربى الفرد على النواحي الاسلامية .
 الرئيس - ازاي ؟
 الشاهد - يلقي محاضرات .
 الرئيس - انت اعدت كام سنه فى سنه اولى فى الكلية ؟
 الشاهد - انا طول عمرى بانجح بس المرض هو السنه دى
 الى خلانى اسقط .
 الرئيس - والا لما دخلت الجهاز السرى سقطت ؟
 الشاهد - سقطت مره لما رحت القتال وبعد ذلك مرضت
 بالكلى ولم ادخل الامتحان بأمر الطبيب .
 الرئيس - الادعاء عايز يسأله ؟
 المدعى - لا .
 الرئيس - الدفاع عايز يسأله ؟
 الدفاع - لا .
 الرئيس - هات الشاهد الى بعده .
 المدعى - الشاهد يحيى سعيد .
 (نودى على الشاهد يحيى سعيد فحضر)
 الرئيس - اسمك ايه ؟
 الشاهد - يحيى سعيد محمود سعيد .
 الرئيس - عندك كام سنه ؟
 الشاهد - حوالى ٣٥ سنه .
 الرئيس - بتشتغل ايه ؟
 الشاهد - موظف فى مخازن مصلحة التنظيم .
 الرئيس - درجة ايه ؟
 الشاهد - باليوميه .
 الرئيس - من اد ايه موظف ؟
 الشاهد - من سنة ١٩٣٦ .

الرئيس - وقبل سنة ١٩٣٦ ؟
الشاهد - ما كنتش موظف .
الرئيس - وكنت بتشتغل ايه ؟
الشاهد - كنت باشتغل في جريدة كوكب الشرق .
الرئيس - بتشتغل فيها ايه ؟
الشاهد - في المطابع .
الرئيس - عارف ايه ده (وأشار سيادته الى المصحف) ؟
الشاهد - أيوه مصحف .
الرئيس - قول والله العظيم اقول الحق ولا شيء غير الحق
والله على ما اقول وكيل

(ردد الشاهد الحلف)

وكيل النائب العام - يا يحيى ايه معلوماتك عن جمعية
الاخوان المسلمين ؟
الشاهد - مشترك .

وكيل النائب العام - في اى شعبه ؟
الشاهد - قديما في شعبة اولاد علام بالدقى ثم نقلت الى
امبابه من ثلاث سنوات فذهبت الى اخوان امبابه وكنت في
شعبة خارطة المنيرة بامبابه جنب مدينة العمال لانى سكنت بها
منذ ثلاث سنوات تقريبا .

وكيل النائب العام - هل تعرف شيئا عن النظام الخاص في
الجماعة ؟
الشاهد - لو كانت هناك انظمة .

الرئيس - انت مشترك في الجمعية زى ما تكون في الاتوبيس
او الترامواى . قول عضو بين نوع الاشتراك !
الشاهد - اسمها كده من جماعة الاخوان المسلمين .
الرئيس - المشترك يدفع اشتراك في جهة معينة ليستفيد
منها ؟

الشاهد - انا كنت ادفع اشتراك عضوية .

الرئيس - ايه اللي ضمك للاخوان ؟

الشاهد - أحد الاخوان في المصلحة ، ذهبت معه مره واتنين .

الرئيس - سنة كام ؟

الشاهد - سنة ١٩٤٧ أو ١٩٤٨ فالحقنى بهم وكنت ساكن

في عزبة اولاد علام وكنت احضر معهم واذاكر مذاكرتهم واعمل
كما يعملون دراسات فقهية وروحية معهم حتى أزمة سنة ١٩٤٨
فحلت الجماعة وما كانش لى اى شى ملحوظ فيهم ولذلك لم
اعتقل لانى كنت بعيد وعضو جديد فى الوقت ذاته . ولما رحت
امبابه انضميت اليهم وكان لهم مقر فى المنيرة فكنت اتردد عليه
باستمرار حتى انى اعرف جميع الاخوان الموجودين فيها وكثرة
معارفى فيهم كثيرة نظرا لانى كنت قديم وكنت اتقابل بأكثرهم .

الرئيس - متى انضممت الى النظام الخاص ؟

الشاهد - لم انضم الى النظام الخاص او حاجة من هذا

القبيل .

الرئيس - ما علاقتك بهنداوى ؟

الشاهد - ليس لى به علاقة اطلاقا ولم اره سوى مرتين

اتنين لانه فى امبابه وانا فى المدينة بعيد .

وكيل النائب العام - مش تعرف ان فيه نظام خاص فى

امبابه ؟

الشاهد - سمعت هذا الكلام منذ شهرين من على نويتو
بالمنيرة ان الاخوان يعملون جيش اسلامى ويعملوا اسر وترتيبات
من هذا القبيل فكنت اسمع منه الكثير عن هذه الحاجات فقلت
له ما القصد من هذا الجيش تعملوا بيه ايه فكان يقول طرد
المستعمر من البلاد العربية . وانا تمللى يمر على على نويتو
باستمرار فى المنزل وكنت اسمع منه لانى احب اسمع كل حاجة
عنهم فقال ان هناك فكرة لانشاء جيش اسلامى وهذا الجيش
لتحرير ارض الاسلام من المستعمر - عرفت هذا منه

حوالى شهرين ولكنى لم انضم لهذه العملية نظرا لانى رب أسرة
وعندى من الاولاد اربعة .

وكيل النائب العام - ما نظام الجيش وكيف يكون فى شعبة
امبابه ؟

الشاهد - سمعت ذلك من على نويتو انهم يقسمون انفسهم
الى مجموعات كل مجموعة من سبعة افراد او ثمانية واكثر
سبعة اشخاص ويعملوهم وحدات صغيرة او جماعات صغيرة .

وكيل النائب العام - فيه فى امبابه كام مجموعة ؟

الشاهد - كان يقول لى هناك اربع مجموعات .

وكيل النائب العام - تعرف مين قائد هذه المجموعات ؟

الشاهد - كنت اعلم من على نويتو انه هنداوى دوير .

وكيل النائب العام - ما وظيفة على نويتو ؟

الشاهد - بعد هنداوى دوير على طول مساعده او الى معاه
على طول بعده على طول .

الرئيس - اسمه ايه ؟

الشاهد - مساعدا .

الرئيس - الكلمة الى ناسيها .

الشاهد - مش ناسى حاجة هو كان مساعدا هنداوى فى هذه
الجماعة .

الرئيس - يعنى الرديف ؟

الشاهد - الرديف معروف مساعدا له .

وكيل النائب العام - هل تعرف محمود عبد اللطيف ؟

الشاهد - اعرفه - اعرف محمود عبد اللطيف من زمان
وسمعت من على نويتو فى مرة من المرات انه هو وسعد حجاج
فصاوهم من النظام بتاعهم او التشكيل فأردت ان اتعرف فكان
يقول لى لان لهم مهمة وهى حراسة الاستاذ المرشد اثناء اختفائه

في المدة الاخيرة هذا ما قاله لى على نويتو .

الرئيس - المرشد اختفى ليه ؟

الشاهد - لا اعرف .

الرئيس - مش يهملك تعرف ده ؟

الشاهد - والله لا يهمنى ذلك ، وما يهمنىش اختفاؤه او

ظهوره والذي يختفى طبعاً الجبان .

وكيل النائب العام - انت بتحب تسمع فماذا سمعت ؟

الشاهد - سمعت انه اختفى بعد حادث منيل الروضة

تخاف على حياته .

الرئيس - ما هو هذا الحادث ؟

الشاهد - حصل في اثناء الصلاة في منيل الروضة مظاهرة

او حاجة من هذا القبيل وبعدها اختفى .

وكيل النائب العام - شفت محمود عبد اللطيف امتى ؟

الشاهد - صبيحة يوم الحادث جاءنى الساعة ٧ ونده فنزلت

فقال لى تسمح انا عاوز شنطه وعلى بيقول اى شنطه فقلت له

مغيش غير بتاعة ابنى الصغير وهيه ناقصة البطانة فقال لى

وريهاالى فشافها واخذها ومشى الى جهة المنيرة .

وكيل النائب العام - ما عرفتش عبد اللطيف كان رايح فين ؟

الشاهد - لا والله شأنه شأن اى اخ اعطيتها له بسلامة نية

وحسن الضمير .

وكيل النائب العام - قلت ان التنظيم اللى عاملينه بقصد

تكوين جيش اسلامى ايه اللى سمعته عن اهداف الجيش ده -

وعاوز يعمل ايه او يتخذ ايه وتشكيله في السر ؟

الشاهد - احبانا يقول لى مش في السر وهذا الجيش

الاسلامى الغرض منه طرد المستعمر من البلاد العربية وتحريرها

من الاستعمار كما يقول فكانت مهمة هذا الجيش هى انهم

يعدوا انفسهم للمحاربة في الجزائر او تونس او مراکش او في

أى بلد عربى آخر كما سافروا من قبل فى فلسطين .
وكيل النائب العام - ما سمعتم أن الجيش ده له مهمة فى مصر ؟

الشاهد - كنت سمعت من على نويتو هذا الجيش معمول
علشان ايه والقصد منه ايه وسألته هل تريدون به الحكم أو
عمل انقلاب داخل البلاد فقال لى لاما نقدرش نعمل حاجة ولا
نقدر أن نصل الى الحكم ولا بعد سبع سنين ولا نعمل شيئا الا
إذا كان الجيش أو تنظيمه اللى موجود فى قلبه يعمل وما علينا
أن نجحت الا أن تؤيدهم .
وكيل النائب العام - ازاي يعنى ويحصل ايه والخطة كانت
ايه ؟

الشاهد - اذا بدأ التنظيم اللى فى قلب الجيش وعملت عمل
أو حاجة من هذا القبيل ونجح فيها يبقى تؤيدهم .
وكيل النائب العام - هل المجموعات مسلحة ؟
الشاهد - أنا ما كنتش أسمع عن التسليح شىء لأن على نويتو
قال ما جابولناش أسلحة .

وكيل النائب العام - وإذا جت أسلحة ما الفرض منها ؟
الشاهد - والله ما كترتش عليه وكنت أخشى أن يحرم عنى
بعض الكلام فكنت أسمع منه شوية شوية .

وكيل النائب العام - مفروض تقوم هذه المجموعات بانقلاب ؟
الشاهد - المجموعات كانت تؤيد من يقومون بالحركة .

وكيل النائب العام - مين يقوم بالحركة . ؟
الشاهد - الاخوان الذين يقولون عنهم فى صفوف الجيش
وكيل النائب العام - والمدنيين فى المجموعات ؟
الشاهد - يناصروهم .

وكيل النائب العام - الا يستعملون الاسلحة التى معهم ؟
الشاهد - هوه قال يساعدوهم ويناصروهم .

وكيل النائب العام - اذا تحقق الانقلاب يحصل ايه ؟
الشاهد - في الحكم مش عايزين يغيروا رئاسة الجمهورية
الا بعد مدة ويعملوا اى رئيس وزارة زى ما يقولوا لمدة وبعدين
يصلوا فقلت له القصد امتى وتحكموا ازاي فقال لى الكلام ده
بعد مدة ولا سبع أو ثمان ستين للوصول الى هذا ، لان فيه
خطوات طويلة امامنا .

وكيل النائب العام - ما هى هذه الخطوات التى سمعتها ؟
الشاهد - البلد ما تقدرش نحكمها لانها عايزه
وكيل النائب العام - لو حصل انقلاب ماذا سيحصل ؟
الشاهد - الشعب يطالب بالاشياء التى يقولونها له .
وكيل النائب العام - شكل الحكم ازاي ؟
الشاهد - كما هو عليه مش حيزوه ، مفيش نية التغيير
دلوقتى والقرآن كما يقولون الآن الحكم به يأخذ وقت طويل فى
مرحلة سبع سنوات أو أكثر .
وكيل النائب العام - الناس الملى يتولوا الحكم مين ؟
الشاهد - مرة قالوا عبد الرحمن عزام ومرة قالوا
مش فاكروا .

الرئيس - ماهو عملك فى الاخوان ؟
الشاهد - كنت سكرتير سنة ١٩٥٠ وأعرف أكثر الاخوان
وبعدين قفلت فى مدة الشهرين فلم أعمل معهم ولأنه لم يكن لهم
مكان وبعدين جه وقال لى انت ومحمود ومحمد زكى وعبد اللطيف
انتم الاربعة تعملوا اسرة وكوناكم اسرة عشان تزودونا بالاخبار
فقلت له اخبار ايه فقال لى كل شائعة تمس الاخوان تقول لنا
عليها ونديكم حاجات تدرسوها وتقرأوا فيها وجبلى كتاب
المعذبون فى الارض فقرانه وبعد كده لم يجيبوا لنا برنامج او اى
شئ تقرأه .

الرئيس - بس المعذبون فى الارض ؟

الشاهد - هذا حصل وبعدين اجتمعنا حوالى ٣ - ٤ اجتماعات لحفظ سورة آل عمران فحفظنا ٣٠ آية على ثلاث مراحل ثم انقطعنا وانحلينا من انفسنا لانهم بعدوا عنا ومفیش میل منهم الينا اما علاقتي بعلى نويتو فكانت مستمرة فكان يمر على وكان يتكلم معى عن كل شىء .

الرئيس - يعنى سميت ان حكاية الدعوة مش ماشية ؟

الشاهد - عرفت انها كلام فارغ .

الرئيس - والحقيقة ؟

الشاهد - الحقيقة يعلمها الله . وهذا زيف وخداع وغش

ونفاق منهم والمقصود حيل لجذب الناس اليهم او شغل ظلام مش حاجة منورة .

الرئيس - علشان ايه يجذبوا الناس اليهم ؟

الشاهد - عشان يلماوا الناس حوالىهم .

الرئيس - فرحانين بالهيصه دى ؟

الشاهد - يكسبوا الناس حوالىهم .

الرئيس - بالاشتراقات ؟

الشاهد - طبعاً اقله .

الرئيس - قول لنا اذا كنت تعرف شىء عن الاشتراكات .

الشاهد - لا اعرف الا منتهى الصراحة . وانا قلت كل ما

اعرفه واى خدمة انا مستعد للافادة بيها .

الرئيس - خدمة ... مش عايزين نخدم .

الشاهد - اى حاجة يعنى اذا كانت اى حاجة مش باينة انا

قلتيا اقولها الان واقولها لاني ما عنديش شىء اخبيه .

الرئيس - رحت اول مرة قابلت هنداولى فين ؟

الشاهد - فى مكتبه مع على نويتو .

الرئيس - خدك ليه ؟

الشاهد - عشان يعرفنى بيه .

الرئيس - مش عشان يكشف عليك كشف هيئة يشوفك تليق والا لا ؟

الشاهد - هذا ما يعلمه الله وطبعاً ما اليقش لانه سألنى هل انا مدرب على النظام العسكرى فقلت له انا ما خدمتش عسكرى وما عندى وقت للتدريب فقال لى انت متزوج قلت له ايوه وعندك اولاد قلت له ايوه فلقينته تبرم وبص لعلى وعمل اشارات انى ما انفعش .

الرئيس - ما اثر هذا فى نفسك ؟

الشاهد - ما اتأثرتش .

الرئيس - ايه الاخبار بتاعة الشعب انلى كنت بتودىها ؟

الشاهد - والله مفيش حاجة ...

الرئيس - مش كنت عامل ضابط مخابرات ؟

الشاهد - ولا ضابط ولا حاجة ... ده الى عمله ، قال يعنى بينظم اما الحقيقة اللي كان يقول لى ، هات اخبار او اى حاجة ... وفيه واحد اسمه حمزة الجوهري ، فانا كنت رحت مع زميلى اللي اسمه حمزة الجوهري .. رحت معاه وشفت الاستاذ البهى الخولى ووجدت الجماعة التانيين اصدق وحضرت جلساتهم مرة واثنين .. مرة فى مسجد السرفاعى ومرة فى مسجد الحسين ومرة فى المركز العام .. انا رحت هناك يوم الثلاثاء - يوم الحادث وغادرت المركز العام الساعة ثمانية وثلاث تقريباً وكانوا موجودين بعد المحاضرة نفسها ..

الرئيس - انت قلت فى الاقوال بتاعتك ان على نويتو كان يقول لك كل حاجة خاصة بالنظام السرى

الشاهد - ايوه ..

الرئيس - قل لنا كل حاجة خاصة بالنظام السرى . ؟

الشاهد - انا قلت ده فى التحقيق ..

الرئيس - احنا ملناش دعوه بالتحقيق .. احنا عاوزين

نسمع هنا كل حاجة من اول وجديد .. قل لنا كل حاجة
قالها لك عن النظام السرى .. يعنى عاوزينك تقول لنا الحكاية
من الالف للباء ..

الشاهد - اولاً هو ما كلمينش عن كلمة النظام السرى على
اعتبار ان ده معناها الفصائل السرية ، بل على اساس ان
الفصيلة تتكون من سبع افراد تقريباً .. كل مجموعة تتكون
من سبع افراد يبقى سبعة فى اربعة بثمانية وعشرين واحد .
و كنت اساله هل فلان منهم او ضمتوه يقول لا .. او فلان ده
منهم يقول ايوه .. وبالطريقة دى عرفت اكثرهم ..
الرئيس - تقدر تقول لنا عن اسمائهم .. هه .. توكل على
الله وقل لنا عنهم ..

الشاهد - على طول مفيش حاجة .. انا كنت قلت بعض
اسماء منهم زى محمد رهونى .. سعد حجاج .. على نويتو
طبعاً .. حامد نويتو .. عبد الخالق او الحاج عبد الخالق فى
امبابة .. عبد المنصف البحرى .. عبد القادر سلمانى ..
صلاح خليفة .. محمود الصياد .. عبد الحى ابراهيم ..
اظن .. وكثير بس مش قادر اتذكرهم الا اذا سمعت اسمائهم
الرئيس - لا احنا مابقولش ..

الشاهد - اصلى مش قادر احصر الاسماء كلها ..

الرئيس - انت ذاكرتك زى الحديد ..

الشاهد - لا والله .. (ضحك) ..

الرئيس - تقدر تقول لنا الاقسام بتاعة الناس دول ، ده جاى
منين وده جاى منين ؟

الشاهد - منين ازاي ؟ لاما اعرفشى .. انا اعرف خطط ،
لان المعلومات ما كانتش بتجبنى صح فى الحقيقة ..

الرئيس - طيب لما لقيت الجماعة كلها ماشية كده ؟
اتصلت بهم ليه ؟

الشاهد - انا انقطعت عنهم قبل الحادث بشهر تقريبا ..

الرئيس - ليه ؟

الشاهد - علشان لقيت أحسن منهم .. لان دول كانوا ناس
بتوع شغل الظلام والاختفاء ..

الرئيس - مين دول ؟

الشاهد - الهضيبي وشلته ..

الرئيس - دول بتوع شغل الظلام والاختفاء ؟

الشاهد - ايوه ..

الرئيس - ايه شغل الظلام والاختفاء ده . ؟

الشاهد - اللي يختفى ده معناه ايه ؟

الرئيس - تفكر انت ايه ؟

الشاهد - أفندم ؟

الرئيس - تفكر انت ايه ؟

الشاهد - اللي يختفى هو ده اللي بيعمل في الظلام ، هو
الى كان يبت الدعايات في الشعب والحاجات الى كان بيعملها
ضد الحركة ، والشهرة والتشهير والكلام الفارغ الى كنا
ينسمعه

المدعى - هل تعرف عبد المنعم عبد الرؤوف ، وما معلوماتك
منه ؟

الشاهد - تاني يوم عيد الاضحى الماضي اخذنى على نويتو
صباحا الى منزل مصطفى الوردانى بالمنيرة وكان غائبا في بلدته
.. ده مصطفى الوردانى .. ودخلت فوجدت شخص متوسط
وحليق وقاعد يشوح على ترايبزه بعلب كبريت مناورات حربية
وييدرس فيها وبعدين انا مارضيتش اقول ده مين ولا حاجة ..
ولكنه قال لى ده الضيف أو الأسد . فقال لى انت ما شفتش
الشكل ده في المركز العام قبل كده ، قلت له لا فقال لى ده عبد
المنعم عبد الرؤوف وبعد كده قال لى الضيف منى .. ده كان

رابع أو خامس يوم عيد الاضحى الى فات بالضبط فصورته في ذهني لاني قعدت معاهم اكثر من ساعة .

الرئيس - ايه الحاجات الحربية اللي كان بيشرحها ؟

الشاهد - والله ما فهمتش منه الا انه كان عامل أمشاط

كبريت وقاعد مرصصها على تراييزة اكل كبيرة .

الرئيس - مين ؟

الشاهد - الضيف نفسه ..

الرئيس - وكان بيشرحها لمين ؟

الشاهد - كان موجود اربعة من اللي ذكرت أسماؤهم ..

الرئيس - تقدر تذكر لنا أسماؤهم تاني ؟

الشاهد - اعرف منهم حسن عبد المنعم وعلى نويتو واتنين

تانيين مش متذكر حقيقة مين هم .. وهو كان قاعد يشرح لهم

وكان يرتدي بيجامة على فائلة بحملات .

الرئيس - الم تسمع عن على نويتو ؟

الشاهد - سمعت انهم كانوا في كرداسة مقيمين في معسكر

للتدريب ..

الرئيس - تدريب ايه ؟

الشاهد - في المعسكرات بتاعة الاخوان للتدريب وكان موجود

فيها عبد المنعم عبد الرؤوف ..

الرئيس - تدريب روحى يعنى ؟

الشاهد - لا .. ده تدريب جبل .. تدريب عسكري في

كرداسة ، وبعدين هاجمهم البوليس وهربوا وما مسكوش حد

.. واللى قال لى الكلام ده على نويتو بعدها بأسبوع او اكثر ..

الرئيس - انت عندك معلومات كويسة اوى عن الجهاز

السرى من على نويتو .. فايه شغلة الجهاز ده في الجمعية ؟

الشاهد - الحقيقة اللي أنا افهمه عنه انه زى ما قال لى في

الاول .. قال لى دى فصائل او نواة جيش اسلامى .. ده

الاصل الحقيقى الى انا فاهمه ، اما انه جهاز سرى فهذه كلمة ثقيلة على سمعى ..

الرئيس - والجيش الاسلامى ده ايه كانت علاقته ؟

الشاهد - علاقته بايه ؟

الرئيس - بجماعة الاخوان ..

الشاهد - جماعات ..

الرئيس - يعنى كل واحد يقدر يتطوع فى هذا الجيش ؟

الشاهد - لا .. كانوا هم بياخذوا ناس مخصوصة ..

الرئيس - باعتبارك عضو فى جماعة الاخوان وهى تقوم بعمل نواة جيش اسلامى ، وهذا الجيش غير معلوم لدى جميع الناس ، وبishtغل من تحت الارض .. ما تعرفش ايه هى علاقة الجيش ده بهذه الجماعة الى انت عضو فيها ؟

الشاهد - والله ده الى سمعته منهم ..

الرئيس - موقفك انت .. تعتقد ايه .. شفت ايه ؟

الشاهد - اعتقادى ان هناك فيه شىء فى الظلام .. ان هناك غموض ..

الرئيس - تعتقد مين الى بكون هذا الجيش ؟

الشاهد - والله كان على نويتو بصفته هو الى ماسك العملية دى فى امبابه اصلا ، اما هنداوى فمالوش اتصال بها ..

الرئيس - غير يوم الكشف ..

الشاهد - ماحصلش علاقة تانية .. وعلى نفسه كان بيتكلم وفى دردشة الحديث قال لى يعنى انى اشتراك .. اما كونى اشتراك ..

الرئيس - قال لك ان فيه فضائل حتكون ، وهذه الفضائل فيها جماعات ..

الشاهد - ما قاليش غير دول الى حضرتهم فى امبابه ..

- الرئيس - يعنى نواة الجيش الاسلامى بدأت فى امبابه ؟
 الشاهد - امبابه دى حاجة من ضمن ..
 الرئيس - من ضمن ايه ؟
 الشاهد - من ضمن الجيش الاسلامى .. لما يطلبوا منهم فى
 امبابه يقوموا يكونوا ..
 الرئيس - مين اللى يطلب منهم ؟
 الشاهد - الاخوان نفسهم ..
 الرئيس - مين الاخوان دول .. انت ؟
 الشاهد - الاخوان اللى اعلى من على وهنداوى ..
 الرئيس - مين هم دول يعنى ؟
 الشاهد - الكبار بتوع الاخوان ..
 الرئيس - مين ؟
 الشاهد - الهضيبى وشلتة .. هو فيه حاجة تتعمل من غير
 ما يعرف عنها رئيسها او المسيطر عليها .
 الرئيس - لازم يعرفها رئيسها ؟
 الشاهد - لازم يعرف بها ده المعتقد ودى الحقيقة ..
 الرئيس - دى الحقيقة ؟
 الشاهد - ايوه لازم يعرف .
 الرئيس - مين هم الناس المتصلين بالهضيبى وبرياسة
 الاخوان ؟
 الشاهد - هنداوى .. وهنداوى يدى لعلى ..
 الرئيس - بواسطة مين ؟
 الشاهد - انا ماعرفش التسلسل ..
 الرئيس - انت تعرف على وهنداوى وبعض الاسماء التى
 ذكرتها .. وبعدين السلسلة من اول هنداوى لحد المسئول
 الحقيقى اللى هو الهضيبى .. ما تعرفش حد ؟

الشاهد - لا ..

الرئيس - خالص ؟

الشاهد - لا ..

الرئيس - تعرف انه كان فيه ناس ؟

الشاهد - اعرف من على انه كان يقول دايم ان المسئولين

يلفونى هذا ..

الرئيس - يعنى انت كنت واثق ان العملية مش من بنات افكار

على او هنداوى ؟

الشاهد - مش معقول انها تكون من بنات افكار على او

هنداوى .. لازم تكون من فوق خالص اعلى من على وهنداوى .

الرئيس - باعتبارك عضو فى الاخوان ، مين اعلى جماعة فى

جماعة الاخوان ؟

الشاهد - مكتب الارشاد على طول ..

الرئيس - ومين رئيس مكتب الارشاد ؟

الشاهد - الرئيس بتاعه هو الهضيبى اللى هو رئيس جماعة

الاخوان نفسها ..

الرئيس - افترض مكتب الارشاد لم يوافق على رأى

الرئيس ؟ .

الشاهد - يبقى العبرة برأى المكتب وما يهمش الرئيس ..

وله الحق انه يشيله ..

الرئيس - اختلف معاه وما شالوش ؟

الشاهد - لازم يقر كلام المكتب والهضيبى واحد من ضمن

اللى فيه .. وده اللى افهمه من نفس القانون .

الرئيس - يعنى مكتب الارشاد هو المسئول عن نواة الجيش

والا الهضيبى ؟ .. انت قلت الهضيبى مرة ومكتب الارشاد

مرة ..

الشاهد - الهضيبي بعلمه ، اما المكتب فهو مختص بالتنفيذ
في كل شيء ..

الرئيس - الادعاء ... يحب يسأل حاجة ؟

المدعى - لا .. مفيش حاجة .. بس عاوز اعرض على الشاهدة
الشنطة ..

(وهنا اشار البكباشي سيد سيد جاد الى شنطة اخرجها من
بين الاحراز الخاصة بالقضية وقال للشاهد) :

المدعى - دى شنطتك ؟

الشاهد - ايوه يا فندم ..

الرئيس - دى من غير بطانة ..

الشاهد - ايوه من الداخل .. مش كاملة ..

الرئيس - ايه الخطة اللي قال لك عنها على نويتو ؟

الشاهد - عن ..

الرئيس - خطة الاخوان .. فيه خطة قال لك عليها نويتو ..

خطة يقوم بها جماعة الاخوان بتاعة عمل انقلاب ..

الشاهد - سبق ان تكلمت في الحقة دى امام سيادتكم ..

الرئيس - معلش .. قول لى مرة واتنين وتلاته يمكن

لكون ذاكرتى ضعيفة ..

الشاهد - معلش حاضر .. الخطة انهم يكونوا جيش

اسلامى فى قلب الاخوان هذا الجيش يتكون من فصائل

ووحداث او جماعات ، وبعدين الغرض منه تحرير البلاد

العربية من المستعمرين .. امثال الجزائر وتونس والبلاد

العربية ...

الرئيس - انا باتكلم عن خطة الانقلاب اللي كنت قلت عليها ..

الشاهد - انا باقول له ايه يعنى الجيش ده .. هل انتم

مالكوش هدف آخر للجيش ده ؟ او ايه يعنى لازمة هذا

الجيش .. او انتم عاوزين تغيروا الحكم ؟ فهو كان يقول لا ..
احنا لنا تنظيماتنا الخاصة وتشكيلاتنا في كل حنة ، ولما نعوزا
نعمل حاجة زى دى ، ماعلناش الا ان تؤيد الجيش او الحركة ،
لانهم هم ما يقدروش يقوموا بحاجة زى دى ..

الرئيس - جاء فى كلامك فى التحقيق ردا على السؤال الاتى :
الم يذكر لك على نويتو ماهى الخطة التى يسعى النظام
لتنفيذها ؟ .. فكان لك جواب والجواب بتاعك كالآتى ..
الشاهد - اتفضل ..

الرئيس - الجواب بتاعك كان كالآتى : - ان يقوم الاخوان
جميعا بعد تدريبهم على اوسع مدى عسكريا بعمل انقلاب وهم
آلاف يريدون ان يتموا اعداد انفسهم تدريبييا وتسليحا جيدا
وبمعاونة تشكيلات الاخوان داخل الجيش ورجال البوليس ،
وانتظارا لاشارة البدء بهذه الخطة يقوم النظام السرى الموجود
فى الاخوان بتأييد الانقلاب الذى يبداه البوليس والجيش ،
وذلك باحتلال المنشآت العامة ، وبعد ذلك يستولى الاخوان على
الحكم بشرط انهم ...

الشاهد - ايوه ...

الرئيس - فاكركلام ده ؟

الشاهد - صح ..

الرئيس - الكلام ده مضبوط ؟

الشاهد - ايوه ..

الرئيس - اذن كنت تعرف ان هناك نظام سرى ؟

الشاهد - مش جيش ، بل جيش اسلامى ..

الرئيس - تقدر تكمل لى بقية الكلام ده ؟

الشاهد - ايوه .. سيادتك جيت وقت لغاية ما يقوم

الاخوان ...

الرئيس - ويحتلوا المنشآت العامة .. ايه هي المنشآت العامة ؟

الشاهد - يعنى يساعدوا الجيش فى توطيد الحركة نفسها ، وبعد كده يجيبوا حد تانى من غير الاخوان ليمسك الحكم .. منهم أنفسهم ..

الرئيس - مين ؟

الشاهد - اى حد من الناس اللى يثقوا فيهم ..

الرئيس - زى مين ؟

الشاهد - حاجة زى عزام .. حاجة من هذا القبيل ، ومحمد نجيب قالوا يبقى مكانه وبعدين نشيله لاننا مش راضيين عنه .. يعنى فيه بينهم وبينه حاجة زى كده .. مش عاوزينه اما هم يصلوا الى الحكم .. لسه .. فيه مراحل بعيدة كى توصلهم الى الحكم المزعوم ..

الرئيس - ومحمد نجيب بعد ما يخلوه فى رئاسة الجمهورية يشيلوه ليه ؟

الشاهد - مش راضيين عنه ..

الرئيس - ويخلوه فى الاول ليه ؟

الشاهد - عشان الشعب او حاجة زى كده ... زى ما قال لى . يستنوا عليه شويه وبعدين يغيروه .. وانا ما غيرتش من اقوالى ..

الرئيس - يعنى يضحكوا عليه .. يلفوه تحت باطهم وبعدين يتركوه .. ده اسلام ؟

الشاهد - برئت من ذلك ..

الرئيس - برئت من الاسلام ؟

الشاهد - لا من ذلك .. فالاسلام نور ولا خفاء فى الاسلام ..

الرئيس - مافيهش كذب او نفاق ؟

الشاهد - لا ...

الرئيس - ولية فضلت في الجماعة دي من سنة ١٩٣٦ ؟

الشاهد - لما أراد الله انى اروح مع الجوهرى واسمع الفريق الآخر والاستاذ البهى الخولى في مسجد الرفاعى ، واسمع عن المرشد وعن انهم فصلوا وفصلوا ، بدأت انتظم في سلوكهم وانقطعت عن الجماعة ...

الرئيس - ايه الاستعداد اللى كانوا يعملوه علشان حركة الانقلاب ؟

الشاهد - تدريب اتقسم في الجيش الاسلامى ..

الرئيس - ايه التسليح بتاع الجماعة ؟

الشاهد - تسليح الجماعة .. كان يقول انهم حيجيبوا لكل جماعة في فصيلة طنجتين ومدفع وثلاث بنادق ..

الرئيس - مدفع ايه ؟

الشاهد - مدفع رشاش ..

الرئيس - تعرف اسمه ؟

الشاهد - اى نوع من هذه الانواع ...

الرئيس - كان عندهم اسلحة ؟

الشاهد - والله ما شفتش .. حقيقة الامر ان على كان يغضب ويقول لى باستمرار . ما جابولناش اسلحة علشان التدريب .. وبعدين قال انهم جابوا طنجتين ..

الرئيس - امتى الكلام ده ؟

الشاهد - من اكر من شهرين .. وبعدها انا طبعى لم اساله في حاجة من هذا القبيل ، سوى يوم الشنطة بالليل ، كان مارر على وكنت انا جاى من المركز العام الساعة تسعة فقال لى حصل حادث .. حصل كذا وكذا ، فقلت له يا على انت بعث محمود ياخذ الشنطة منى وما كان منى الا انى لظمت على وشى ،

واترمت على الارض ، وقلت له كده تفشنى .. حرام عليك
خربت بيتى .. ده عندى اولاد صغار ووالدتى ..

الرئيس - ايه اللي يخلى على نويتو يضع سره فيك ؟

الشاهد - لكل شخص ان ياخذ واحد او حد يقدر يتكلم

معاه ، فكان على يجالسنى لقربى من بيته وكان كثير التردد على

.. فلما كان يشطخ كده والا كده كان يتردد على ..

الرئيس - الادعاء ...

المدعى - مفيش حاجة ...

الرئيس - يوم مؤتمر الموظفين كنت فين ؟

الشاهد - انا ما عنديش تذكرة وكنت فى البيت .. كنت

قاعد امام البيت ، وجيرانى يشهدوا بذلك .

المدعى - مؤتمر الموظفين كان سابق على الحادث .. كان يوم

الخميس ..

الشاهد - والله لم اغادر البيت اطلاقا نظرا لانى كنت تعبان

وأعصابى تلفانة عقب الحادث ..

الرئيس - ليه ؟

الشاهد - لانى من بعد ما عرفت حكاية الشنطة قلت كفايه

الرئيس - انا باسالك عن مؤتمر الموظفين .. كنت فين يوم

الحادث ؟

الشاهد - (يفكر قليلا) عاوز اتذكر ..

الرئيس - عاوز تتذكر ايه ؟

المؤتمر ده ؟

الشاهد - سيادتكم بتقول ان مؤتمر الموظفين كان قبل

كده ..

الرئيس - (موجه كلامه للسيد المدعى) سيبه يتكلم ..

الرئيس - علشان الحادث ؟

الشاهد - سيادتك بتقول ان ده كان قبل الحادث .. اذا كان المؤتمر قبل الحادث فانا لم انتقل من البيت .. بس انا عاوز اتذكر كان يوم ايه ..

الرئيس - يوم مؤتمر الموظفين ؟

الشاهد - أيوه .. علشان اتذكر ، علشان أوضح الحجة دى .. كان يوم ايه من الايام اللى قبل الحادث .. يوم الخميس او الاربعاء ، علشان اقدر اقول بالضبط انا كنت فين فى الحصة دى بالذات ..

الرئيس - تعرف واحد اسمه ابراهيم الطيب ؟

الشاهد - محامى فى مكتب عبد القادر عوده ..

الرئيس - شغلته ايه ؟

الشاهد - محامى .

الرئيس - فى الاخوان بيشتغل ايه ؟

الشاهد - ما اعرفشى ..

الرئيس - هو عضو فى الاخوان ؟

الشاهد - انا اعرف انه من الاخوان من زمان ..

الرئيس - من الناس البارزين ؟

الشاهد - ليس لى علاقة به ، نظرا لانه فى وادى وانا فى وادى آخر ..

الرئيس - هو فى اى وادى ؟

الشاهد - انا اصلى فى امبابه مش فى مصر ..

الرئيس - امبابه بتاعتنا دى ؟

الشاهد - أيوه ..

الرئيس - امال مش فى مصر يعنى ايه ؟

الشاهد - اقصد يعنى مش فى وسط القاهرة ..

الرئيس - هل قابلته ؟

الشاهد - قابلته مرة مع على نويتو لغرض .. كان هذا الغرض من ثلاثة أشهر ، كان قال لى على أنا سانتظرك فى ميدان الاوبرا ، وبعدين طلعتنا ورحنا على المكتب بتاعه ، فعلى خبط على الباب ، فطلع لنا ولقيته لابس نضارة ، وهو شاب صغير .. قعدوا يتكلموا مدة طويلة وبعدھا على قال له أن يحيى اللى فى مخازن التنظيم مع حمزه الجوهرى ، ويظهر ان حمزه ده من الجماعة اياهم ..

الرئيس - من الجماعة اياهم يعنى ايه ؟

الشاهد - يعنى من الجماعة المختلفين مع الاخوان ..

الرئيس - حمزه ده اللى اخذك ووداك لابراهيم الطيب ؟

الشاهد - حمزه ده اللى رجعتى للاخوان .. يعنى فصلنى من الاخوان وودانى مع الاخوان التانيين البعيدين عن الهضيبي ..

الرئيس - الاخوان كانت منقسمة الى قسمين ؟

الشاهد - ايوه .. قسم مع الهضيبي ، والقسم الآخر مع الاستاذ صالح ع شماوى والاستاذ عبد الرحمن البنا والاستاذ البهى ..

الرئيس - الادعاء .. فيه اسئلة ؟

المدعى - مفيش ..

الرئيس - والان ترفع الجلسة للاستراحة لمدة نصف ساعة .

(رفعت الجلسة فى الساعة السابعة والدقيقة الخامسة والاربعين مساء)

اعادة الجلسة

(اعيدت الجلسة في الساعة الثامنة والنصف مساء)

الرئيس - فتحت الجلسة .. المدعى .. الشاهد الذي

المدعى - عبد الحميد البنا .

(نودى على الشاهد فحضر)

الرئيس - اسمك ايه ؟

الشاهد - اسمى عبد الحميد البنا .

الرئيس - بتشتغل ايه ؟

الشاهد - عامل بمصلحة العامل بوزارة الصحة .

الرئيس - سنك كام سنة ؟

الشاهد - ٢٤ او ٢٥ سنة .. - ٢٥ سنة .

الرئيس - تعرف ده ايه ؟

الشاهد - ايوه .. مصحف .

الرئيس - قول والله العظيم والله العظيم والله العظيم اقول

الحق ولا شىء غير الحق والله على ما اقول وكيل .

(ردد الشاهد صيغة اليمين)

الرئيس - المدعى

وكيل النيابة - ايه علاقتك بالاخوان المسلمين ؟

الشاهد - من الاخوان يافندم .

وكيل النيابة - فى اى شعبة ؟

الشاهد - وراق العرب .

وكيل النيابة - من امتى ؟

الشاهد - بقالى حوالى تسعة اشهر .

وكيل النيابة - انضميت للنظام ؟

الشاهد - ايوه يافندم .

وكيل النيابة - وازاي انضيمت .. وليه .. قول للمحكمة ؟

الشاهد - من مدة شهرين حضر على نويتو وقال احنا
عاوزين منكم امرة تحفظ سورة آل عمران وتفسرها .. وكنا
نجتمع كل اسبوع ونحفظ ثلاث آيات وتفسرهم .. وبعد
ثالث اجتماع على نويتو قال لى انتقل من الشقة الى انت فيها
لاننا عاوزين اودة ثالثة فانتقلت من الشقة الى انا فيها لاني
متزوج جديد الى شقة مكونة من اودتين وجه على نويتو ومعه
واحد ماعرفوش .. وقمت اعمل لهم الشاي وعبال ما عملت
الشاي كانوا بيتحدثوا مع بعض فقال لى الاودة دى بتساعة
الفرش والاودة الثانية ليست بتطبخ فيها .. فقلت له ايوه ..
فقال لا المكان مايصلحش وبعد كده بعشرة ايام او اسبوع ..
ارسل لى على نويتو سبت وطلع منه حاجات ورصها في صندوق
وقال لى دى حاجات فاضية ماتخافشى منها .. وبعدها
باسبوع ارسل لى اخوه حامد نويتو ومعه شنتل قماش فيها
قطعتين وقاللى على اخويا قال لى حطهم جنب الحاجة الثانية
.. ويوم السبت قبل حادث الرئيس كنت مريض فارسلت
خطاب للمصلحة للكشف الطبى على ولما علموا الاخوان زارونى
يوم الاثنين وصلاح خليفة كان ضمن الى جم هم وعلى .. جم
زارونى .. فعلى قال له مفيش حاجة وصلت المنطقة لحد
دلوقتى . فقال له صلاح لا .. وانا حاولت الاتصال بعلى
ماعرفتش .. وبعد مامشيوا بنصف ساعة ارسل لى على
اخوه حامد فقال لى احنا عاوزين عشر ظروف من صنف الظرف
ده .. فقلت له انا ما اعرفشى .. فدخل نقاهم من الحاجات
الى كانوا جايينها .. الكلام ده يوم الاثنين .. ويوم الثلاثاء
قبل حادثة الرئيس الساعة ثمانية الاثلاث جاب ظرف من
الصنف ده واخذ عشرة تانيين .. وبعد ذلك يا حضرة الرئيس

لم يتصل بى حامد أو على وأنا مريض وملازم الفراش لحد ماجت مباحث الجيزة وقبضت على واخذت الحاجات .

وكيل النيابة - امتى جابوا الاسلحة ؟

الشاهد - قبل الحادث .. فى سبعة اكتوبر تقريبا بعد ما سكنت فى الشقة بحوالى ٩ ايام .

وكيل النيابة - انت فى مجموعة رئيسها مين ؟

الشاهد - صلاح خليفة .

وكيل النيابة - ايه غرض المجموعة ؟

الشاهد - والله يا حضرة الرئيس ما اعرفش .. وهما

قالوا المطلوب حفظ سورة آل عمران وتفسيرها .. واجتمعنا مرتين وحفظنا بعض آيات ..

الرئيس - المجموعة دى كانت علنية او سرية ؟

الشاهد - علنية .. وكنا بنجتمع فى بيت أحد الاخوان ..

الرئيس - الشعبة كانت تعرف ؟

الشاهد - ابوه والتعليمات كانت حفظ القرآن .

الرئيس - والسبت .. كانت الشعبة تعرفه ؟

الشاهد - لا على قال لى ما تفهمشى لواحد من الاخوان ودى

حاجة ما يعرفهاش الا انا وانت وهنداوى .. ولحد الآن ما

حديث من الاخوان يعرف عنها اى حاجة .

وكيل النيابة - ما سالتش ايه الغرض ؟

الشاهد - قال دى حاجات كلها فاضية ومتخافش .

وكيل النيابة - كانت ازاي ؟

الشاهد - حاجات ملفوفة فى ورق جرايد .

وكيل النيابة - شكلها ايه ؟

الشاهد - كانت ملفوفة فى ورق جرايد .

وكيل النيابة - مفتحتهاش ؟

الشاهد - هو رصها بإيده في الصندوق .
وكيل النيابة - ما قالكش انها خطيرة ؟
الشاهد - لا هو قال كلها قزاين فاضية متخافشي منها .
وكيل النيابة - عرفت امتى انها اسلحة ؟
الشاهد - لما ضبطت .

وكيل النيابة - مش قبل كده جه حامد واخذ عشرة اظرف .
الشاهد - ايوه عرفت ان فيها ظروف لما جه ومعه اظرف
وقال عاوزين من الصنف ده . . وفك علبة من اللعب واخذ
ا اظرف .

وكيل النيابة - شفت ايه ؟
الشاهد - لفف محبوسة في الصندوق .
وكيل النيابة - ما شفتش قنابل وقوالب جلجنايت .
الشاهد - لا ما شفتش . . هي كانت ملفوفة في ورقها زى
ما هي .

وكيل النيابة - ضبط عنده خمس قنابل يدوية من طراز
ميلر . . و ١١ انبوبة حارقة وقوالب مواد متفجرة ولغم متفجر
وحزام دمور بشريط فيه ١٠ اصابع جلجنايت . . وبين المجموعتين
حجر بطارية واجهزة للتفجير ومدفعين وادواتهم و ٣٤٦ طلقة
من عيار ٩ مللى من نوع الطلقات التى استعملت في الحادث .

الرئيس - اول اجتماع حدث امتى ؟
الشاهد - بقاله حوالى ٤٥ يوم . .
الرئيس - كان فين ؟
الشاهد - في منزل عبد القادر حنفى سلمان .
الرئيس - مين حضره ؟
الشاهد - كل المجموعة .

الرئيس - اتكلمتم في ايه . ؟

الشاهد - حفظنا ٤ آيات من آل عمران .

الرئيس - ما تكلمتوش في حاجة خاصة بالاتفاقية ؟

الشاهد - جالنا منشور بعنوان لن تمر الاتفاقية .. وجه

منشور خاص بالرئيس محمد نجيب وأنه طلب ان يطلع على
المعاهدة وما وافقوش .. وفيه شوية كلام كمان وانا راجل
عامل ما افهمش .

الرئيس - صلاح ما قلش الاتفاقية بطالة وله طعن عليها .

الشاهد - صلاح سأل عن المنشور اللى بعنوان لن تمر

الاتفاقية فلماذا الاتفاقية حتمضى .. فقال على احنا الاخوان
المسلمين ٢ مليون يا اما ياخذوا براينا يا اما ما ياخدوش .

الرئيس - وبعدين .

الرئيس - وبس .

الرئيس - لما سألتو صلاح احنا فايدتنا ايه ...

الشاهد - صلاح ؟

الرئيس - او على فقال لكم انتم جماعة احتياطى .

الشاهد - سأل صلاح على فقال انتم جماعة منظمينكم

ومفيش حاجة جات لنا عنكم .. استمروا في القرآن والتفسير
لان دوركم لم يأت .

الرئيس - انت قلت في التحقيق انه قال لكم يا اما تشاركوا

اولا ...

الشاهد - نشترك في ايه ؟

الرئيس - مش ده كلامك وقلت انك قلت لصلاح انكم غير

مدربين عسكريا .

الشاهد - نعم يافندم .. حضرتك عايز تقول ايه ؟

الرئيس - حضرتي عاوزك تتكلم .. وانت مش قلت له احنا مش مدربين علشان ايه ؟

الشاهد - مش انا اللي قلت له .

وكيل النيابة - ما قالش صلاح خليفة او على نويتو ان فيه خطة ضد الحكومة لمنع توقيع الاتفاقية او القيام بعمل .

الرئيس - ما قالش انتم جيش اسلامي تعتمد عليه الجماعة وقت الحاجة .

الشاهد - هو قال لي احنا ٢ مليون ياما ياخذوا براينا اولاً .

الرئيس - الجماعة اللي كانت بتقعد برئاسة صلاح كانت بتعمل ايه ؟

الشاهد - احنا اجتمعنا ثلاث اجتماعات ... اجتماعين حفطنا فيهم قرآن وفي الاجتماع الثالث جانا المنشور بتاع لن عمر

الاتفاقية وبعدين الاجتماع اللي فيه المنشور بتاع محمد نجيب .
الرئيس - مين اللي كان مدرب عسكرياً ؟

الشاهد - صلاح خليفة ومحمد الفريثلي وصفوت سيدهم وانا .

الرئيس - وانت اتدربت فين ؟

الشاهد - في معسكر الحرس الوطني .. قعدت حوالي ٢٦ يوماً .

وكيل النيابة - انت قررت في التحقيق ان المفروض ان السلاح سيستعمل في تكوين جيش اسلامي في الثورة الشعبية اذا تلقى

الاوامر بذلك .

الشاهد - ازاي ما اعرفني السلاح وازاي اقول كده واقول انه حيسعمل في ثورة .

الرئيس - انت قلت في مرة ثانية اننا كنا في منزل عبد القادر سلمان وكان صلاح معاه منشورات في الشنطة ووزع علينا هذه

المنشورات وفهمنا هذه المنشورات وان فيها عدة بنود .. البند الاول ان الاخوان مستعدين للقيام بثورة شعبية وانهم حيعلموا زجاجات عادية تعباً بمواد وتلقى اثناء المعركة وفيه اخوان مستعدين بالسلاح .. هذا الاجتماع قبل الحادث بأسبوع - وقلت ان على نويتو قال ان شاء الله ثورة موفقة وان صلاح قال ازاي الاسلحة مجتش للآن .. احنا مفيش عندنا اسلحة ولا سكاكين .. فاذا اعتقلت نعمل ايه .. فقال نهرب واذا ما قدرتوش يضع الواحد كل حاجة في بيته من اثاث خلف الباب لمنع الدخول حتى ياتي باقي الاخوان للمساعدة وضرب البوليس .. مشده كلامك .. ما تطولش معانا خرينا نخلص .. مش دي اقوالك اللي انت ماضى عليها قول الكلام اللي انت عايز تقوله .

الشاهد - على نويتو قال كده لما حضر المنشور الاخير وفيه منشور صغير وبتسالة الاخوان عليه .

الرئيس - لما انت عارف كده ماتتكم .

الشاهد - قالوا له ازاي حتقوم بثورة شعبية واحنا ما عندناش حاجة .

الرئيس - ما قالش علشان ايه الثورة الشعبية . ؟

الشاهد - قال حتيجي الاوامر من المنطقة .

الرئيس - علشان ايه .. ؟ انت مش عضو في الاخوان وهو

قال حتعملوا ثورة شعبية ما سالتش ليه ؟

الشاهد - ما سالتش .

الرئيس - فيه واحد ينضم لثورة شعبية ما يعرفش غرضها ..

انت معذور يا ابني انت عامل .. ويمكن كمان تجهل القراءة والكتابة .

الشاهد - والله صحيح .

الرئيس - كنت بس بتشيل اسلحة ؟

الشاهد - قالوا ان فيه ثورة شعبية وافقت عليها الجماعة وطبعاً مش حتشترك الا لما تيجى الاوامر ..

الرئيس - انت مش عارف تتكلم .. كنت بتحفظ دين لزاى .. وكنت بتحفظ آل عمران لزاى ؟

الشاهد - كنا بنحفظ ٧ او ٨ آيات فى الاسبوع .

الرئيس - عارف معنى الايات اللى انت حفظتها ؟ تقدر تقول لنا آية واحدة منها ؟

الشاهد - زى ايه ؟

الرئيس - حاجة من الحاجات اللى حفظتها .

الشاهد - زى ايه ؟

الرئيس - الادعاء فيه اسئلة تانية ؟

المدعى - حد طلب انك تحتفظ بزجاجات فاضية فى بيتك ؟

الشاهد - على قال كل واحد يحفظ زجاجتين فاضيين .

المدعى - علشان ايه ؟

الشاهد - معرفش .. وواحد قال ان كان على القرايزنشتري

ماية او مائتين - فقال ان كان يحصل شرا بلاش .

الرئيس - مين اللى كان بيحجب المنشورات ؟

الشاهد - على نوبتو .

الرئيس - ومين تانى ؟

الشاهد - وصلاح خليفة .

الرئيس - اتفقتم انكم تسموا انفسكم بغير اسماءكم الحقيقية ؟

الشاهد - لا ..

الرئيس - تعرف محمود عبد اللطيف ؟

الشاهد - ايوه .

الرئيس - تعرفه منين ؟

الشاهد - من اخوان امبابه وجالنا فى حفلة الفطار فى رمضان

الى فات .

الرئيس - تعرفه من امتى ؟

الشاهد - من ٧ - ٨ شهور

الرئيس - صاحبه ؟

الشاهد - لا .

الرئيس - انت متبرى منه ؟

الشاهد - انا ما اعرفش حتى بيته .

الدفاع - انت كنت فى الجهاز السرى بتاع امبابة .. كان

مددكم كام ؟

الشاهد - انا من الوراق وما اعرفش حاجة عن الجهاز السرى

الدفاع - قالوا لكم جيش اسلامى ..

الشاهد - احنا مجموعة وراق العرب .

الدفاع - برياسة مين ؟

الشاهد - صلاح خليل

الدفاع - وهنداوى تعرفه ؟

الشاهد - رئيس المنطقة فى امبابة .

الدفاع - المجموعة بتاعتكم كام ؟

الشاهد - سبعة .

الدفاع - تبقى احدى المجموعات .

المسئ - هل تذكر السبب فى تسليح المجموعة ؟

الشاهد - ما حصلش تسليح .

(انصرف الشاهد)

(مثل الادعاء البكباشى ابراهيم سامى جاد الحق والاستاذ

عبد الرحمن صالح)

الرئيس - الشاهد الذى يليه .

المسئ - السيد عبد الله الرئيس

(نودى على الشاهد فحضر)

الرئيس - اسمك ايه ؟

الشاهد - السيد عبد الله الرئيس

الرئيس - سنك كام سنة ؟

الشاهد - ٢٦ سنة .

الرئيس - بتشتغل ايه ؟

الشاهد - طالب في كلية الاداب .

الرئيس - في سنة كام ؟

الشاهد - في آخر سنة .

الرئيس - قل والله العظيم والله العظيم والله العظيم اقول الحق ولا شيء غير الحق والله على ما اقول شهيد .

(اقسم الشاهد اليمين)

الرئيس - المدعى .

وكيل النيابة - هل انت عضو في جماعة الاخوان المسلمين ؟

الشاهد - نعم انا عضو في جماعة الاخوان المسلمين ؟

وكيل النيابة - منذ متى ؟

الشاهد - منذ سنة ١٩٤٦

وكيل النيابة - في اى شعبة انت ؟

الشاهد - في شعبة بين السرايات .

وكيل النيابة - هل ما زلت بها ؟

الشاهد - نعم

الرئيس - الى الان ؟

وكيل النيابة - الم تكن في منطقة اخرى ؟

الشاهد - لا .

وكيل النيابة - مالكن اى نشاط في شعبة اخرى ؟

الشاهد - لا .

وكيل النيابة - ألم تكن في وقت ما في منطقة عرب جهينة ؟
الشاهد - نعم .

وكيل النيابة - ماذا كنت تعمل بهذه الجهة ؟

الشاهد - كنت أعمل في النظام السرى للاخوان المسلمين .
وكيل النيابة - اشرح هذا النظام للمحكمة .

الشاهد - حينما كنت في شعبة بين السرايات وحدثت مشكلة الاستاذ المرشد العام وبعدين رحنا عند المرشد العام نسأله عن سبب فصل عبد الرحمن السندى وزملائه عاتبنى شخص يدعى محمود يونس عن هذا العمل وتعرفت به والحقنى بالنظام السرى فى عرب جهينة وكنت أعمل مع سبع اشخاص وزارنا فى عرب جهينة ابراهيم الطيب وقال لنا فى هذا الاجتماع اننا سننخذ موقف ايجابى من الحكومة فسالته لماذا سننخذ هذا الموقف فقال لأحد سبيين عشان نعرفل المعاهدة من ناحية ومن ناحية ثانية اذا الحكومة حلت الاخوان ننخذ هذا الموقف الايجابى فبدأت أفكر من ذلك الحين فى هذه السياسة ثم بعد ان غادر ابراهيم الطيب عرب جهينة جاء الحاج محمود يونس وقال ان فيه تنظيم جديد سرى سيعمل للفصائل والجماعات وكل فصيلة من اربعة اشخاص والجماعات من ثلاث اشخاص مقاتلة وقال لى انت تبقى قائد الفصيلة وبعد ذلك كلفنى ابراهيم الطيب ان اجرد الاسلحة الموجودة لدى الاخوان المسلمين وفى هذه الاثناء بدأت أفكر لماذا هذا العمل وجردت الاسلحة الموجودة فى عرب جهينة وكفر حكيم والدقى وهناك وجدت اسلحة فى الدقى اثار انتباهى لماذا توجد فى شقة وسط القاهرة ؛ كل هذه الاشياء اثار انتباهى ، وكلفت بنقل اسلحة الى حلوان والمعادى فنقلتها فعلا وبدأت أفكر جديا فى هذه السياسة فكتبت

خطابا الى ابراهيم الطيب ليرفعه الى الاستاذ المرشد عن هذه السياسة وناقشت الامر من وجهة نظرهم ووجهة نظرى وخرجت بالثلاث نتائج الآتية :-

الاولى - الا نتخذ موقف ايجابى من الحكومة وان نقول رأينا فى المعاهدة رأى حر وان تكون المعركة معركة رأى .
والثانية - الا يكون رأى الاخوان رأيا ملزما لاننا لسنا اغلبيّة فى البلاد .

والثالثة - ان هناك فترة انتقال حددتها الحكومة وستنتهى وبعدها سيجرى انتخابات وسيُعقد مجلس النواب وفى الحياة الدستورية المتبع ان القوانين التى تصدر فى غيبة البرلمان تعرض على أول برلمان يعقد فلو اخذنا اغلبيّة فلا مانع ان نقول رأينا فى المعاهدة بصراحة ولم ازد فى هذا الخطاب عن هذا . ثم رد على ابراهيم الطيب عن طريق حسين شعبان وقال لى هل انت مستعد لتنفيذ غير ما ارسلته فى خطابك . فاثارتنى هذه العبارة فقلت له فى الخطاب الاخر الذى ارسلته الى ابراهيم الطيب اننا لا يمكن ان يكون هناك رأى ولا يناقشه احد ، ولا بد ان نناقش الامور بالحب والصفاء ونخرج بحل يشرف الدعوة ويحفظ هذه الدماء التى ستسيل واصريت على مقابلة الاستاذ المرشد لشرح الموقف وقلت له فى اخر خطاب انى اعتكف فى المنزل حتى اقابل الاستاذ المرشد ثم اعتقلت فى ٤ اكتوبر سنة ١٩٥٤
وكيل النائب العام - متى بدأ التنظيم الجديد للنظام السرى فى الجماعة ؟

الشاهد - منذ حوالى خمس شهور .
وكيل النائب العام - وما هو الغرض من التنظيم الجديد ؟
الشاهد - لغاية ما اعتقلنا لم يقل لنا احد الغرض منه ، وانما فهمت ان التطور الطبيعى للنظام السرى للاخوان المسلمين هو

معلقة المعاهدة أو ان نتخذ موقف ايجابى اذا حلت الحكومة
الاخوان .

وكيل النائب العام - ماهو الغرض من التنظيم الجديد في
الفترة الاخيرة ؟

الرئيس - تنظيم الجهاز السرى .

الشاهد - هو كان استمرار أو اعادة تنظيم جديد .

الرئيس - اعادة تشكيل .

الشاهد - لم يقال لنا الغرض من ذلك .

الرئيس - ماهو الغرض الذى تستهدف به الجماعة من ايجاد
النظام السرى - انت قلت فى صدر الكلام انك احد أعضاء الجهاز
السرى فباعتبارك مشترك فيه ماهى الاغراض من وجوده ؟

الشاهد - حينما عدت من فلسطين كونونا الى مجموعات ، كل
مجموعة من خمسة أشخاص ولم نعرف من سنة ١٩٤٩ او اواخر
١٩٥٠ لغاية ماذهبنا الى معركة القنال اننا من الجهاز السرى الا
عند سفرنا الى القنطرة لمحاربة الانجليز ، فى هذه الليلة فقط عرفنا
اننا من الجهاز السرى للاخوان - والله على ما أقول شهيد - وحينما
عدنا بقينا فى هذه المجموعات . وانا كشاب لم افعل فى حياتى
ما يضر بلدى ولم اكن اتصور الا حينما بدأت الاسلحة توزع اننا
سننتخذ موقف ايجابى أو ان الشعب سيجارب بعضه ولم اكن
اتصور مطلقا هذا وبدأت افكر فى هذه السياسة ثم بعد ذلك
بدأت اعارضها بكل شدة .

وكيل النائب العام - وضح للمحكمة اجزاء الفصيلة التى كنت
ترأسها فى عرب جهينة يعنى اسمها ورؤساء المجموعات وما تعلمه
من الاعضاء بصفتك كنت قائد لهذه الفصيلة ؟

الشاهد - لقد وضحت هذا فى التحقيق وسأذكر ما تذكره الان .

انا كنت قائد الفصيلة ورديفى محمد الديب وكان قائد الجماعة الاولى شخص يدعى سيد ناصر وقائد الجماعة الثانية محمد سليمان الهضيبي وقائد الجماعة الثالثة احمد الصاقورى وقائد جماعة الخدمات امام حجر وهناك اشخاص آخرين مذكورين فى المحضر .

وكيل النائب العام - ذكرت الان احمد الصاقورى وسيد ناصر وامام حجر وقلت اسماعيل سليمان الهضيبي . فهل كان اسماعيل الهضيبي احد رؤساء المجموعة الرابعة او له وظيفة اخرى ؟
الشاهد - وظيفته مخزنجى وقائد جماعة المخابرات .
وكيل النائب العام - فمن اذن قائد الفصيلة الرابعة ؟
الشاهد - محمد سليمان انا ذكرت سيد ناصر ومحمد سليمان واحمد الصاقورى وامام حجر

وكيل النائب العام - وما وظيفة امين درويش مأمون ؟
الشاهد - سيد ناصر اخذوه مننا وجاء مأمون درويش مكانه .
وكيل النائب العام - هل تعرف افراد هذه المجموعات وفى هذه المنطقة بالذات ؟

الشاهد - انا قلتها فى التحقيق واذكر منهم محمد امام ابراهيم وسعيد عماره وعبد الوهاب البحرى وعبد السلام عماره ورضوان عزام زريق ومحمد بدر الدين قصبى وسيد المشتولى واحمد شعلان ودول اللى فاكرهم مع انى ذكرت ١٨ اسم فى التحقيق .
الرئيس - مين اللى جند دول ؟
الشاهد - محمود يونس .

الرئيس - هل كان يرأس هذه الفصيلة قبلك ؟
الشاهد - احنا قسمناهم مع بعض ولا اعرف هل كانت هذه الفصيلة موجودة قبل هذا اولا ؟
الرئيس - من الذى جمع لك هذه الاسماء ؟

الشاهد - محمود يونس .

الرئيس - وراح فين بعد كده ؟

الشاهد - كان اسماعيل عارف هو الذى يعطينا الاوامر لانه كان المسئول عن الاتصال بقيادة الفصائل .

وكيل النائب العام - والقيادة لمين ؟

الشاهد - لابراهيم الطيب وهو اتصل بى شخصيا . وانا بلغت عن جميع المخازن وقادة الفصائل التى اعرفها وذلك بعد ان اقتنعت انه لابد من حقن الدماء وخشية ان الشعب يضرب فى بعضه .

الرئيس - ولما تريت على الفصيلة ما عرفتش ايه واجباتها ؟
الشاهد - كنا بتتدرب ولم يصدر لنا اى امر والله على ما اقول شهيد ، اما ما هى مهمتنا او جنعمل ايه فحتى ان اعتقلنا فوالله والله على ما اقول شهيد لم يرد علينا بجواب وهذا مما دفعنى على ان اكتب هذا الخطاب الذى كتبتة .

وكيل النائب العام - انت بررت وجود النظام السرى قبل الثورة فما معنى وجود سرية هذا النظام المسلح فى عهد الثورة ؟ خاصة وقد اعيد تنظيمه منذ ٥ شهور كما ذكرت ؟

الشاهد - انا كمواطن طبعا لى عقل افكر وطبعا لم اعمل او افعل ما يضر بلدى ولن افعل ما يضر بلدى وهذا مما دفعنى الى الاعتراف على من اعتدوا على سيادة الرئيس واعتقدت انهم « يلبخوا » حينما سألت عن هذه الاشياء وقتلها بصراحة ، والذى كنت افهمه هو اننا نخدم البلد وقد نحارب الانجليز وقد .. وقد .. وقد ..

وكيل النائب العام - اذا تمشيننا معك بالرغم من انك خرجت عن السؤال ومع اعتقادك ان الغرض من وجود النظام السرى هو محاربة الانجليز ، فهل قصرت الثورة فى حق البلد من هذه الوجهة

حتى يستلزم الامر وجود نظام سرى مسلح في جماعتكم ؟
الشاهد - تنظيم الفصائل كان موجود قبل المفاوضات ، وعلى
اية حال رأى الاخوان كان رأى جماعى وقالوا اننا غير موافقين على
المعاهدة انما مش رأى افراد ولا اعتقد ان الثورة قصرت في حق
البلد .

وكيل النائب العام - انت مش عارف ان فيه تدريب للحرس
الوطنى فهل كان هذا التدريب سرى او علنى وسمح فيه لكل
الافراد بالاندماج ، وهل كانت هناك استعدادات للمعركة اذا لم
يتم الاتفاق اولا فما الذى دعاكم الى انشاء هذا النظام السرى ؟
وخاصة في العهد الاخير الذى وضعتموه ؟ ألم تكن هناك
مفاوضات كانت على وشك الانتهاء بالاتفاق فما المقصود اذا من
عمل مثل هذا الجهاز السرى ؟

الشاهد - انا في هذا برضه كمواطن كنت احب الخير لبلدى
ومش معقول اشترك كما ذكرت في شىء يضر بلدى .
الرئيس - ماهو هدف الاخوان المسلمين الذى من اجله وجدت
النظام السرى ؟

الشاهد - ذكرت فيما قبل ان ابراهيم الطيب قال حاجتين
وهى اننا سنحارب الانجليز ونعزل المعاهدة والثانية اذا الحكومة
حلت الاخوان فنتخذ منها موقف ايجابى وانا شخصيا لم اوافق .
الرئيس - كان جماعة الاخوان تبلورت في شيئين الاول
اذا ما كانش فيه معاهدة يبقى ماكانش فيه اخوان مسلمين لان
الاخوان هدفهم عرقلة المعاهدة .

الشاهد - الجماعة لها رسالة وهى نشر الاسلام .

الرئيس - وجهاز سرى .

الشاهد - الحالات التى يجوز شرعا فيها قتل المسلم هى

الزنا ..

الرئيس - لا داعى لهذا لان احتنا شنفنا الى علموه لكم عن الاسلام انما انا باسال هل تعليم الاسلام يكون بواسطة انشاء جهاز سرى مقسم الى فصائل ومخابرات واسلحة وجهاز سرى ومخازن تجرد ورئاسات وسرية هل هذه هى الدعوة الاسلامية ؟
الشاهد - لا

الرئيس - اذن ما هو الغرض من ايجاد هذا النظام باعتبارك انك اخ مسلم ومتعلم وانت من رؤسائه ، فليه هذا النظام كان موجود في هذه الجماعة ؟

الشاهد - انا فهمت الآن انه غلط وفهمى قبل كده كان خطأ .

الرئيس - قل لنا فهمكم قبل الآن كان ايه ؟

الشاهد - الى كنت فاهمه ان هذا النظام لمصلحة الوطن لحرب الانجليز او اى حاجة بعيدة عن البلد ولم اكن افهم اطلاقا اننا نضر البلد .

الرئيس - اذا كنت عايز تحارب الانجليز فما هى الفكرة في انك تعمله جهاز سرى، مكنش علنى ليه ؛ مع ان فيه منظمات عملتها الحكومة علنية زى الحرس الوطنى ، فليه السرية ومتى تجوز ؟

الشاهد - السرية تجوز كما علمت من التاريخ وانا شاب في قسم التاريخ بكلية الاداب انها تجوز للثورة او اى شىء من هذا القبيل .

الرئيس - لتغطية موقف ، وهذا الموقف غير مصرح به فايه الموقف الى عاوزين تغطوه ؛ هل هو دعوة الدين اظن مفهش هذا هل هو محاربة الانجليز برضه مش عاوز تغطية فاذا كان لا هذا ولا ذلك فايه هو الموقف الى انتم عاوزين تغطوه ويحتاج الى السرية وانت متعلم وفي الليسانس قسم التاريخ قل لنا ما الداعى

واحنأ نحب نسمع بقدر ماتفرضه عليك تعاليم الاسلام من
صدق وامانة .

الشاهد - انا كما ذكرت من قبل يجوز انا كنت فاهم غلط .

الرئيس - مين فهمك غلط ؟

الشاهد - قيل لنا حينما كنت في المجموعات انا نستعد
لمحاربة الانجليز في القتال وفي النظام السابق كل الشعب خرجت
الى القتال فاطمئنت الى انا نعمل لمصلحة الوطن .

الرئيس - حرب القتال ما كانش فيها سرية وكنتم بتمونوا
بالاسلحة وكانت الاسلحة الى بتروح لكم بدل ما توردها
القتال كنتم تخزنوها .

الشاهد - والله انا لا اعرف شيئا عن هذا وانا مكنتش لغاية
حركة القتال اعرف اني في النظام السري .

الرئيس - انت مكنتش تعرف انك في الجهاز السري وبعد
ما عرفت .

الشاهد - بعد هذا فهمونا انا بنعمل لمصلحة البلد وخرجنا
قبل هذا الى محاربة الانجليز في القتال .

الرئيس - ايه مصلحة البلد دي . حاجة تتاكل او تشرب
عاوز اعرف ايه معنى كلمة مصلحة البلد اشرح لى ايه مصلحة
البلد ومدى انطباق هذا على التنظيم السري المسلح وايه الدعوة
الاسلامية هذه الاشياء الثلاثة لا يمكن فكهم من بعض فيبينهم لى .
الشاهد - ... (لا يجيب)

وكيل النائب العام - اذن سأتلو اقوالك الآن امامك وهي التي
قلتها في التحقيق امس فقد سئل عما هي أهداف هذا
النظام السري المسلح والذي لم ينشأ الا منذ خمسة شهور
فاجاب « بأن ابراهيم الطيب عندما زار شعبة جيهينة وكان

هناك الصاقورى ومحمد سليمان الهضيبي وأمين درويش في منزل اسماعيل الهضيبي بعد العصر قال اننا يمكن نتخذ اجراءات ايجابية ضد الحكومة لعرقلة الاتفاقية التي كانت المفاوضات جارية بشأنها وكذلك اذا حلت الحكومة الاخوان نتخذ ضدها اجراءات ايجابية لذلك صدرت بعد ذلك تعليمات التي بلغها لنا محمد يونس بتشكيل الجهاز السرى المسلح فلما اردت ان استفسر منه عن معنى الاجراءات الايجابية فأفصح وقال تعرقل اتمام الاتفاقية وذلك اما بضرب الانجليز او عمل ثورة مسلحة للقضاء على الحكومة الحاضرة » .

اظن الاهداف حددها ، (موجها كلامه للشاهد) هل هذه اقوالك ؟

الشاهد - ايوه

الرئيس - انت قلت في الخطاب الذي ارسلته الى ابراهيم الطيب « انه اذا لم يكن هناك قوة في الجيش او البوليس فان مأساة سنة ١٩٤٨ ستكرر لان الشعب دائما مع القوى ولا وعى له ولا نضوج وفي رايي اذا كان الوعى في داخل نفوسهم فانه لا يتعداه الى الخارج لذلك فهو سيقف موقف المتفرج ويصفق للغالب » هذا الكلام الذي ورد في خطابك تقدر تفسره لنا وما كان يدور في خلدك عند ما ذكرت القوة التي في الجيش او البوليس .

الشاهد - انا كان غرضي الاول من ارسال هذا الخطاب ان يكون هناك ود بين الحكومة والاخوان وما يكنش فيه حزازات .

الرئيس - لكن هذا يتنافى مع ما قلته في هذا الخطاب من انك عاوز تعمل بينك وبين الحكومة معركة راي حروان تقول بكل صراحة رايك وتحمل نتائجه ؛ هذا اولا وثانيا اقريت ان هناك معركة بينك وبين الحكومة ولكن عاوز تقلبها الى معركة راي حر

ومش عايز تبدأ بالعدوان .

الشاهد - كان غرضي الا اعتدى لان الاسلام لا يقر الاعتداء .

الرئيس - يعنى انت مش عايز تبدأ بالعدوان الى ان تكون

قوة في الجيش او البوليس حتى لا تتكرر مأساة سنة ١٩٤٨

يعنى يا استاذ يابتاع الاداب ان ده مش مسالمة . يا اخوانا
شوية منطق بين لنا بصراحة وببساطة .

الشاهد - قلت لحضرتك قبل هذا سبب كتابة هذا الخطاب

من وجهة نظرى حيناً او من وجهة نظرهم حيناً آخر وهو الا
يكون هناك صدام هذا كل الذى اقصده من كتابة هذا الخطاب .

الرئيس - لكن هذا ينفى كلامك في رابعاً وهى ان « القوة التى

في ايدينا لاتكفى في رابع لاجداث شىء كبير وقد تؤدى بعض

الاعمال ولكنها لن تستمر ان لم يكن كما قدمت آنفاً - لنا قوة

في الجيش او البوليس » دى وجهة نظر مين ؟ لان ساعة تقول

دى وجهة نظرى وساعة تقول وجهة نظرهم ، عاوزين نعرف دى

وجهة نظر مين فيكم ؟

الشاهد - الواحد لما يعرف نفسه ضعيف يجب الا يدخل

معركة وقلت لحضرتك بعد هذا انهم عايزين يعملوا معركة

مسلحة اذا الحكومة حلت جماعة الاخوان المسلمين .

الرئيس - آه .. معركة ايه اللى انت عايز تدخلها مع الحكومة

الشاهد - اذا الحكومة حلت الاخوان .

الرئيس - تحلها ليه . ليه منتظرين الحل ؟

الشاهد - انا افرض فرض ؛ وكل هذا الفرض فرضته بينى

وبين الله والله لم اقصد الا كده والله ما اقصد شىء ابداً .

وكيل النائب العام - تمشى شوية في اهداف الجهاز السرى

قلت ان فصيلتك التى تراسها انها تتلقى الاوامر من ابراهيم

الطيب عن طريق اسماعيل عارف . فهل يتصرف ابراهيم الطيب في شئون هذه الجماعة او في هذه الفصائل السرية تلقائيا من نفسه دون رئاسة ؟

لقد سألناك هذا السؤال وأجبت عليه .

الشاهد - ابراهيم الطيب لا يمكن أن يتصرف من نفسه ولا بد فيه رئاسة أعلى .

وكيل النائب العام - مين

الشاهد - لا اعرف ولا بد أن تخضع لتعليمات الاستاذ المرشد .

وكيل النائب العام - اذا اصدر ابراهيم الطيب تعليمات الى رئاسة الفصائل للقيام بحركة مسلحة فهل في مكنته اصدار مثل هذا الامر دون أن يكون معه امر من رئيس أعلى او من المرشد .

الشاهد - بحسب تسلسل القيادة لازم أخذ امر قبل هذا .

وكيل النائب العام - انت قلت في الحقة دى ان المرشد اصطدم بعبد الرحمن السندي واعلن ان لا سرية في الدعوى ؛ وانتهى الامر بفصل عبد الرحمن السندي لانه اختلف مع المرشد وأبى ان يخضع لقيادته . فما هو السر في ان يلجأ المرشد مرة أخرى الى تشكيل جهاز سرى آخر بأفراد وبنظام جديد ؟

الشاهد - السر في كده انه عاوز يسيطر على الجهاز ..

وكيل النائب العام - جهاز ايه ؟

الشاهد - الجهاز السرى .. وهو اعلن ذلك من قبل ثم فصل عبد الرحمن السندي وشكل الجهاز ..

وكيل النائب العام - ايه الغرض ؟

الشاهد - يسأل الاستاذ المرشد في هذا ..

وكيل النائب العام - انت فهمت من كده ايه ؟

الشاهد - حضرتك اقرا الكلام بتاعى ..

وكيل النائب العام - قل انت الكلام ده .. اذكر الكلام الى قلته في التحقيق ..

الشاهد - يجوز انى نسيت الكلام ده من امبارح لغاية النهار ده ..

وكيل النائب العام - انت مش نسيت ؛ بل انت قلت هذا الكلام فى جو بعدما شربت حوالى عشر كوبيات ميه .. (ضحك) .. بعد ان يعلن على الملأ ان لا سرية فى الدعوة ، لماذا يلجأ الى تنظيم سرى وبأسلحة اخطر من الاول ؟

الشاهد - لازم له اهداف .. يسأل هو فى هذا .. انا يمكن اقول ظن ، وانما هو عنده الخبر اليقين ..

الرئيس - جاء فى كلامك لابراهيم الطيب ، لقد حدد الامام الشهيد العدد الذى تدخل به المعركة كما قرره رسول الله صلى الله عليه وسلم وهو اثناسر الف ؛ وقال المرشد فى المؤتمر الخامس اذا بلغ عددكم هذا فامرونى ان اخوض بكم البحار وان احارب بكم الدنيا جمعاء وانى لفاعلها .. تقدر تقولى الاتناشر الف دول تدربوهم ازاي وتسلموهم ازاي ؟

الشاهد - بس حضرتك كمل الفقرة ..

الرئيس - ده كل ما ورد فى الفقرة « ثامنا »

الشاهد - ما هو « تاسعا » تتعلق بالنقطة الى قبلها ..

الرئيس - « تاسعا » .. وفى رأى ان معاهدة تعقد ولا تعقد تمضى او لا تمضى لا يغير من سياستنا فى شىء .. انكرناها ونحن سائرون فى طريقنا الى ان تبلغ دعوتنا مبلغها من النفوس ، وحينئذ فقط تبدأ المعركة التى لا هوادة فيها . اما ان تضطرننا الظروف لدخول معركة طارئة فهذا امر مستحيل او تنفيذه يحتاج الى تفكير واخذ ورد والاتفاق .. على رأى نهائى فيه ..

الشاهد - مكتوب بعد كده ..

الرئيس - تحب اقرا « عاشرا » ؟ ..

الشاهد - ايوه ..

الرئيس - اقرا الجواب كله يعنى ؟

الشاهد - معاهش يا فندم ..

وكيل النائب العام - امال امبارح كنت بتتناقش فى ايه ؟ ..

(ضحك) ..

الرئيس - والله انا ما باشتغلشى مقرئ .. (ضحك) ..

الى كاتب الجواب ويضع خطة ويقدر موقف ، لازم يفهم معنى

تقدير الموقف بتاعه . . ومع ذلك انا حاقرا الجواب كله

علشان اخواننا المواطنين جميعا يعرفوا . . باسم الله الرحمن

الرحيم والصلاة والسلام على سيدنا محمد رسول الله . . .

تقرير عن الموقف من الحكومة الحاضرة السيد الكريم . السلام

عليكم ورحمة الله . . ربنا افرغ علينا صبرا وتوفنا مسلمين . .

ربنا وآتينا ما وعدتنا على رساك ولا تخزنا يوم القيامة . ربنا

اهدنا سواء السبيل واجعل هذا خالصا لوجهك الكريم . . اخى

الكريم . - بعد دراسة وافية للموقف الحاضر من جميع وجوهه

خرجت بعدة نتائج ، ولكل نتيجة اسباب لا يسمح الوقت

والمكان بذكرها ، اعرضها عليكم ، وعلى الله فليتوكل المؤمنون

ده تقدير الموقف بتاع حضرتك ..

الشاهد - ايوه ..

الرئيس - وعارف تقدير الموقف وتقسيمه كويس اوى ..

ده ما هواش جواب غرام عاشان تنساه . . بس انا عاوز اطلع

بالفكرة اللى تناقض كلامك اللى انت بتقولوه داوقتى . . ده

خطاب منسوخ ولم تكتبه ايام الاعتقال . بل كتبته ايام ان كنت

حرا طليقا لابراهيم الطيب وجالك رد منه ثم أرسلت له رد آخر وهو موجود كذلك ..

قل لنا بأه ايه الغرض من تكوين جهاز سرى فى الجماعة ..
انت اقريت ان هذا مش للاسلام . واقريت بأنه للانجليز
والانجليز مش عاوزين سرية ، يبقى كان سرى ليه ؟

الشاهد - يبقى احنا وقعنا فى غلط ..

الرئيس - كويس .. كان يتبع مين هذا النظام ؟

الشاهد - كان يتبع الاستاذ المرشد ..

الرئيس - هل كان يجوز او هل يجوز ان يقوم هذا النظام
بأى عمل بدون علم الاستاذ المرشد اللى هو يتبعه هذا
النظام ؟

الشاهد - اللى افهمه مش ممكن طبعا ..

الرئيس - لمين رياسة هذا النظام اللى بيشتغل مع الاستاذ
المرشد ؟

الشاهد - لا أعرف ..

الرئيس - تعرف ابراهيم الطيب ؟

الشاهد - كمسئول عن منطقة القاهرة ..

الرئيس - كام منطقة فى القاهرة ؟

الشاهد - ذكرت انتى اتصلت بهم وبلغت عن اسمائهم ، وأذكر
وعرب حلوان ومصر القديمة ووسط القاهرة والجيزة والعباسية
وعرب جيهنة وبلغت عن اسمائهم ومخازنهم وضبطت ..

الرئيس - قل لنا من باب المثال .. عرب جيهنة كان لها فى
المخازن ادايه ؟

الشاهد - ده مدون فى كشف ..

الرئيس - يعنى مش فاكرو ؟

الشاهد - يعنى مثلا .. كان فيه مثلا بنادق كاملة وبنادق غير كاملة .

الرئيس - بنادق غير كاملة ؟

الشاهد - يعنى من غير دباشك ..

الرئيس - عددها كام ؟

الشاهد - حوالى ١٧ بندقية كاملة .. مش عارف ييجى ٢٥

او ١٧ تانيين بدون دباشك ..

(وقد اثارث كلمة « دباشك » الانتباه ، ففسرها السيد رئيس المحكمة بقوله « الدبشك يعنى ايد البندقية)

الشاهد - وماسورتين بتوع المدفع .. يمكن براوننج وله ماسورتين تبريد وانما ماشفتش الجزء الكبير بتاعه .. شفت المواسير بس ..

الرئيس - وايه تانى ؟

الشاهد - مش فاكرك .. وهم عند حضرتك ..

الرئيس - انا عارف انهم عندى ..

الشاهد - بس مش فاكرك دلوقتى ..

وكيل النائب العام - انت تحدثت فى خطابك الذى كان يناقشك فيه سيادة الرئيس مع ابراهيم الطيب عن مسائل تخص الجهاز السرى ...

الشاهد - ايوه ...

وكيل النائب العام - وطلبت فى النهاية اما ان ياخذ برايك او تبقى حتى تقابل المرشد اربط بين موضوع الخطاب وطلب مقابلة المرشد .. ليه ؟

الشاهد - لان المرشد هو المسئول عن الدعوة ، واعتقد ان الاخوان لا يعملون شيئا الا بأمر الاستاذ المرشد .. انا كنت عاوزه اقابل المرشد ولكنه كان مختفى .. رحت المركز العام فلم اجدّه ..

وكيل النائب العام - هل معنى هذا ان المرشد هو الذى يسيطر على هذا النظام ؟

الشاهد - قطعاً ..

وكيل النائب العام - ولذلك اردت ان تقابله لتعرض عليه اراءك ؟

الرئيس - هو كان قطعاً ، وقبل كده قال انا اعوز اعرف ماهى الدماء التى ستحقن ..

الشاهد - فى هذا الموقف ستسيل دماء ..

الرئيس - ايه الموقف الايجابى اللى كنت تنتظره واللى اتكلم معاك عليه ؟

الشاهد - لو هو حب يعمل حاجة ضد الحكومة ..

الرئيس - ايه الحاجة دى اللى ضد الحكومة ؟

الشاهد - لا اعرف ايه الاشياء اللى حتعمل .. لم اكن اعرف والله على ما اقول شهيد ..

الرئيس - نظام سرى واسلحة تدريب وتدريب الجماعات مش كامل .. كل ده ماتعرفشى علشان خاطر يعملوا به ايه ؟ .. علشان يعملوا حلاوة طحينية ؟

الشاهد - لا يا فندم ..

الرئيس - علشان يعملوا به ايه ؟

الشاهد - لغاية تاريخ ما اعتقلت لم اكن اعرف بالضبط الخطة اللى جيعملوها انا باقول هذا وانا صادق ، وانا اعترف على كل حاجة اعرفها ولم اعترف الا لمصلحة البلد وحقنا للدماء ..

وكيل النائب العام - انت قلت فى التحقيق ان المقصود هو ضرب الانجليز فى القنال او عمل ثورة مسلحة القصد منها القضاء على الحكومة الحاضرة فهل دى هى الاهداف ؟

الشاهد - ولذلك انا عارضت فى ذلك ..

وكيل النائب العام - أنت قلت في التحقيق ان مخزن اسلحة جهينة .. مخزن الاسلحة هناك هو الذى كانت تجمع فيه جميع الاسلحة الخاصة بمنطقة القاهرة ، ثم توزع من هناك على المناطق او على الفصائل الاخرى فلماذا اختيرت جهينة لتخزين السلاح فيها دون غيرها من انحاء القاهرة ؟

الشاهد - طبيعى انا استلمت السلاح في جهينة ..

وكيل النائب العام - لماذا اختيرت جهينة بالذات لتجميع السلاح فيها ثم القيام بتوزيعه منها ؟

الشاهد - انا استلمت السلاح في جهينة ؛ وطبيعى هم اللى يقدرُوا هذا الموقف ...

وكيل النائب العام - انت كنت في الصورة ..

الشاهد - في الصورة انتهى ؟ .. انا كنت في فصيلة عرب جهينة فاستلمت السلاح من هناك ..

وكيل النائب العام - ايه الحكمة ..

الرئيس - يعنى لا يمكن تجميع الاسلحة في جهينة الا اذا كان الرجل المسئول عن عرب جهينة يعلم بجميع الاسلحة في جميع المناطق بدليل انهم اعطوك الاشراف على جرد المخازن ..

الشاهد - انا قلت انهم كلفونى بجرد المخازن ..

الرئيس - ما اسس النظام السرية ؟

الشاهد - فيه غيرى يعرف .. اسماعيل الهضيبي يعرفها

الرئيس - اسماعيل الهضيبي مخزنجى .. ومحمود يونس سلمك ونزل ، وابراهيم الطيب رئيس وبينك وبينه همزة وصل ..

مين اللى يجيب الاوامر من ابراهيم الطيب ؟

الشاهد - اسماعيل عارف ..

الرئيس - وواحد تانى كمان ..

الشاهد - محمود يونس ..

الرئيس - وواحد ثالث كمان ..

الشاهد - فكرنى به يافندم ..

الرئيس - حسين شعبان ..

الشاهد - ايوه .. وانا لم أتصل به الا بخصوص الجواب ده

بس .. حتى الجواب الكبير اعطيته لعارف ومنه اللطيف ثم

للاستاذ المرشد اما الجواب الثانى فاعطيته لحسين شعبان ..

الرئيس - ايه حسين شعبان ده ؟

الشاهد - كل صلتى به علشان الجواب ..

الرئيس - تعرف انه اخ ومن الجهاز السرى ؟

الشاهد - ايوه اعرف انه من الجهاز السرى ؛ واصله كان معنا

فى بين السرايات ..

وكيل النائب العام - اختفى المرشد وبطافته فجأة ، فما الذى

استشعرته من هذا الاختفاء وقد طال امده ؟

الشاهد - ذكرت فى خطابى ان اختفاء المرشد لا اوافق عليه ،

لان هذا يؤدى الى توتر وصدام بين الاخوان والحكومة .

وكيل النائب العام - ما الذى استشعرته من هذا الاختفاء ؟

.. عباراتك فى الخطاب كان شعورك ايه .. ليه عملت هذا ؟

الشاهد - احسبت ان الاختفاء فيه خطر وحيحصل توتر ..

وكيل النائب العام - ايه هو التوتر ده ؟

الشاهد - الاخوان يقولوا ليه يختفى الاستاذ المرشد ..

سيقولون ان الحكومة تحتقبض عليه ...

وكيل النائب العام - ألم تطلع على البيانات المتتالية من جانب

الحكومة بانها لم تصدر الامر بالقبض على المرشد وانها لا تنتوى

ذلك مستقبلا ؟

الشاهد - قراته فعلا ..

وكيل النائب العام - ايه شعورك ؟

الشاهد - يبقى في الامر شيء ..

وكيل النائب العام - وما هو هذا الشيء ؟

الشاهد - حاتبقى ثورة .. حتكون ايه ؟

وكيل النائب العام - اقرا لك كلامك ؟

الشاهد - ايوه ..

وكيل النائب العام - قلت .. سمعت ان الحكومة لم تصلحوا

امروا بالقبض على المرشد ثم قلت ان هذا الاختفاء يتعلق بهذه

الحركة المسلحة .. مش دى اجابتك ؟

الشاهد - ايوه ..

وكيل النائب العام - وبرضه سئلت - هل يفهم من تعبيرك

هذا ان المرشد كان يصدر تعليمات وهو في مخبئه .. « ج » نعم

مش ده جوابك ؟

الشاهد - ايوه ..

الرئيس - ذكرت في كلامك عبارة « حقنا للدماء » فهل هذا

الكلام في حقيقته حقنا للدماء او خوفا او التشكك من النصر في

دخولكم معركة مع الحكومة ؟

الشاهد - ده سؤال جميل وانبسطت منه ... (ضحك)

الرئيس - الحمد لله رب العالمين .. (ضحك) آه يعنى

ميسوط منى علشان سالتك السؤال ده ؟

الشاهد - اوى ...

الرئيس - يعنى حتنام الليلة دى مستريح ؟

الشاهد - ايوه .. ان شاء الله ..

الرئيس - طيب ابسطنى زى انا مابسطتك وسالتك السؤال ده

وجاوبنى اجابة تريحنى انا كمان .. (ضحك)

الدفاع - يعنى تجاوب في وضوح واخلاص ..

الرئيس - انا باقولك انك قررت في كلامك انك انت قصدت

بهذا الخطاب الى بعته لابراهيم الطيب حقن الدماء الى هى ممكن
أن تنتج من نشوب عراك بين الاخوان والحكومة اذا ما الاخوان
بدأوا فى أى معركة .. بأقول هل حقيقة أنك كنت تبغى بهذا
الجواب حقن الدماء ، أم كنت تبغى تجنب المعركة لانك كنت
متشكك فى النصر فيها ؟

الشاهد - أنا حقيقة كنت ..

الرئيس - أنت ابسطت من السؤال ده .. فجاوب عليه
بصراحة ؟

الشاهد - أنا كنت أود حقيقة تجنب هذه المعركة والله على
ما أقول شهيد وأنا مسئول عن هذا اليمين امام الله فى يوم القيامة
حين اقبله

الرئيس - يا اخ يامسلم يالى حتقابل ربنا يوم القيامة ،
وبتدرس الاسلام وتعلمه للناس ..

الشاهد - طيب اقرا الجواب لو سمحت ..

الرئيس - بتقول فيه . خير لنا ان نستمر فى اعدادنا سنتين
بهذا النشاط وبعدين مشطوبة ومكتوب فوقها .. فى نشر دعوتنا
سنتين ونستعد من ان ندخل معركة قد لاتكون فى جانبنا ..
ده واحد .. وبعدين .. التدريب لازال ضعيفا جدا جدا لايسمح
بالقيام بمهام كبيرة ، وكان قد تقرر ان يدخل كل اخ معسكر
للتدريب ولكن شيئا من هذا لم يتم .. ورجال بدون تدريب
لايكفون لاحراز النصر .. افنكر الشوية دول كفاية ؟

الشاهد - كفاية يافندم ..

الرئيس - ولكن ليس فى ايدينا مايبلغنا هذا ، فاولى بنا ان
نصبر ثم نصبر الثلاث فقرات الى قراتهم دول .. الا يدلوا
بأيمن الله الى حلفتها يا اخ يامسلم يالى حتقابل ربنا يوم القيامة
هلى أنك كنت متشكك فى نتيجة المعركة ؟ .. فهل انت كنت

تقصد حقن الدماء أو التشكك في المعركة والأولى أن تنتظر الى ان تدرب رجالك حتى اذا وقعت المعركة يبقى النصر في جانبك ؟

الشاهد - نيتى ... يمكن التعبير خائنى ..

الرئيس - التعبير خائنا ؟ .. آمال محمود عبد اللطيف يحصل له ايه ؟

الشاهد - نيتى ان نتجنب المعركة حقنا للدماء والله على ما اقول شهيد

الرئيس - يا راجل يا متعلم يا بتاع ليسانس الآداب ... ده انتم بتعلموا ناس بتوع ابتدائية وناس عمال مايعرفوش يكتبوا وتعلموهم ... تقول لى ان التعبير خائنا ، وتقول لى انك كنت بتبغى تجنب المعركة حقنا للدماء .. دى تعاليم ومبادئ الاسلام ؟ .. انت بتتكلم وتقول ايه ؟ .. اتكلم الكلام اللى يشرفك حتى وانت واقف امام القضاء ..

الشاهد - يبقى علشان تجنب المعركة ..

الرئيس - واليمين اللى حلفته تعمل فيه ايه ؟

الشاهد - علشان أبرئ ذمتى كان غرضى تجنب المعركة حقنا للدماء ..

الرئيس - واليمين اللى حلفته كنت تقصد به التفرير بالمحكمة ؟
الشاهد - انا لا اقصد ذلك ..

الرئيس - والا دى الطريقة اللى بتتبعوها انكم تحلفوا على حاجة جزءها صح .. زى ويل للمصلين ..

الشاهد - لا .. انا شاب وابويا من صغرى ..

الرئيس - انا مالى ومال ابوك .. سيب ابوك بره ارجوك ..
الادعاء ..

وكيل النائب العام - تقدر تقول امام المحكمة .. تقدر تشرح للمحكمة عمليات نقلك للسلاح من المخزن بتاعك في جهينة للجهات الى نقلت لها وعدد وانواع هذه الاسلحة ؟
الشاهد - ايوه يافندم ..

وكيل النائب العام - يعنى تقول لنا طريقة نقلها وعددها والفرق او الفصائل التى سلمت لها ..

الشاهد - نقلت مرتين اتنين .. المرة الاولى نقلت ١٦ بندقية فى اربع لغات .. كل بندقية فيها اربعة وعشرين مشعل «مولوتوف» كل عشرة فى ربطة علشان نوديهم لفصيلة مصر القديمة وفصيلة حلوان .. وصلنا بعربية .. قمنا من عرب جهينة وكان معنا واحد اسمه محمد فؤاد مكاوى والسواق ، وكان منتظرنا واحد عند مصر القديمة اسمه محمود ، فقلت له انا حاقابل واحد اسمه على صديق .. وبعدين رحنا وديناهم عند واحد اسمه السعدنى فى حلوان .. فى المرة الثانية محمد فؤاد مكاوى قلت له تستنى عند صديق فى مصر القديمة علشان نودى السلاح لعلى .. فانتظرنى وبعدين رحنا المعادى .. وقد ارشدت ايضا عن هذا المكان الذى كان فى المعادى وقبض على صاحبه .. وطبيعى الانواع كلها انا لاعرفها بالضبط وانما على طلع صندوق ذخيرة « ٣.٣ » واخذ قنبلتين ..

الرئيس - ما سبب الخلاف بين جماعة الاخوان والحكومة ؟

الرئيس - لم يكن هناك خلاف ..

الرئيس - هناك خلاف كان قايم او بالضبط او بالعربى علشان تكون عارف من رمضان الى قبل الى فات .. فما هو سبب هذا الخلاف ؟

الشاهد - مش فاكّر بالضبط ..

الرئيس - ألم يقل لك ابراهيم الطيب ان الحكومة طالبت جماعة الاخوان بحل الجهاز السرى ، لان مامعنى قيام جهاز سرى فى جماعة فى داخلية البلد فى الوقت الذى يصرح فيه مرشد هذه الجماعة ان ليس هناك سرية فى الدعوة ؟

الشاهد - ماسمعتش ...

الرئيس - ما قالكش ..

الشاهد - لا ..

الرئيس - يعنى هناك يعطوكم المعلومات اللى هم عاوزين يعطوها لكم وانتم ماتتناقشوش ...

الشاهد - انا ناقشت ..

الرئيس - انت ماناقشتش وانما قلت لهم ان هذه الطريقة لاتوصلنا للهدف بتاعنا ... طولوا بالكم علشان نستعد احسن لانى انا الى ماسك السلاح وباقول لكم الفصائل مش مستعدة مش ده كلامك ؟

الشاهد - ابوه ..

الرئيس - اذن ده موقف الناصح الامين على نفس الاهداف ونفس الاغراض الا انك ترى تأجيل العملية لضمان الوقت ..

الرئيس - على نفس الاهداف والاغراض الا انك ترى فى الوقت ذاته تأجيل العملية لضمان النصر يعنى كنت تعرف .

الشاهد - اعرف الخلاف بين الحكومة والاخوان .

الرئيس - مش معقول ان واحد مطلع زيك مايكونش عارف ؟
الشاهد - ما كنتش اعرف ان الحكومة طلبت حل النظام السرى

وكيل النيابة - مطلوب من برنامجكم الحكم بالاسلام ان برنامجكم الى رسمتوه علشان تحكموا البلاد حكما اسلاميا .
عاوزين نعرف حدوده واسسه .

الشاهد - احنا من مبادئنا الحكم بالقرآن وان القرآن دستورنا .

نحكم بالقرآن مفيش أكثر من كده ... ومفيش خلاف الا اننا
نعلم هذا الحكم فقط نحرّم الخمر والربا مفيش غير كده .

وكيل النيابة - تعلموا أن الحكم اسلامى . ؟

الشاهد - وتحريم الخمر والربا .

وكيل النيابة - ... ده اللى موجود فى الدين يعنى مفيش
تعديل للقانون المدنى والجنائى .

الشاهد - الكل يخضع لكتاب الله .

وكيل النيابة - طيب يبقى ايه نظام الحكم الاسلامى ؟

الرئيس - افرض انك جيت دلوقت فى الحكم وحطوك رئيس
وزارة تعمل ايه ؟

الشاهد - مش ممكن اعملها .

الرئيس - طبعاً مادام فيه مبدأ الجهاز السرى لان لو جيت
الحكم كل واحد منكم رايح يعمل جهاز سرى وتبقى العملية رايح
جاي مش كده .. هو كل الحكم بالقرآن انك تعلم الحكم بالقرآن
وتحريم الخمر والربا .

الشاهد - أيوه .

الرئيس - القرآن حرم الخمر ؟

الشاهد - أيوه .

الرئيس - ومين القائم على تنفيذ هذا التحريم ؟

الشاهد - كل واحد مسؤول عن نفسه أولاً وبعدين الحكومة
والآية قالت « يا ايها الذين آمنوا انما الخمر والميسر والانصاب والازلام
رجس من عمل الشيطان فاجتنبوه » .. ولما نزلت الآية دى خرج
رسول الله الى السوق ومعه سكين وكان فيه قرية فيها خمر
فمزقها فكان هذا ايذاناً بأن الخمر حرام ويفهم من هذا ان
الحكومة مسؤولة عن التحريم .

المدعى - يعنى الآية مش مهمة الى جانب ما فعله رسول الله ؟

الرئيس - يعنى تقصد ان عملية الرسول هى الى بينت ان
الخمير حرام ؟

الشاهد - لا كان ضرورى برضه حيحجتنبوها .

الرئيس - مين علمك الديانة ؟

الشاهد - الاخوان .

الرئيس - مين فى الاخوان ؟

الشاهد - فى الأسر .

الرئيس - مين المدرس بتاعك ؟

الشاهد - ماكانش فيه مدرس خاص .

الرئيس - طبعا مفيش مدرس خاص لازم تشكيلة .. سلطة ..

الى توصلك الى هذا الحد .

وكيل النيابة - يعنى ماكانش فيه دراسة خاصة بالنظم

التي تتبع ؟

الشاهد - كان فيه لجان بتدرس كيفية تجنب الخلل الاقتصادى

الذى يحدث نتيجة لتجنب الربا .

الرئيس - ما المقصود بالربا فى الاسلام ؟

الشاهد - سعر الفائدة .

الرئيس - اليس الربا هو ان يكون لديك مال فائض وتعطيه

لذى حاجة بفائدة ؟

الشاهد - آه .

الرئيس - هذا هو الربا فى الاسلام اما ان تشترك بمالك فى

مشروع من المشاريع وتنال عنه ربا مثل الاشتراك فى الشركات

المساهمة فهذا ليس ربا .

الشاهد - اعمال البنوك ربا .

الرئيس - مال البنوك اين يوظف ؟

الشاهد - اذا وضعت ١٠٠ جنيه في البنك امانة آخذ عليهم فائدة .

الرئيس - منين جيت الكلام ده الامانة مانأخذش عليها فائدة ولا الحساب الجارى كمان روح اتعلم التجارة واتعلم البنوك اعمالها ايه وبتشغل فلوسها فى ايه . البنوك بتشغل فلوسها فى الشركات المساهمة اللى بتلم منك ومن غيرك الفلوس علشان يعملوا بيها مشروعات والبنوك التجارية بتعمل فى التجارة والصناعة . تشتغل فى الصناعة واللى قصدك تبطل الربا بتاع باروخ بتاع الصاغة ان كان اقصدك على ده فده محرم بأمر الحكومة الدفاع - ومعاقب عليه قانونا .

وكيل النيابة - القصد من هذه التشكيلات السرية المسلحة هو عرقلة اتمام الاتفاقية كما قلت فهل انت درست الاتفاقية وقرأتها ؟

الشاهد - لم اقل هذا .
وكيل النيابة - انت مش قلت الغرض منها اتخاذ اجراءات ايجابية لعرقلة الاتفاقية .
الشاهد - ايوه .

وكيل النيابة - امال بتقول لا ليه - انت قرئت الاتفاقية واطلعت على بنودها وملحقاتها ؟
الشاهد - لا انا قرئت النصوص الاولى للاتفاقية والباقي قرئته فى المعتقل .

وكيل النيابة - يبقى على اى اساس جاريت التيار وعارضت الاتفاقية قبل دراستها .

الشاهد - ما انا قلت اننى كنت غلطان من الاول .

الرئيس - تعرف محمود عبد اللطيف ؟

الشاهد - لا ما أعرفوش .

الرئيس - هل تعلم بترتيب الثورة الشعبية ؟

الشاهد - لا يا افندم والله لا اعلم .

الرئيس - طبعاً .

الشاهد - والله أنا قلت صح ولا اقصد الكذب ابداً .

الرئيس - أنت قسمك الأول كان كذب فكيف أثق فيك .

الدفاع - أنت لك جوابين .. الجواب الثانى ذكرت فيه انك

لا تعرف ماذا يراد بك هل مجرد الفصل أو ... أو
ما الذى تقصده بهذه النقط .

الشاهد - ده فى الجواب الصغير انا قصدت القتل . .

يمكن يقتلونى .

الدفاع - كنت تتوقع هذا ؟

الشاهد - أيوه .

الدفاع - اذا لم تطعمهم ؟

الشاهد - أيوه ومع ذلك لم اطعمهم .

الدفاع - رغم أنك كنت تتوقع القتل ؟

الرئيس - نحب نقرا الجواب معاك أنت بتقول بلغنى عن

الأخ حسين شعبان انه يسألنى هل أنت مستعد لتنفيذ غير

ماذكرته فى خطابك وافهم من هذا السؤال انه لا جواب على

ما أرسلته وانه اذا لم أجب بنعم واننى مستعد للسير معكم

فاننى أوقف مثلاً أو .. أو ... فأجب ان أقول ان هذه ليست

دعوتى أو دعوتك أو دعوة أبى ... آمال دعوة مين ؟

الرئيس - أو ... أو ... دى معناها ايه . ؟

الشاهد - معناها انهم يعاقبونى .

الرئيس - يعاقبك ليه ؟

الشاهد - خوفا من أن افشى الاسرار يمكن يقتلونى واتا

وفرت على نفسى هذا .

الرئيس - أنت منظم للاخوان من امتي ؟

الشاهد - من سنة ١٩٤٦ .

الرئيس - كنت طالب فين ؟

الشاهد - في كلية الآداب .

الرئيس - في سنة ١٩٤٤ ؟

الشاهد - كنت في مدرسة الصناعات الخزفية واشتغلت

في مصلحة الدفعة والموازين وبعدين رحى فلسطين وبعدين

أخذت الثقافة والتوجيهية ودخلت كلية الآداب .

الدفاع - هل قرأت المعذبون في الأرض ؟

الشاهد - لا .

الدفاع - أنت طالب في كلية الآداب وفي قسم التاريخ هل

كان لديك مقتضيات تجعلك تظن أنهم قد يقتلونك . . من

دراسة للأجهزة السرية ونظمها التي كانت تتبع كنت تعلم أن

الذي يخالف يتعرض للقتل ؟

الشاهد - أبوه .

الدفاع - هل ده أيضا موقف محمود عبد اللطيف ؟

الشاهد - يسأل عن ذلك محمود عبد اللطيف .

الرئيس - ترفع الجلسة على أن تعود للانعقاد في الساعة

العاشرة من صباح السبت الموافق ١٣ نوفمبر سنة ١٩٥٤ .

(رفعت الجلسة في الساعة العاشرة والربع مساء)

- (محضر) -

الجلسة الرابعة لمحكمة الشعب

المنعقدة علنا في الساعة العاشرة والرابع صباحا ، بمقر قيادة الثورة في الجزيرة ، يوم السبت ١٣ نوفمبر سنة ١٩٥٤ الموافق ١٧ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برياسة قائدالجناح جمال مصطفى سالم عضومجلس قيادة الثورة .

وعضوية القائممقام انور السادات والبكباشي (ا . ح) حسين الشافعي عضوى مجلس قيادة الثورة .

وبحضور البكباشي سيد سيد جاد المدعى ، والاستاذ على نور الدين وكيل النائب العام ، عضوى مكتب التحقيق والادعاء .

وتولى تسجيل المحاكمات بالاختزال الاساتذة : ابراهيم فكرى احمد فودة وممدوح توفيق وطلعت الصبان مندوبو مصلحة الاستعلامات .

قدمت القضية رقم (١) لسنة ١٩٥٤ (محكمة الشعب) المتهم فيها محمود عبد اللطيف محمد .

(حضر المتهم)

الرئيس - فتحت الجلسة : الادعاء جاهز

المدعى - ايوه يا افندم

- الرئيس - الشاهد
المدعى - الشاهد على عبد الفتاح نويرو
الرئيس - اسمك ايه
الشاهد - على عبد الفتاح نويرو
الرئيس - سنك كام سنة
الشاهد - ٢٦ سنة
الرئيس - بتشتغل ايه
الشاهد - موظف بمصلحة المساحة .
الرئيس - قرب واحلف اليمين : ردد الشاهد الحلف على
المصحف وراء الرئيس وهو « والله العظيم اقول الحق ولا شيء
غير الحق والله على ما اقول وكيل »
المدعى - هل انت عضو في جماعة الاخوان المسلمين ؟
الشاهد - نعم
المدعى - في اى شعبة
الشاهد - بالمنيرة بامبابة
المدعى - هل كان في هذه الشعبة اية تنظيمات خاصة ؟
الشاهد - كان فيه أسر
الرئيس - متقول لنا على الجهاز السرى وتخلص على طول
وتيجى ناحيتنا شويه وتدينا وشك زى اللى حيتصوروا .
الشاهد - هنداوى دوير كان قال لنا نعمل جيش اسلامى
وندرس الاسلام والاسر .
الرئيس - مش عايزين نعرف حاجة عن الاسر عايزين الجهاز
السرى ايه هو التنظيم السرى وبتشتغل فيه ايه ومين رئيسه
وايه اهدافه واغراضه ؟
الشاهد - كان هنداوى دوير كلمنا فيه عشان ندرس الاسلام
ونكون جيش اسلامى والاسر . والمفروض انها تدرس ...

الرئيس - قلت لك مش عاوزين نعرف حاجة عن الاسر اتكلم في الجهاز السرى .

الشاهد - كان هنداوى يختار بعض الاخوان ويجمعهم في أسر اخرى غير الاسر بتاع الاخوان المسلمين .

الرئيس - اسمهم ايه ؟

الشاهد - فى مجموعات

الرئيس - ماتقول كده

الشاهد - الحكاية دى بقى لها سبعة أشهر وكنا ندرس سورة آل عمران ! والاحاديث .

الرئيس - اشمعنى تدرسوا سورة آل عمران ؟

الشاهد - ما اعرفش

الرئيس - ودرست فيها ايه ؟

الشاهد - من الاول

الرئيس - الجنة احسن من الدنيا

الشاهد - القرآن فيه الحاجات دى كلها

الرئيس - احسن من المال والفضة والذهب

الشاهد - الجنة احسن

الرئيس - أنت عاوز تفهمنا القرآن هو انا عندك فى الاخوان .

الشاهد - المفروض أن سورة آل عمران من ضمن سور القرآن .

الرئيس - طيب كلمنا فى الجهاز السرى .

الشاهد - هنداوى دوبر كان يجمع الاخوان يا افندم من قيمة

حوالى شهر وقال لى افنت حتكون الرديف بتاعى فى الحاجات دى كلها ...

الرئيس - حاجات ايه ؟

الشاهد - فى المجموعات الجديدة .

الرئيس - ايه المجموعات الجديدة دى ؟

الشاهد - اخوان نجمعهم مثلا سبعة

الرئيس - مثلاً ... ؟

الشاهد - لا

الرئيس - مثلاً يصح يكونوا ٥ ؟

الشاهد - هم ثلاثين وهذا آخر تشكيل ويكونوا ثلاث مجموعات كل مجموعة فيها سبعة وكان فيها جماعة سبعة أو ثمانية أو أربعة لأن كسه الامور ما استقرتس وكان في المجموعات دى اخيراً حاجة جاييها ويدرس بنفسه وكلفنى بصفتى انى درست فى الحرس الوطنى قبل كده ، وفى الضباط الاحتياط سنة واحدة أعدتها .

الرئيس - كنت ضابط احتياط ؟

الشاهد - سنة ١٩٤٧ قعدت سنة لكن ماكملتش

الرئيس - الحمد لله رب العالمين

الشاهد - كان يفوت على الجماعات دى ويدربنا ويعطينا برنامج روحى والبرنامج الروحى الى هوه سورة آل عمران والاحاديث النبوية والرحلات وزادت عليها الحته دى الى هى تشكيلات الجماعة والفصيلة .

الرئيس - ايه التشكيلات الموجودة دى ؟

الشاهد - ثلاث جماعات وجماعة مخبرات

الرئيس - الجماعات مكونة من مين . . . ومين . . .

ومين وبرياسة مين ؟

الشاهد - ثلاث جماعات وجماعة اسمها المخبرات وهنداوى

دوير ماسك الجماعات كلها .

الرئيس - اسمها ايه الجماعات ؟

الشاهد - فصيلة

الرئيس - اتكلم على طول والا مصلحة المساحة علمتك انك

تنضم الى الجهاز السرى وماتعرفش الكلام - اتكلم على طول .

الشاهد - هنداوى دوير ماسك الفصيلة وكان عاملنى

الرديف بتاعه .

الرئيس - يعنى ايه رديف .

الشاهد - ثانى واحد بعده ، وفيه جماعة من وراق العرب تتكون من صلاح عباس وكان رئيس الجماعة دى ومعاه عبدالقادر سليمان ومعاه حلمى عبد السلام ومعاه عبد الحميد البنا ومعاه محمود الفريرى وفاضل لسه واحد طالب انضم جديد واسمه صفوت وكان معاهم يوسف همام ومحمد رءوف دى جماعة وراق العرب .

الرئيس - مين ماسك الجماعة دى ؟

الشاهد - صلاح خليفة عباس

الرئيس - والجماعة الثانية ؟

الشاهد - انا ماسكها وتتكون منى ومن مصطفى الوردانى وعبد رب النبى عباس وسعد حجاج ...

الرئيس - كلمنى - ولا تتكلم مع احد ثانى

الشاهد - حاضر .. ومن عبد المنعم حفى ومحمد نجيب ..

الرئيس - رئيس الجمهورية ؟

الشاهد - محمد نجيب راغب الخردوانى . دى الجماعة الثانية .

الرئيس - وبعدين ؟

الشاهد - والجماعة الثالثة كانت تتكون من محمود الصياد وعبد العزيز شمس وعبد المنصف البحرى ومعاهم واحد رابع قلت اسمه قبل كده ومش فاكره .

الرئيس - مين كان ماسك الجماعة دى ؟

الشاهد - مكتتش مستقرة وآخر واحد كان ماسكها انا مؤقتا لانها ما استقرتش .

الرئيس - كنت ماسك جماعتين ، ومين كان رئيس الجماعة .

الشاهد - مره عبد العزيز ... وانا كنت اروح للزيارة .

الرئيس - بالشورى .

الشاهد - ماكناش مستقرين ومفیش حاجة خالص ، وكان فيه جماعة المخبرات وكانت مكونة من يحيى سعيد وعبد القادر سليمان ومحمود عبد اللطيف ومن وراق الحضر واحد اسمه محمد زكى وفيه واحدة ثانية ماسكها حسن عبد المنعم وكان فيها يوسف السيد وحامد نويتو وحلمى عرفه وده بقاله ثلاثة اشهر مابقاش يجى .

الرئيس - حلمى عرفة صنعته ايه ؟

الشاهد - طالب

الرئيس - وحسين شعبان يشتغل ايه

الشاهد - معرفش .

الرئيس - وحامد نويتو يشتغل ايه ؟

الشاهد - اخويا .

الرئيس - تشر فنا ودى شغله ؟

الشاهد - مجلد فى جامعة فؤاد الاول

الرئيس - وانت بتشتغل ايه ؟

الشاهد - موظف فى مصلحة المساحة فى قسم التصوير .

الرئيس - بتشتغل فيه ايه ؟

الشاهد - أعمل التصوير

الرئيس - درجه ايه

الشاهد - درجه سادسة

الرئيس - واحمد خليل

الشاهد - عامل

الرئيس - وعبد المنصف البحرى ؟

الشاهد - موظف فى وزارة التجارة والصناعة

الرئيس - درجه ايه

الشاهد - معرفش

الرئيس - وعبد القادر سليمان

الشاهد - موظف بمصلحة السكة الحديد .

الرئيس - بيشتغل ايه ؟

الشاهد - موظف

الرئيس - درجه ايه

الشاهد - معرفش

الرئيس - وعبد الحميد البنا

الشاهد - عامل فى معامل وزارة الصحة

الرئيس - وعبد العزيز شemis

الشاهد - خردواتى

الرئيس - يعنى الحمد لله كل الجهاز السرى خردواتيه

وسمكرية وموظفين فى الدرجات الصغيرة مالتتش مهندس ولا واحد مدير ادارة .

الشاهد - لا . ودي كانت الاسر ودول الجماعات .

الرئيس - المجموعات دى غرضها ايه ؟

الشاهد - قالوا انها نواة للجيش الاسلامى الذى سيحمى

الاسلام من اى واحد يعتدى عليه او على الفكرة الاسلامية زى الانجليز واليهود .

الرئيس - ودى حاجة سرية كل دولة لها جيش تحمى بيه

نفسها .

الشاهد - على ما قالوا لنا انها كانت موجودة قبل كده على

ما اذكر .

الرئيس - يعنى موجوده ؟

الشاهد - ايام الشهيد حسن البنا كانت موجودة .

الرئيس - كان سيدنا محمد الثانى .

الشاهد - لا

الرئيس - يعنى اذا كانت موجودة ايام حسن البناء تبقى لازم تكون موجودة على طول .

الشاهد - لا

الرئيس - الاسلام مفيش فيه سرية يبقى الجهاز كله سرى ليه والفكرة ايه ؟

الشاهد - كان نواة للجيش الاسلامى لحماية الفكرة الاسلامية .

الرئيس - الاسلام مفهش سرية ولا بيشتغل تحت الارض .

الشاهد - المقصود ان جميع الاخوان يكونوا « كتميين »

الرئيس - على مين ؟

الشاهد - على انفسهم

الرئيس - تعلمت من سورة آل عمران ان تكون كتم ؟

الشاهد - الى انا مقتنع بيه الى خلاى انضم هو انا اذافع

عن الفكرة الاسلامية وحرب الانجليز فى القنال وحرب اليهود فى فلسطين واسألوا اى واحد اذا كان فى نفسه حاجة غير دى .

الرئيس - وايه حكاية الانقلاب الشعبى .

الشاهد - انا لا اعرف شيئا عن هذا وجيبوا لى هنداوى وانا

اقطعه بأيدى لانه غرر بينا وودانا فى داهية . وانا واخويا مش فى البيت .

الرئيس - مالناش دعوة بالبيت عشان تبقى تشترك فى الجهاز

السرى .

الشاهد - الدين يحضنا على الجهاد فى سبيل الله وانا عشان

مادخلتش الجيش فجيت اشتركت فى الجيش الاسلامى عشان احارب .

الرئيس - عشان مادخلتش الجيش تعمل جيش تانى ؟

الشاهد - انا دخلت الجيش الاسلامى عشان أساعد الحكومة .

الرئيس - والجيش الموجود جيش تركى ؟

الشاهد - لا يا افندم والحتة الى انتم عملتوها ...

الرئيس - حطة ايه ؟

الشاهد - عملتم خيرا كثيرا بفكرة المؤتمر الاسلامى واتصلتم بالشعوب الاسلامية والاخوان لما كانوا يقعدوا ١٠٠٠ سنة ماكانوش يعملوها .

الرئيس - مين كان رئيس الجهاز السرى ؟

الشاهد - هنداوى دوبر .

الرئيس - كان فيه فصائل ثانية ؟

الشاهد - مفيش عندنا حاجة ثانية

الرئيس - فى حته ثانية

الشاهد - مفيش

الرئيس - مين تعرفهم موجودين فى فصائل اخرى غير الجهة الاخرى ؟

الشاهد - الى اتصلت بيه حسين شعبان

الرئيس - فين ؟

الشاهد - فى بين السرايات

الرئيس - بيعمل ايه فى بين السرايات ؟

الشاهد - ما اعرفش .

الرئيس - جاب لكم منشورات مرة ؟

الشاهد - ايوه مرة جاب منشورات

الرئيس - يقولوا فيها ايه ؟

الشاهد - يقولوا فيها عن خطاب للمرشد الى الاخوان

الرئيس - وايه كمان ؟

الشاهد - والخطاب الى بعته المرشد للرئيس جمال عبدالناصر

الرئيس - وبعدين ؟

الشاهد - ايوه يا افندم ده الى اعرفه من حسين شعبان .

الرئيس - تعرف ان حسين شعبان من الجهاز السرى ؟

الشاهد - أعرف انه من بين السرايات واتصل بى فى مرة من
المرات وماكنتش أعرف انه فى الجهاز السرى .
وكيل النائب العام - كان مفروض ان هذه الجماعات تدرب
عسكريا ؟

الشاهد - مفروض يا أفندم
وكيل النائب العام - جت لكم أسلحة ؟
الشاهد - لا يا أفندم ، انما هنداوى جاب لنا أسلحة وقال لى
شيلها .

وكيل النائب العام - أى أسلحة، بين للمحكمة واقعة الاسلحة .
الشاهد - جاب شيله فيها قوالب ت. ن. ت وقنابل فاضية
ولفة ثانية لا أعرف فيها ايه اول مرة وثانى مرة بعث شنطة ودى
تاريخها قريب .

الرئيس - كان فيها ايه الشنطة ؟

الشاهد - ما اعرفش لان اخويا هوه اللى اخذها .

الرئيس - وقوالب ال ت. ن. ت عشان ايه ؟

الشاهد - يسأل عن هذا هنداوى

الرئيس - ولا يسأل اللى اخذها .

الشاهد - هوه قال لى شيلها فى المخزن

الرئيس - المخزن بتاع ايه ؟

الشاهد - المخزن اللى حط فيه الشيله دى اللى جابها .

الرئيس - والمخزن ده كنت مؤجرينه وكان على شكل مخزن .

الشاهد - لا كان شقه وكان ساكن فيها واحد اسمه عبد

الحميد البنا .

الرئيس - كنتم مخصصين للأسلحة مخزن عنده عشان الشيلة

اللى جابها هنداوى .

الشاهد - أيوه

الرئيس - يعنى كنتم منتظرين ان فيه شيلة حتىجى وعشان

كده عملتم المخزن عشان تحطوها فيه .

- الشاهد - هنداوى قال لى
الرئيس - الشيلة دى ايه ؟ ووديتوها فين ؟
الشاهد - ودينا كفر حكيم
الرئيس - عند مين ؟
الشاهد - عند مصطفى الكومى
الرئيس - بيشتغل ايه ؟
الشاهد - رئيس فى وزارة الزراعة
الرئيس - رئيس ايه ؟
الشاهد - رئيس فى قسم تربية النباتات - رئيس عمال .
الرئيس - وكان ايه الغرض من هذه الاسلحة ؟
الشاهد - هنداوى يسأل عنها لانها حاجات كثيرة ومنها
قوالب الت . ن . ت كثيرة .
الرئيس - وليه لايسال الشخص اللى شالها او اخذها ؟
الشاهد - هنداوى قال لى شيلها فشيلتها
الرئيس - الأوامر عندكم لازم تنفذوها - يعنى لما هنداوى
يعطى لك امر لازم تنفذه ؟
الشاهد - لا يا فندم انما هو قال لى شيل دى فى
المخزن فشيلتها .
الرئيس - انت بتقول انك كنت الرديف بتاع هنداوى .
الشاهد - كنت جديد وده اخيرا
الرئيس - وده مش يكون بناء عن ثقة ؟
الشاهد - ايوه لازم يشق فى
الرئيس - الشخص اللى هنداوى يعينه الرديف بتاعه مش
لازم يعلم ويعرف كل شىء ؟
الشاهد - انا قلت كل اللى اعرفه واللى علمت بيه .
الرئيس - انت مافكرتش لما اداك الاسلحة عشان تحطها
فى المخزن انك تسأله الاسلحة دى عشان ايه ؟

- الشاهد - ماسألنوش ولم يتدرب الاخوان بتوعنا عليها .
الرئيس - دى تبقى مصيبه لو كان دريكم على استعمال
قوالب الت . ن . ت
الشاهد - انا شفيتها
الرئيس - ازاي ؟
الشاهد - فى الحرس الوطنى وضربوا هذه القوالب امامى
فى الميه .
الرئيس - وعملت ايه ؟
الشاهد - عملت انفجار جامد
الرئيس - لكن انت ماقتلش الاسلحة دى عشان ايه
وجاب الاسلحة دى منين ؟
الشاهد - مفيش حد من الاخوان يعلم هذا .
وكيل النائب العام - جاب منين الاسلحة دى ؟
الشاهد - والله ما اعرف .
وكيل النائب العام - فيه حد جه من خارج منطقة امبابه
عشان يعاين الاسلحة او يشيلها ومين ؟
الشاهد - ايوه - سيد الرئيس .
وكيل النائب العام - عشان ايه ؟
الشاهد - عشان يشوف المكان وقال انه ما يصلحش .
وكيل النائب العام - اى مكان ؟
الشاهد - المكان اللى اتحط فيها السلاح
وكيل النائب العام - الاول او الثانى ؟
الشاهد - الاسلحة دى كانت فى كفر حكيم ولما جيتا ننقلها
بناء على رغبة هنداوى راح شاف المكان فقال انه ماينفعشى .
وكيل النائب العام - اختصاص سيد الرئيس ايه ؟
الشاهد - التفتيش على الاسلحة
وكيل النائب العام - بناء على طلب مين ؟

الشاهد - معرفش .

وكيل النائب العام - ايه صفته في الجهاز السرى ؟

الشاهد - هو فات علينا وشفته

وكيل النائب العام - هل فهمت انه مكلف من رئيس الجهاز

السرى بانه يفتش على الاسلحة .

الشاهد - معرفش يمكن من فوق

الرئيس - وابراهيم الطيب شغلته ايه ؟

الشاهد - محامى .

الرئيس - وايه عمله في الجهاز السرى ؟

الشاهد - معرفش .

الرئيس - لكن انت مش اعترفت في التحقيق على ان ابراهيم

الطيب رئيس مناطق الجهاز السرى في القاهرة ؟

الشاهد - لا ... محصلش ... ماقلتش كده .

الرئيس - طيب شوف المحضر (موجهها كلامه الى الادعاء) ثم

قال للشاهد جابوب على السؤال اللي اسالك عنه . احنا مش

بنبيع ترمس .

وكيل النائب العام - قلت في التحقيق اجابة على السؤال الخاص

بمتى كانت آخر مقابلة لك لابراهيم الطيب فقلت « في مكتبه من

شهرين ونص وكان هناك كثير من الاخوان كانوا حوالى ١٨ واحدا

من مختلف المناطق قاعدين وابراهيم قال ان كل حاجة ماشية

كويس والتعليمات ستصل لكم في الوقت المناسب » .

الرئيس - هل هذا حصل ؟

الشاهد - حصل يا افندم .

الرئيس - يعنى عارف ان فيه اعضاء جهاز سرى في المناطق

الاخرى ؟

الشاهد - انا شفت ناس تانيين عند ابراهيم الطيب

الرئيس - والناس الثانئين دول بيعملوا ايه عند ابراهيم الطيب ؟

الشاهد - طبعاً رايحين زى ما انا رايح

الرئيس - امال بتقول ما تعرفش ليه ؟ وكلامك الاول قلت انك ما تعرفش ان فيه جهاز سرى فى مناطق اخرى ليه ؟

الشاهد - فين يا افندم .

الرئيس - قلت انك ما تعرفش انه فيه جهاز سرى فى مناطق اخرى غير المنطقة بتاعتكم .

الشاهد - ما اعرفش عنه حاجة .

الرئيس - والناس اللي شفتم .

الشاهد - انا رحى فى مكان واعدت فى اوده وقلت كل اللي شفته .

الرئيس - لما ابراهيم الطيب قال ايه الاستعداد بتاعكم والجماعات بتاعتكم واسماؤهم وان التعليمات حصلكم فى الوقت المناسب كان بيقول الكلام ده لك لوحده ؟

الشاهد - كان معايا محمود الحواتكى وحسين شعبان

الرئيس - لما ابراهيم الطيب يقول لكم هذا الكلام امام الحواتكى وحسين شعبان يفهم من هذا الكلام ايه ؟ يفهم ان حسين شعبان والحواتكى اعضاء فين ؟

الشاهد - يبقى كده على طول . وانا قلت ان حسين شعبان فى بين السرايات والحواتكى فى الجيزة .

الرئيس - يبقى فيه جهاز سرى فى الجيزة ؟

الشاهد - المفروض لازم يكون فيه .

الرئيس - وتفهم ايه لما ابراهيم الطيب جمعكم يا اعضاء الجهاز السرى فى وراق العرب والجيزة وامبابة ويبقى ايه ابراهيم الطيب ؟

الشاهد - انا قلت انه فوق هنداوى دوير .

الرئيس - استنتاج ؟

الرئيس - لكن انت قلت ما اعرفش انه بيشتغل الا محامى

الشاهد - لازم يكون رئيس لهنداوى .

الرئيس - الاجهزة السرية تبع جمعية ايه ؟

الشاهد - الاخوان المسلمين

الرئيس - وتتبع مين فى الرياسة بتاع الاخوان ؟

الشاهد - ما اعرفش لكن المفروض ان المرشد مسئول عن

كل حاجة فى الاخوان .

الرئيس - هل دخلت هذا الجهاز السرى دون ان تعرف

يتبع مين ؟

الشاهد - هنداوى رئيس من ناحية رئاسة المنطقة وكلامه

آخذه منه ثقة .

الرئيس - يعنى ماتناقشوش وتقوم تطيعه على طول ؟

الشاهد - اناقشه فى حدود المعقول .

الرئيس - ولما جاب قوالب ال ت. ن . ت عشان تشيلها

فى المخزن كان كلامه معقول ؟

الشاهد - الى شفته ان الاخوان راحوا فلسطين والقنال

وكنت مقتنع بالناحية دى ، لكن الحاجة الى عملها استنكرها

استنكرها خالص وهو خرب بيوتنا لانه استغل فينا الحمية

الاسلامية واحنا ناس بنقرأ القرآن وشفنا القرآن يحض على

الجهاد .

الرئيس - الجهاد ضد مين ؟

الشاهد - ضد الانجليز والكفار والمشركين والجماعة دى كان

غرضها ان الاسلام يتوسع وينتشر ويكون اهله اعضاء فيها

ولاشك ان خطوة المؤتمر الاسلامى كانت خطوة جميلة جدا .

ووالله العظيم لو كان الاخوان اعدوا ١٠٠٠ سنة ماكانوا يقدرؤا

يعملوا حاجة زى دى واللى كانوا بيحلموا بها فى نفوسهم لانهم

ما كانوا عارفين يصلحوا نفسهم .

الرئيس - ليه ؟

الشاهد - كل يوم كان فيه خناقه .

الرئيس - قل لنا شيئاً عن هذه الخلافات .

الشاهد - النزاع اللى بينهم .

الرئيس - زى ايه ؟

الشاهد - كل يوم والتانى كان فيه نزاع وعبد الرحمن البنا

كان فى ناحية وده فى ناحية .

الرئيس - قول لنا خناقه .

الشاهد - ضربوا بعض فى المركز العام زى ما قرانا فى

الصحف .

الرئيس - مارحتش هناك وماشفتش ؟

الشاهد - لا

الرئيس - يعنى تنضم لجماعة لاتعرف عنها شيئاً ولا تعرف

اغراضها ولا الجهاز السرى الغرض منه ايه .

الشاهد - قبل كده اعرف انهم راحوا فلسطين للجهاد

والقتال .

الرئيس - يعنى الاخوان بس هم اللى راحوا فلسطين ؟

الشاهد - لا وغيرهم

الرئيس - وغيرهم يطلع ايه ؟

الشاهد - مصريين وطنيين يا افندم .

الرئيس - راحوا عشان ايه ؟

الشاهد - بدافع الوطنية . والاخوان بدافع الدين وده وطنى

ودده وطنى .

وكيل النائب العام - اذا سمحت المحكمة نريد ان نواجهه

بأقواله الواردة فى التحقيق .

الرئيس - اتفضل

وكيل النائب العام - انت قررت فى التحقيق عندما سئلت عن

الاهداف التى يسعى اليها الجيش الاسلامى فأجبت بأنه لكى

تقاوم به الحكومة التى لاتحكم بالقرآن ولما سئلت عن طريقة المقاومة فقلت لما يجيبوا لنا الاسلحة وفعلا جابوا اسلحة عند عبد الحميد البنا . كما قلت بانهم جابوا لكم خرائط لمدينة القاهرة ودرستم منطقة امبابه عشان تعرفوا كل الشوارع . ثم سئلت عن التعليمات التى قال ابراهيم الطيب انها حتجيلكم فى الوقت المناسب وعن الخطة التى عملوها فقلت انهم كانوا يقولوا ان الشعب كان حيقوم بثورة لاسقاط الحكومة وقاب نظام الحكم مش كلامك ده ؟

الشاهد - مش كله الكلام ده مش تمام زى مايتقوله .

الرئيس - ده القرآن الذى اتعلمته . علمك انك تمضى على اقوال وبعدين تقول انه مش كلامى .

الشاهد - كل حاجة اقول عليها يا افندم .

وكيل النائب العام - صفحة ٥ و٦ فى التحقيق .

الرئيس - دى امضتك (اطلعته على امضاءاته فى محضر التحقيق) . ؟

الشاهد - ايوه

الرئيس - ودى امضتك ؟

الشاهد - ايوه

الرئيس - ودى امضتك ؟

الشاهد - ايوه

الرئيس - وبتمضى على حاجة قبل ماتقراها او لا ؟

الشاهد - انا يا فندم ماقرئتش حاجة .

الرئيس - وليه مامضيتهاوش على شيك بخمسة آلاف جنيه ؟

وكيل النائب العام - ياريت يا افندم .

الرئيس - ايه الخرائط التى جابوها لكم ؟

الشاهد - جابوا لنا خريطة القاهرة وخريطة امبابه عشان فدرسها كويس .

الرئيس - امبابه فيها يهود رايعين تحاربوهم ؟

- الشاهد** - قالوا لنا ادرسوا خريطة امبابة .
- وكيل النائب العام** - وهل كان الجيش الاسلامى سيحارب فى القاهرة ؟
- الشاهد** - لا ولكن كان من ضمن دراساتهم التكتيك العنيف .
- الرئيس** - ايه التكتيك العنيف ده .
- الشاهد** - النط والجري والقفز والرياضة عشان يربوا الجسم بتاعنا كويس .
- الرئيس** - (ينظر الى الشاهد) وهل هذا جسم كويس تدرب على التكتيك العنيف ؟
- الشاهد** - اصلى كنت باذاكر
- الرئيس** - فين ؟
- الشاهد** - بكلية الحقوق
- الرئيس** - سنة ايه ؟
- الشاهد** - فى سنة اولى
- الرئيس** - وقبل ان تدخل كلية الحقوق ؟
- الشاهد** - كنت باكمل بقية دراستى فحصلت على الثقافة والتوجيهية .
- الرئيس** - قلت ان اهداف الجيش الاسلامى مقاومة الحكومة التى لاتحكم بالقرآن .
- الشاهد** - ايوه
- الرئيس** - يعنى موافق ومقتنع بيه .
- الشاهد** - انا بقى لى فى الاخوان سنة ونصف وكان ساعة ماكلنا هنداوى عن الجهاز السرى من سبعة شهور كنت متفرغ للدراسة من اعدادى الى ثانوى .
- الرئيس** - لكنك قلت فى اقوالك ان من اهداف الجيش الاسلامى ان يقاوم الحكومة التى لاتحكم بالقرآن
- الشاهد** - هذا الكلام صح

الرئيس - يعنى موافق عليه ؟

الشاهد - تسمح يا افندم

الرئيس - لا ما اسمحش ... اسمح ترد على السؤال بس
الى ا قوله لك انت مش علموك النظام فى الاخوان .

الرئيس - علموك النظام ولا لا فى جماعة الاخوان

الشاهد - ايوه .

الرئيس - ما كنتش بتناقش نويتو ليه ؟ . وما كنتش بتناقش
هنداوى ليه لما قال حط الاسلحة فى المخزن .. فرحت
حاططها زى الرطل فى المخزن من غير ماتناقشه ..

الشاهد -

الرئيس - كلامك ده ولا لا ؟

الشاهد - ايوه يافندم ... والله يافندم خطواتكم الى انتم
ماشيين فيها من اثبت ما يمكن ... والله يافندم ماشيين فيها
بنظام دى من احسن الخطوات

الرئيس - كتر خيرك .. (ضحك) .. تعرف محمود
عبد اللطيف ؟

الشاهد - ايوه

الرئيس - آخر مرة شفت فيهما محمود عبد اللطيف كانت امتى ؟

الشاهد - أنا شفته صباح يوم الحادث ...

الرئيس - امتى يعنى ؟

الشاهد - الساعة ستة الصبح ..

الرئيس - فين ؟

الشاهد - هو فات على فى منزلى ..

الرئيس - فات عليك علشان ايه ؟

الشاهد - هو قال لى ان هنداوى بعتنى لك .. وبيقول لك
ادبنى خمسة جنيه وعشر طلقات ...

الرئيس - علشان ايه ؟

الشاهد - ما أعرفش ..

الرئيس - ما سألتوش ليه عاوز الطلقات ؟

الشاهد - أنا وجدت أنه باين عليه الاضطراب فقلت له :
فيه حاجة يا محمود فقال لا سيبني أنا عاوز أمشي ..

الرئيس - طيب ماقتلوش انت عاوز الخمسة جنيه ليه ؟

الشاهد - هو قال لى ان هنداوى كان باعته وانه يقول لى

اديله خمسة جنيه ..

الرئيس - عندك فلوس منين ؟

الشاهد - أنا امين صندوق المنطقة ..

الرئيس - وهنداوى هو المسئول عن هذا المال ؟

الشاهد - أيوه ..

الرئيس - وایش عرفك أن هنداوى هو الذى قال له

انه يروح لك ؟

الشاهد - اصل هو كان جاني قبل كده ..

الرئيس - شفت معاه ايه ؟

الشاهد - كان معاه مسدس ..

الرئيس - وطلب منك تديله طلقات علشان ايه ؟

الشاهد - ماأعرفش وأنا سألته علشان كان باين

عليه الاضطراب وقلت له فيه حاجة .. فقال لا ماردش

على بجواب .. وقعد فطر معايا وطلب منى اجيب له شنطه ،

وقال لى أنا عاوز أمشي قبل الساعة ثمانية ...

الرئيس - كان رايح يحارب الانجليز ؟

الشاهد - ما أعرفشى ..

الرئيس - تفتكر انت ايه ؟

الشاهد - أنا استنتجت ...

الرئيس - واحد فات عليك واخذ خمسة جنيه من مال

المسلمين ، وعشر طلقات ..

- وكيل النائب العام - وقعد فطر معاه ..
الرئيس - وكان مرتبك ومستعجل ، وكان عاوز يمشى ..
قبل الساعة كام ؟
الشاهد - قبل الساعة تمانيه ..
وكيل النائب العام - وطلب شنطه ...
الرئيس - ما فكرتش ايه الحكاية ... رايح فين ؟
الشاهد - أنا بالليل رحت لهنداوى فقال لى ..
الرئيس - احنا هنا فى الساعة ثمانية الصبح ...
مش بالليل ..
الشاهد - ما اعرفش .. ده اللى حصل ..
الرئيس - ما فكرتش فى حاجه ياللى بتدرس الدين الاسلامى ؟
الشاهد - فكرت وسألته ..
الرئيس - فى ايه ؟
الشاهد - قلت له ، علشان ايه يا محمود عاوز الحاجات دى
... فيه حاجة فقال لى لا ... انا عاوز امشى ..
الرئيس - طيب انت فكرت فى ايه ؟
الشاهد - قبل كده ... فى مرة كان محمود قاعد فى جماعة
معانا ، فهنداوى جه وأخذه وقال لى مالکش دعوه بيه ...
الرئيس - أيوه .. انما انت لما تلاقى واحد معاه مسدس
وطلقات تفتكر انه رايح يعمل ايه ؟ .. رايح يصطاد مثلا .. ؟
(ضحك)
الشاهد - أن بعض الظن اثم ...
الرئيس - أن بعض الظن اثم ؟
الشاهد - أيوه يافندم ... (ضحك)
الرئيس - ما قلتش فى اقوالك انك فهمت منه أنه مسافر ..
الشاهد - هو قال لى يافندم انه مستعجل وعاوز يسافر
وانه عاوز يمشى من عندى قبل الساعة تمانيه ..

الرئيس - تعرف واحد اسمه عبد الحميد البنا ؟

الشاهد - ده من جماعة الوراق .

الرئيس - يشتغل فين

الشاهد - في معامل الصحة .

الرئيس - يشتغل ايه ؟

الشاهد - ده من جماعة الوراق ويشتغل .. واخترناه

مخزنجى . .

الرئيس - علشان تشيلوا عنده ايه . . ؟

الشاهد - يسأل اللى جابه . . . هنداوى . . .

الرئيس - طيب لما رحت لهنداوى بالليل قال لك ايه ؟

الشاهد - لما رحت له وجدته مضطرب ، فقلت له : فيه ايه

فارتبك . . فانا ربطت بين القرائن بتاعة الصبح وبين نشرة

الاخبار في الاذاعة بتاعة الساعة تمانية ونص . . . بصيت لقيت

وشه عرق وقال لى انا مليش دعوة دول المسؤولين هم اللى عملوا

كده . . . فانا رحت قافل الباب ونزلت ده كل اللى حصل

بينى وبينه .

الرئيس - مين الناس المسؤولين دول ؟

الشاهد - المفروض انه اتصل بابراهيم الطيب . .

الرئيس - ابراهيم الطيب كان بيعمل اجتماعات ؟

الشاهد - ايوه . . ده كان محامى وكان بيعمل اجتماعات . .

الرئيس - اجتماعات ايه ؟

الشاهد - انا رحت اجتماع واحد . .

الرئيس - اجتماع ايه ؟

الشاهد - كان فيه اخوان من بين السرايات ومن الجيزة ،

وانا رحت علشان هنداوى يعرفنى به لانى كنت جديد . .

الرئيس - جمع رديف ايه ؟

الشاهد - ردائف ..

الرئيس - المرة دى حببت تصلح اللى قلته فى المرة اللى فاتت ... انت قلت قبل كده فى التحقيق ردفاء ... ردائف
هى الصح ؟

الشاهد - أبوه ..

الرئيس - على وزن ايه ؟ (ضحك)

الشاهد - ما اعرفشى يافندم ...

الرئيس - طيب ... يعنى الاجتماع كان فيه الردفاء او الردائف .. يعنى ماكنتش انت لواحدك .. وانما كانوا كلهم من
الرديف ؟

الشاهد - لازم يافندم كانوا كده ...

الرئيس - كنت رايع بصفتك الشخصية ؟

الشاهد - كنت رايع بصفتى رديف ...

الرئيس - يعنى كل الناس اللى هناك كانوا بتوع رديف ؟

الشاهد - ماعرفش ... يعنى هل حسين شعبان بتاع
رديف .. ماعرفشى ..

الرئيس - ايه الخطة اللى كانوا عاملينها ؟

الشاهد - ما اعرفشى حاجة عنها ..

الرئيس - هل ابراهيم قال لكم ان التعليمات حتيجى فى الوقت
المناسب ؟

الشاهد - هو قال كده ...

الرئيس - انتم عندكم ماتسألوش عن حاجة ؟

الشاهد - لا مانسألشى ...

الرئيس - يعنى دكتاتورية ؟

الشاهد - لا ... والمفروض اننا نسال ...

الرئيس - اسمعنى ما سألتش هنداوى لما سلمك الاسلحة
علشان تحطها فى المخزن . . ليه ماسالتوش ؟

الشاهد - ماتحتاجشى لسؤال . . ده اللى انا فاهمه والله . .

الرئيس - ايه اللى تعرفه عن الثورة اللى عاوزين يعملوها
لقلب نظام الحكم ؟

الشاهد - والله ما اعرفشى حاجة . .

الرئيس - عاوزين يعملوا مؤامرة شعبية ؟

الشاهد - والله الحته دى ماعرفهاش . .

الرئيس - تعرف الحته بتاعة امبابه ؟

الشاهد - يافندم انا اخويا قلت عليه . .

الرئيس - ماتعرفشى حته باب الشعريه ؟

الشاهد - رحتها مرة واحدة وانا صغير . .

الرئيس - بس . . ؟

الشاهد - ايوه . .

الرئيس - قل لنا عن معلوماتك فى وسط القاهرة . . .

الشاهد - انا ماعرفش الاسماء . .

الرئيس - انت راجل فى مصلحة المساحة وبت رسم خرط

وبتدرسها . . ازاي باه ما تعرفشى ؟

الشاهد - ما اعرفشى يافندى . .

الرئيس - انت مش قلت فى التحقيق انهم كانوا بيقلولوا دائما

ان الشعب لازم يقوم بثورة لاسقاط النظام الحاضر ؟

الشاهد - لا اذكر . . .

الرئيس - ما تذكرشى ؟

الشاهد - لا . . .

الرئيس - تعرف واحد اسمه عيد المنعم عبد الرؤوف ؟

الشاهد - ايوه .. هنداوى مرة بعث لى فى العبد الكبير فانا رحت هناك فوجدته قاعد مع واحد .. فلما دخلت عرفنى به وقال لى ده اخوك احمد من شبرا .. قال اخوك الخضر .. وقال لى شيل ده عندك ..

الرئيس - زى ال T . N . T ؟ .. (ضحك) .

الشاهد - اخذته ونزلنا مشينا على التربة ومنها للبيت .. وكان مصطفى الوردانى مسافر هو واسرته فى الوردان .. وكانوا سابوا المفتاح عند جارهم الاخ عبد المنعم الحفنى فانا رحت له واخذت منه المفتاح وقلت ما تجيش ، وبعدين رحت على شقة الوردانى فوجدت عبد المنعم عبد الرؤوف منتظرنى ، وانا لغاية اللحظة دى ما كنتش اعرفه ..

الرئيس - وبعدين ؟

الشاهد - وبعدين حطيت عبد الرؤوف فى الشقة ثلاثة ايام لانه كان عيان ..

الرئيس - كتب بتخدمه ومخبية ؟

الشاهد - المفروض كده ...

الرئيس - يعنى كنت مخبيه ؟

الشاهد - هنداوى قال لى شيله عندك ، فشلتته عندى ..

(ضحك)

الرئيس - هه ... كنت مخبيه ليه ؟ .. برضه ما فكرتش

فيه .. زى حكاية ال T . N . T اللى ماسالتش عليها ؟

الشاهد - ...

الرئيس - عبد المنعم عبد الرؤوف اخذته وشلتته فى بيت

الوردانى علشان خاطر ايه ... علشان الجيش الاسلامى ؟

الشاهد - هنداوى قال لى شيله لان ده اخ من الاخوان ...

الرئيس - وعرفت امتى انه عبد المنعم .

الشاهد - عرفت بعد ما مشى ..

وكيل النائب العام - كان يجتمع بحد في البيت ؟

الشاهد - اجتمع براهيم الطيب مرتين ..

وكيل النائب العام - ويحيى سعيد هل قابلته في البيت

الشاهد - ايوه ..

وكيل النائب العام - كانوا بيتكلموا في ايه ؟

الشاهد - كانوا بيتكلموا عن تشكيل الفصيلة ، وهو كان

بيحط عيدان كبريت ويشكلها تشكيلات عسكرية ... العيدان

دى كانت تبين سهم او خط منتشر .

وكيل النائب العام - الم تعرف طول المدة دى شخصيته ؟

الشاهد - لا ... وانما كنت اعرف بس انه شخصية

عسكرية ...

وكيل النائب العام - خرج ازاى ؟

الرئيس - قلت في اقوالك انك عرفت ان عبد المنعم عبد

الرؤوف كان ضابط في الجيش وانه هارب من المحاكمة العسكرية

... وانك انت كنت بتقوم بخدمته في تلك الايام ...

الشاهد - انا عرفت بعد كده ان عبد المنعم عبد الرؤوف كان

بيتحاكم .. بعد ما خرج ... وهنداوى كان يحتاط دائما ان

مفيش حد يعرفه .. حتى انا ..

الرئيس - الغرابة ربنا مديكم حنة لسان .. اكبر كذابين

لو كان ربنا يديكم عقل زى ما اداكم لسان !!

الشاهد - والله العظيم انا باقول الحق دلوقتى .. انا حالف

على مصحف ..

الرئيس - وبرضه انت حالف على ده وماضى عليه (مشيرا

الى محضر التحقيق) ... وبعدين ...

الشاهد - وبعدين اخذوه بالطريقة الاتية ...

الرئيس - كمل كلامك ...

الشاهد - ابراهيم الطيب قال لى حاجيلك عربية الساعة اربع صباحا لان المفروض الشقة حايجى فيها اصحابها بعد العيد قال لى حاجيلك عربية حيكون فيها محمود الحواتكى ... خرجنا الساعة اربعة صباحا ولكننا لم نلتق بهم .. والمدينة كانت اختفت اضاؤها .. ما وجدناهمش وما شفناش العربية فى المكان المحدد بعد ذلك انا ابلفت ابراهيم وقلت له ان ما حصلش التقاء ، وبعد كده جه ابراهيم واخده ونزل ومشى الساعة ثمانية مساء ..

الرئيس - الم يشر هذا فى نفسك التفكير ؟

الشاهد - واحد عاوزين يتحفظوا عليه ...

الرئيس - ليه ناس مخصوصين يتحفظوا عليه ؟

الشاهد - هو كان خايف ...

الرئيس - كان خايف ، وماكنش بيخرج وتأخذ العربية الساعة ثمانية مساء وتمشى من عند مدينة العمال ومخبى اسمه عليك .. كل ده ليه ؟ .. الحاجات ماثرش فى نفسك التفكير ؟

الشاهد - شخص مهم ...

الرئيس - شخص مهم يعنى ايه .. رئيس حكومة مستخبى عندكم .. ايه يعنى .. رئيس الحكومة المنتظر او القائد العام المنتظر ؟ .. قل لنا ايه أهمية الشخص ده ؟

الشاهد - ما اعرفش ...

الرئيس - الى انت حتصوره ايه ... قول لنا ايه الى جال فى خاطرك ؟

الشاهد - عرفت انه شخص مهم ...

الرئيس - نهرو جه هنا ... ما شلتوهشى عندكم ليه .. ؟
(ضحك)

وكيل النائب العام - عارف ودوه فين ؟

الشاهد - راح كدراسة ...
وكيل النائب العام - عمل ايه ؟
الشاهد - كان فيه معسكر .
وكيل النائب العام - معسكر ايه ؟
الشاهد - الاخوان المسلمين علشان التدريب ...
وكيل النائب العام - لتدريهم معنى ؟
الشاهد - ده اللى استنتجته بعد ذلك ...
الرئيس - ايه معسكر كدراسة ده ؟
الشاهد - كان فيه معسكر وقالوا لنا انكم حاتروحوا فيه ..
ولكن ما رحناش ...
الرئيس - ليه ؟
الشاهد - بما اعرفشى ...
الرئيس - ما فكرتش في دى كمان وما سالتش ليه البوليس
قفل المعسكر ؟
الشاهد - يمكن حاجة غير مرغوب فيها ... المفروض ان
الاخوان بيعملوا معسكرات في كل حنة .. في حلوان .. وفي كل
حنة ..
الرئيس - يعنى ما تعرفش ليه غير مرغوب في هذه
المعسكرات ؟
الشاهد - ما اعرفشى ..
الرئيس - يعنى انت فهمت لما البوليس هجم على معسكرات
كدراسة ان هذه المعسكرات غير مرغوب فيها ؟
الشاهد - ابوه .. وانا رحنا مرة في معسكر حلوان ...
الرئيس - خفية ؟
الشاهد - لا ... علنا
الرئيس - المعسكرات دى كانت معمولة تحت ستار

الكشافة ؟

الشاهد - لا ...

الرئيس - ومعسكر كرداسة كان شكله ايه ؟

الشاهد - ما شفتوش ...

الرئيس - ولا سمعتش عنه حاجة ؟

الشاهد - لا سمعت ...

الرئيس - الطلقات اللي أعطيتها لمحمود عبد اللطيف كانت

منين .. ؟

الشاهد - من عبد الحميد البنا .. اخويا راح جابها بالعجلة

.. سبع دقائق رايح وسبع دقائق جاي ...

الرئيس - كان فيه كلمة سر بينكم ؟

الشاهد - ايوه ... قلت له يقول : « سيد كامل » ..

الرئيس - سيد كامل ... ؟

الشاهد - ايوه يافندم ...

المدعى - تعرف شخص اسمه سامى الكومى ؟

الشاهد - ايوه ...

المدعى - ايه علاقته ... ايه وظيفته فى الاخوان ؟

الشاهد - ده وكيل نيابة فى شمال القاهرة ، وكان بيحى

معانا فى اجتماعات ادارة المنطقة ، ورايه استشارى لان وظيفته

تمنعه من القعداء مع الاخوان .. ومثلا .. كان حاضرا فى الاجتماع

الى تم فيه اجراء الانتخابات فى الاخوان ...

المدعى - كان بيحضر فى الجماعات ؟

الشاهد - ما اعرفشى ...

المدعى - وكان عارف حاجة عن الذخيرة اللي كانت فى بيت

عبد الحميد البنا ؟

الشاهد - ايوه .. وانا اللي قلت له عليها ...

وكيل النائب العام - لما جالك محمود عبد اللطيف الصبح
وطلب منك العشر طلقات ، ألم تشك في الغرض اللى طلب من
أجله الطلقات ؟ مش يجوز انه يروح يقتل واحد .. مش تخاف
على نفسك من المسئولية ؟

الشاهد - اطلاقا ما أعرفشى ..

وكيل النائب العام - قعد محمود عبد اللطيف عندك أد ايه ؟

الشاهد - حوالى تلت ساعة ، وكان بياكل ...

وكيل النائب العام - قابلت يحيى سعيد بعد ما سمعت
بالحادث ؟

الشاهد - آه .. ليلتها ...

وكيل النائب العام - ليلتها قال لك ايه ؟

الشاهد - من أى ناحية ؟

الرئيس - أى ناحية تعرفها انت ...

الشاهد - قلت له ... أنا كنت قلت له الكلام اللى دار بينى

وبين هنداوى ، وقلت له أنا رحت لهنداوى وقلت لهنداوى ايه

ده .. ايه ده فهو وشه اتغير وعرق .. وقال الناس المسئولين
هم اللى عملوا كده مش أنا ...

وكيل النائب العام - وليه قلت ليحيى سعيد الكلام ده ؟

الشاهد - علشان أنا كنت بعث له محمود ياخد منه

الشنطة ...

الرئيس - شعبة الجيزة مين رئيسها ؟

الشاهد - الدكتور مصطفى عبد الله .. وكان الحاج حسنى

قبله ...

الرئيس - كنت بتروح الهرم علشان ايه ؟

الشاهد - ما رحتش ...

الرئيس - ولا مرة ؟

الشاهد - لا يافندم ...

الرئيس - مين كان بيحبيب لك المنشورات ؟

الشاهد - حسين شعبان .. والمرشد كان بيعطيها لهنداوى

وهنداوى يدبها لشعبان ...

الرئيس - باين من كلام اعضاء الجهاز السرى ان كل واحد

بيتصل من المسئولية وبيرميها على اخوه .. ده اللى تعلمتوه فى

« آل عمران ؟ .. » آل عمران علمتكم الجبن الادبى ؟

الشاهد - انا باقول اللى كسبته .. انا قلت اللى لى « واللى

على » .. وقلت عن اخويا انى بعته علشان يجيب الشنطة ..

الرئيس - وايه اللى كسبته ؟

الشاهد - يعنى الحاجات اللى عملتها ..

الرئيس - وده اسمه مكسب ؟

الشاهد - كل نفس بما كسبته وهينة ...

الرئيس - وهينة ؟

الشاهد - ايوه .. يعنى انا اقصد المكسب من الناحية دى ..

الرئيس - الادعاء فيه أسئلة ثانية ؟

المدعى - لا .. مفيش ..

الرئيس - الدفاع ...

الدفاع - ايوه .. لو سمح لى السيد الرئيس ...

الرئيس - اتفضل ..

الدفاع - موجها كلامه للشاهد - انت شاهد اثباتك على

محمود عبد اللطيف ..

الشاهد - ايوه ..

الدفاع - محمود عبد اللطيف درس خريطة امبابه كما

درستها انت ؟

الشاهد - لا ...

- الدفاع -** لماذا درست انت خريطة امبابه ..
- الشاهد -** المفروض ان الاخوان المسلمين يكملوا النقص اللى فينا .. يعنى تبقى عندنا معلومات عامة ...
- الدفاع -** انا لم ادرس خريطة امبابه ، فهل تعتبرنى ناقص المعلومات ؟
- الشاهد -** انا عايش فى امبابه .. ودراسة الخرائط دى عبارة عن معلومات عامة فى اثناء دراستها الواحد يتعلم تاريخ وجغرافيا .. ده المفروض وانا كنت بادرس جغرافيا وتاريخ وحساب ، ودى معلومات عامة ..
- الدفاع -** هل واضح فى هذه الخريطة مركز قسم البوليس ؟
- الشاهد -** دى خريطة بتاعة مصلحة المساحة ..
- الدفاع -** ايه الاماكن اللى استقر نظرك عليها ؟
- الشاهد -** شوارع منطقة امبابه ..
- الدفاع -** التى تؤدى الى ايه ؟
- الشاهد -** انا مثلا كنت امين الصندوق ، وكنت باروح فى المناطق دى ، وعلشان كده كنت بادرس الاماكن كويس ..
- الدفاع -** افهم من ذلك انك درست الخريطة لتستطيع الوصول الى منازل الاخوان ؟
- الشاهد -** علشان أعرف السكة كويس ..
- الدفاع -** ما هى المبالغ التى اخذها محمود عبد اللطيف ؟
- الشاهد -** آخر مبلغ كان خمسة جنيه ...
- الدفاع -** هل تستطيع - لمصلحة العدالة - انك تقول لنا عن المبالغ اللى اخذها محمود عبد اللطيف لوحده ؟
- الشاهد -** مرة هنداوى قال لى اديله اثنين جنيه .. ومرة خمسة جنيه .. وهو متعود ياخذ فلوس ...
- الدفاع -** بياخذ من فلوسك ولا من فلوس الاخوان ؟

الشاهد - من فلوس الاخوان ...

الدفاع - انت عضو في الاخوان .. الم تكلف نفسك التفكير

.. ليه بيدوله من فلوس الاخوان ؟

الشاهد - لان محمود عبد اللطيف حالته بسيطة .. هو

سباك وفقير وله ثلاثة اولاد ، وكان هنداوى بيساعده ..

الدفاع - في حدود تقديرك ... ما هي المبالغ التي اعطيت

لمحمود عبد اللطيف ؟

الشاهد - خمسة جنيه مرة ، واثنين جنيه مرة .. وخمسة

جنيه آخر مرة ...

الدفاع - المصروفات بتاعة الاخوان فيها بند خاص بالاحسان

على اعضائها ؟

الشاهد - ايوه ...

الدفاع - عدد اللي بتحسبوا اليهم اد ايه ؟

الشاهد - اربع افراد ..

الدفاع - مين هم ؟

الشاهد - محمود عبد اللطيف ، وعباس ...

الدفاع - عباس حجاج ؟

الشاهد - ما عرفشى بقيت اسمه ... وهو طالب فقير ...

وواحد من العمال مرة هنداوى قال لى اصرف له فلوس لانه

عيان وعنده سل ، فاعطيته اثنين جنيه ...

الدفاع - والرابع ؟

الشاهد - لا اذكره ...

الدفاع - القيمة الشهرية اد ايه اللي بتصرفها احسان ؟

الشاهد - دى حاجة مش ثابتة ...

الدفاع - تختلف من كام لكام يعنى ؟

الشاهد - حسب الظروف وحسب الحالات المطلوبة ...

الدفاع - طيب ...

الرئيس - قول لنا ايه حكاية منشورات ؟ ... آخر منشور مثلا كان ليه ؟

الشاهد - ده كان من المرشد للاخوان ...

الرئيس - كان بيقول فيه ايه .. ؟

الشاهد - ده كان فيه خطاب للاخوان ، والخطاب اللي بعته

للرئيس جمال عبد الناصر ...

الرئيس - ايه خطابه للاخوان .. ؟

الشاهد - مش متذكر ...

الرئيس - ازاي مش كنت لازم تحفظه ؟

الشاهد - اظن الخطاب ده كان فيه معاني الصبر ..

الرئيس - ده كان منشور سري جاى لك من المرشد العام ..

مش لازم تتذكره ؟

الشاهد - اصل انا كنت مشغول خالص ...

الرئيس - كنت مشغول خالص ؟

الشاهد - ايوه . . . طيب شويه كده والله . . . بس انا

عاوز اتذكره ...

الرئيس - على مهلك ... اجيب لك فنجان قهوه ؟

الشاهد - آه ... خطاب للهيئة التأسيسية ... كان بيقول

فيه ... على اى حال الخطابات دى كلها موجودة وممكن سيادتكم تطلع عليها .

الرئيس - انا عارف انها موجودة ، ولكن انا عاوزك انت

تقول لى كان فيها ايه ؟

الشاهد - لا اذكر ...

الرئيس - طيب والمنشورات اللي قبل منه ؟

الشاهد - كان بتاع ... « هذه الاتفاقية لن تمر » ... وانا

بعد مآقراته تضايقت جدا وقطعته ...

الرئيس - كتر خيرك كان فيه ايه ؟

الشاهد - كلام كله هراء وكذب

الرئيس - كلام الجماعة هراء وكذب .

الشاهد - لا اعتقد انه بتاع الاخوان ...

الرئيس - كلام المرشد هراء ؟

الشاهد - كلام فارغ يافندم ...

الرئيس - مين اللى سلمهولك ؟

الشاهد - هنداوى .. الواحد كان اعمى فى الاول ...

الرئيس - نرجع للاول لما كنت مغمى ...

الشاهد - دلوقت الواحد شاف الحقيقة كويس

الرئيس - عاوزين نرجع لما كنت اعمى لسه ..

الشاهد - كلام كذب ...

الرئيس - ايه هو الكلاه ده عاوزين نعرف الكلام ده

... احنا مش بنقول دافع عن هذا الكلام ؛ والا ايه رأيك فيه ؟

احنا عاوزين نعرف الكلام نفسه ..

الشاهد - انا متذكر العنوان نفسه اللى هو « هذه الاتفاقية

لن تمر » ولكن الكلام لا اذكره ...

الرئيس - وايه تانى فى المنشورات دى ... ؟

الشاهد - دى خطابات كانت بتيجى بكثرة من المرشد

للأخوان يوصيهم فيها بالصبر ...

الرئيس - وايه تانى فى المنشورات دى ... ؟

الشاهد - ده اللى اذكره .

الرئيس - والصبر ده عاوز منشورات ولا مقالة فى الجرنال ؟

الشاهد - على أى حال ؛ ممكن لسيادتك انك تطلع على

المنشورات دى ...

الرئيس - انا كنت باطلع عليها اول باول ، وعارفها اكثر منك ..

الرئيس - والتعليمات سبقها .. الاوامر المستديمة

الشاهد - ايوه ..

الرئيس - ايه هي تقدر تقول لنا حاجة عنها ؟

الشاهد - ...

الرئيس - عندكم تعليمات واوامر مش كده ؟

الشاهد - دى اول مرة اسمع عنها .

الرئيس - انت مش رديف لهنداوى ؟

الشاهد - انا بقالى شهر مع هنداوى وما افهمش حاجة

وهنداوى اخذ محمود من جماعتنا وقال مالكش دعوه بيه واحنا

مظلومين والله العظيم وهات هنداوى علشان اقول له الكلام ده فى وشه .

الرئيس - مين اللى كان يفتش على الاسلحة ؟

الشاهد - سيد الرئيس .

الرئيس - منين ده ؟

الشاهد - من بين السرايات .

الرئيس - بيجى يفتش على الاسلحة ليه ؟

الشاهد - كان بيجى يشوف السلاح صالح اولا .

الرئيس - شغلته ايه ؟

الشاهد - ما اعرفش .

الرئيس - واحد بيجى يفتش على الاسلحة يبقى شغلته

ايه فى الجهاز ؟

الشاهد - يبقى لازم مفتش اسلحة .

الرئيس - عندك حاجة تانية عايز تقولها ؟

الشاهد - احنا مظلومين انا واخويا ووالدتي ...

الرئيس - ما تقولش كده - انا ماليش دعوه بوالدك ووالدتك

واخواتك .. هو الاسلام قال كده .

الشاهد - انا واخويا ووالدى ميت .

الرئيس - اتبعوا مبدا الاسلام علشان تطلعوا شرفا على الاقل

الدفاع - الاسلام بيقول كل نفس بما كسبت رهينة .

الشاهد - ربنا يخليكم ويؤيدكم ...

الرئيس - مش عاوزين دعاك .. فيه مثل بيقول لا ام قويق

طاهره .. ولا دعاها مستجاب اتفضل مع السلامة .

(انصرف الشاهد)

الرئيس - الشاهد الذى يليه .

المدعى - حامد عبد الفتاح نويتو .

(نودى على الشاهد فحضر)

الرئيس - اسمك ايه ؟

الشاهد - حامد عبد الفتاح نويتو .

الرئيس - بتشتغل ايه ؟

الشاهد - طالب ومطبعجى .

الرئيس - طالب ومطبعجى ؟

الشاهد - طالب فى الثقافة .

الرئيس - ومطبعجى فين ؟

الشاهد - فى مكتبة الجامعة .

الرئيس - سنك كام سنة ؟

الشاهد - ٢٣ سنة .

الرئيس - عارف ده ايه ؟

الشاهد - ابوه مصحف .

الرئيس - قل والله العظيم اقول الحق ولا شىء غير الحق

والله على ما اقول شهيد .

(اقسام الشاهد اليمين) .

الرئيس - المدعى .

المدعى - هل أنت عضو في جماعة الاخوان المسلمين ؟

الشاهد - ايوه .

المدعى - ايه عملك اللى بتقوم به في الجماعة ؟

الشاهد - لغاية مارس سنة ١٩٥٤ كنت عضو عادى خالص وبعدين مصطفى الوردانى نائب الشعبة ادانى معاد اروح له في البيت وكنت جاي من المعهد الساعة ٨.٣٠ ورحت له البيت لقيت حلمى وحسن عبد العظيم ويوسف السيد وجه بعد كده حسن عبد المنعم ومصطفى الوردانى قال لنا كلنا ان فيه نظام عندنا في الاخوان ننتقى من الاخوان العاديين اخوان نحطهم في جماعات وندرّبهم على أسلحة ونخفيهم لما الحكومة تحتاجهم في حرب فلسطين او القنال فاحنا ندرّبهم ونخليهم لوقت الحاجة والحكومة تساعدنا في الحاجات اللى نعوزها فقلت له طيب مادام دى حاجة فيها استشهاد في سبيل الله مفيش مانع .

الرئيس - يا سلام .

الشاهد - كده والله يابيه

الرئيس - الاخوان بيعلموكم يابيه دى ؟

الشاهد - نعم .

الرئيس - الدين الاسلامى فيه يا بيه

الشاهد - لا .

الرئيس - امال بتخالف الدين الاسلامى وتقول يا بيه ليه ؟

الشاهد - ماخذتش بالى يافندم .

الرئيس - طيب خد بالك من فضلك .

الشاهد - احنا كنا اخدنا ميعاد من حسن عبد المنعم ورحنا

في يوم معين عنده في البيت وكنت انا ويوسف وحسن عبدالعظيم وحلمى عرفه واجتمعنا عند حلمى في اليوم ده .. مش فاكر

اجتمعنا عنده او عند حسن فقال قبل اى حاجه لازم تقوى
روحنا المعنوية ونحفظ سورة آل عمران وتفسيرها ونأخذ سيرة
ونخس في البرنامج الروحي ده فى الاول ومشينا على كده اربع
اجتماعات وبعدين انضم الينا سامى الكومى وهو وكيل نيابة
وعبد الحى واحمد حجازى وقال دول حيقوا معاكم فى الجماعة
وسامى الكومى كان بيقوم بالتفسير وكانوا بيحببوا لنا منشورات
ندرسها وبعدين جت فترة الامتحانات وأنا وحسن عبد المنعم
وحلمى عرفه كنا بنذاكر فآخذنا اجازة شهر ونصف وبعدها
اجتمعنا ثانى وكانت المنشورات بتيجى وكان فيها حاجات
غامضة كان هندأوى ييجى يشرحها وجه مره واحد اسمه
محمد عاكف علشان يتعرف علينا وقال كل واحد يقول اسمه
وبيشغل فين ومتجوز او اعزب وعنده اولاد او لا ومشى عاكف
وبعدين حسن عبد المنعم جه بدانا نجتمع وحلمى عرفه اتخلف
بعد اجتماعين او ثلاثه وبقينا نروح عند احمد حجازى ويوسف
عند حسن عبد المنعم وعبد الحى ابراهيم ومره فى الاجتماعات
جواب لنا حسن منشورات ومسندس وأنا كنت جيت
فلقيت حسن مسك مسندس وبشرح فيه ولما خلص خده
يوسف السيد وياه ومشينا وكانت بتجيلنا المنشورات ولغاية
تقريبا قبل كده بشهر ونصف او شهر ما اجتمعناش لان الاخوان
كان فيه خلاف بينهم وبين الحكومة وضد بعضهم وكان جه
ميعاد امتحان حسن عبد المنعم فى الجامعة ويقالنا شهر ونصف
تقريبا زى كده وكانت المنشورات بتجيلنا نوزعها وفيها حاجات
من المعاهده وحاجات زى كده . ده اللى اعرفه .

المدعى - ايه الغرض من التعليمات الروحية اولا ثم المسدسات؟

الشاهد - كانوا بيقلولوا علشان حنحتاجكم فى حرب فلسطين

أو القتال أو خارج البلاد وبندربكم علشان تكونوا مستعدين لما نقول لكم واحنا بقالنا ٣ اشهر ونصف أو أربعة من مارس واخذنا اجازة شهر ونصف للامتحانات والله العظيم ما نعرف غير كده وهم صحيح قالوا لنا خندربكم ولكن ما حصلش .

المدعى - انت قلت في اجابتك على هذا السؤال في التحقيق ان الفرض كان شيل الحكومه دى وحكم البلد بالقرآن بان تحصل ثورة ويستولى الاخوان على الحكم مش كلامك ده ؟

الشاهد - لا والله مش فاكّر .

الرئيس - ولا حد منكم فاكّر حاجه .. لا تعاليم القرآن ولا تعاليم الدعوه .. دى مش امضاءك ؟

الشاهد - ايوه .

الرئيس - انت راخر زى اخوك مضيت من غير ما تقرأ .

الشاهد - لا .

الرئيس - الحمد لله ... وايه حكاية المسدس اللى جابوه وفكوه قدامكم ؟

الشاهد - أنا كنت ساعتها رحت أجيب قلمين من البيت ورجعت لقيت حسن بيشرح فيه وبعدين أخذه يوسف وروح فاستنتجت ان مادام يوسف اخذه يبقى بتاعه ولكن ما اعرفش ان كان حسين أو يوسف هو اللى جابه .

وكيل النيابة - تعرف ان فيه اسلحة جات للفصيلة في امبابه ؟

الشاهد - مره كنت عند هنداوى وقال روح لمحمود عبد اللطيف انده له فرحت ومعايا محمد نجيب .

الرئيس - محمد نجيب مين ؟ رئيس الجمهوريه ؟

الشاهد - محمد نجيب راغب ورحنا له فقال طيب ورجعت فهنداوى ادانى شنطه وقال لى خد الشنطه دى روح بها المخزن

فقلت له مخزن ايه فقال بس روح قول لاخوك هنداوى باعت
الشنطة دى وبيقول وديها المخزن واخويا قال لى روح الوراق
عند واحد اسمه عبد الحميد البنا وقول له سيد كامل واعطيه
الشنطة فرحت وقت العشا مالميتوش فى البيت فسبته خبر
ييجى عندنا وجه واخذ الشنطة على بسكليت ورحت معاه
وصلته والشنطة كان فيها (برتين) ومش معقول ابدأ احنا
نعملها ضد المصريين هنا بل فى فلسطين او القنال وانا رح
وصلته بالعجله ورجعت ودى اول مره رح فىها .

الرئيس - عبد الحميد البنا بيقول انه كان عيان فى البيت
وانت اللى رح فىها .

الشاهد - لا . . حضرة المحقق يجيبه قدامى ويشوف اذا
كنت كذاب . . يوم ما كان عيان ده مره ثاينة وده كان فى الصبح
الساعة سبعة الا ثلث صباحا ندهنى اخويا وقال لى خد الطلقه
دى وهات زيبا من عند عبد الحميد فرحت له . وماكتش اعرف
طريقهم وفتحنا الشنطة وقعدنا نفرزهم سوى ويومها كان
محمود عبد اللطيف قاعد بياكل مع اخويا . وانا سبتهم ورحت
اكلت لوحدى ولبست وخرجت على شغلى .

وكيل النيابة - محمود عبد اللطيف كان عايز العشر طلقات
علشان ايه ؟

الشاهد - ماقاليش اخويا هو قال روح هات ١٠ زى
دول وتعالى .

وكيل النيابة - اخوك كان عارف ؟

الشاهد - ما اعرفش .

الرئيس - مقالش لك ان محمود مسافر ؟

الشاهد - لا والله .

الرئيس - جالك منشورات فى الاجتماعات ؟

الشاهد - أيوه .

الرئيس - زى ايه ؟

الشاهد - كانت تيجى حاجات نظرية وكان هنداوى

بييجى يشرحها لنا .

وكيل النيابة - عن ايه ؟

الشاهد - تكتيك حرب العصابات وهنداوى كان يشرحها لنا

وشرح لنا البرتا .

الرئيس - ما اتدريتش ؟

الشاهد - لا ماكانش جه دورى فى التدريب .

الرئيس - ماكانش فيه منشورات سياسية ؟

الشاهد - أيوه .. انا قلت ان فيه منشورات بتيجى عن

المعاهدة وحاجات زى دى

الرئيس - كنت بتكلفوا بتوزيع المنشورات ؟

الشاهد - أيوه .

الرئيس - وانت وزعت منشورات

الشاهد - أيوه .

الرئيس - فين ؟

الشاهد - فى الجامعة .

الرئيس - كام مره ؟

الشاهد - ٣ مرات .

الرئيس - كام منشور ؟

الشاهد - حوالى عشرة .

الرئيس - بتوزعهم ازاي ؟

الشاهد - باليد .

الرئيس - كان فيها ايه ؟

الشاهد - حاجات ضد الحكومة وكنا بتوزعها .

- الرئيس - عندك دراية بالاسلحة ؟
الشاهد - لا يا فندم .
الرئيس - اش عرفك انها برتا ؟
الشاهد - ماهو مدفع رشاش .
الرئيس - اش عرفك ان البرتا تبقى مدفع ومدفع رشاش ؟
الشاهد - انا اعرف ان فيه البرتا والبرن واللاتكستر .
الرئيس - عرفت الحاجات دى منين . . سمعتها منين ؟
الشاهد - بنقرا فى الجرائد كل يوم .
الرئيس - الجرائد بتذكر اسماء الاسلحة وانواعها ؛
الشاهد - بنقول عن الجيش وانه بيدرب على كذا . .
وكيل النيابة - عبد الحميد البنا كان عنده اسلحة ثانية ؟
الشاهد - ايوه كان عنده ٣ شنط .
وكيل النيابة - ماتعرفش فيها ايه ؟
الشاهد - لا .
وكيل النيابة - هو كان عارف ان فيها سلاح .
الشاهد - ماعرفش .
وكيل النيابة - مين الى راح جاب العشر طلقات ؟
الشاهد - انا يا فندم وكان عنده عدة لف .
الرئيس - ايه هو الفرقان ؟
الشاهد - هو القرآن .
الرئيس - اشمعنى سموه الفرقان ؟
الشاهد - علشان ييغرق بين الحق والباطل .
الرئيس - برافو . . وسورة آل عمران قالت كمان ؟
الشاهد - فى ايه يا فندم .
الرئيس - ايه الدروس الى طلعت بيها من سورة آل عمران ؟
الشاهد - كنت حفطت ٣٠ او ٢٥ آية وماكملتش .

الرئيس - ايه الدروس اللى طلعت بيها من الآيات دى ؟

الشاهد - اننا نعامل ربنا كويس .

الرئيس - وانت تقدر تعامل ربنا وحش ؟

الشاهد - لا يا فندم .

الرئيس - يعنى ما طلعتش من ٣٥١ آية الا بانك تعامل ربنا

كويس وتعامله كويس ازاي ؟

الشاهد - نصلى .

الرئيس - وتشيلوا برتات ومدافع وتوزع منشورات .

الشاهد - والله انا غلبان ولا كنت اعرف النظام ده واسرتى

مالهاش الا انا واخويا .

الرئيس - ماتشد نفسك . . الظاهر انت واخوك طراى . . لو

كنت اتعلمت التكتيك العنيف كنت جمدت .

الشاهد - والله يا فندم ابدا ولو كنت اعرف انها كده ما كنتش

دخلت فيها .

الرئيس - شد نفسك امال واقف زى الناس .

المدعى - ذكرت انكم جات لكم منشورات عن حرب العصابات

وحسن ما قدرش يشرحها فجه هنداوى شرحها لكم ايه المقصود

من حرب العصابات اللى درستوها ؟

الشاهد - لما نخلص معركة فى قرية من القرى ونظهر

البيوت والمبانى من الالغام وحاجات زى دى يا فندم .

المدعى - ده فى الدفاع او الهجوم ؟

الشاهد - تفتيش المنازل او الحراسة .

الرئيس - منازل مين ؟

الشاهد - لما نكون خلصنا معركة فى قرية من القرى وفيها

بيوت جماعة تقتحم وجماعة تظهر الالغام وحاجات زى كده . .

الدفاع - كانوا بيدوكم فلوس ؟

الشاهد - لا يا افندم والله كنا بتدفع اشتراكات شهرية .

الرئيس - كنت بتجيب الفلوس منين ؟

الشاهد - من القبضية بتاعتي

الرئيس - بتاخذ كام ماهية ؟

الشاهد - يوميتى ٤٣ قرش .

الرئيس - يعنى بتاخذ فى الشهر كام ؟

الشاهد - حوالى ١٢ جنيه .

الرئيس - والله ما تستاهل ١٢ مليم .

الشاهد - كانت ماهيتى الاصلية ٩ جنيه وبعدين زدت

واخذنا الكادر بتاعنا كده .

الدفاع - وكنت بتدفع اشتراك كام ؟

الشاهد - عشرة قروش فى النظام العادى وخمسة عشر

قرشا فى النظام الخاص .

الدفاع - اخوك كان فى ايده ميزانية ؟

الشاهد - ايوه .. كان امين صندوق .

الرئيس - بقى انت شكل واحد بياخذ من الدولة ١٢ جنيه .

الشاهد - كنت باخذ ٩ جنيه قبل كده وبعدين زدت بقالى

حاجة بسيطة .

الرئيس - بتشتغل ايه ؟

الشاهد - مطبعى .

الرئيس - مطبعى ايه ؟

الشاهد - فى ورشة التجليد بمكتبة الجامعة .

الرئيس - كنت بتجلد كام كتاب فى اليوم ؟

الشاهد - كنا ثلاثة او اربعة فى العملية كان فيهم ٣ يقوم

بالمرمه بتاع الكتب واثنين ..

الرئيس - انتم خمسة او ثلاثة ؟

الشاهد - خمسة

الرئيس - طيب مع السلامة .

الشاهد - والله تعملوا معروف وارفوا بحال الاسرة مالها

غيرى انا واخويا ربنا يخليكم .

الرئيس - كلمة واحدة .. مع السلامة .

(انصرف الشاهد) .

الرئيس - ترفع الجلسة للاستراحة .

(رفعت الجلسة في الساعة الحادية عشرة والدقيقة الاربعين

صباحا) .

(أعيدت الجلسة في الساعة الثانية عشرة والدقيقة الخامسة

والعشرين مساء) .

الرئيس - فتحت الجلسة .. المدعى .. الشاهد الذى يليه

المدعى - اسماعيل محمود .

(نودى على الشاهد فحضر)

الرئيس - اسمك ايه ؟

الشاهد - اسماعيل محمود يوسف .

الرئيس - سنك كام سنة ؟

الشاهد - ٣٠ سنة .

الرئيس - بتشتغل ايه ؟

الشاهد - مدرس .

الرئيس - مدرس ايه ؟

الشاهد - مدرس مواد اجتماعية .

الرئيس - متخرج منين ؟

الشاهد - من كلية الآداب .

الرئيس - فى مدرسة ايه ؟

الشاهد - فى مدرسة عباس الاعدادية .

الرئيس - تعرف ده ايه ؟

الشاهد - مصحف .

الرئيس - قل والله العظيم اقول الحق ولا شيء غير الحق
والله على ما اقول شهيد .

اقسم الشاهد اليمين

الرئيس - المدعى .

المدعى - هل انت عضو في جمعية الاخوان ؟

الشاهد - نعم .

المدعى - في اى منطقة ؟

الشاهد - فى الجيزة .

المدعى - ايه العمل بتاعك اللى كنت بتقوم بيه ؟

الشاهد - من شهرين لم يكن لى عمل معين ولكن حينما
اعتقل رئيس المنطقة الاستاذ يوسف هارون قمت بعمله .

الرئيس - زعق شويه .

الشاهد - حاضر .

الرئيس - انت بتدرس ايه .. عندك كام تلميذ فى الفصل ؟

الشاهد - ٤٠ .

الرئيس - عايزين الاربعين واحد يسمعو .

الشاهد - حاضر .

المدعى - ايه العمل اللى كنت بتقوم بيه ؟

الشاهد - كنت اشرف على الشئون الادارية فى المنطقة بدل

الاخ يوسف هارون . لما اعتقل .

المدعى - عملك كان ايه ؟

الشاهد - الناحية الادارية .

المدعى - يعنى بتعمل ايه ؟

الشاهد - الاشراف الادارى .

المدعى - يعنى مفيش نشاط سرى خاص بالجماعات
والفصائل ؟

الشاهد - كنت اعرف .. ولكن ماكنتش مسئول عنه .

المدعى - ايه معلوماتك عنه ؟

الشاهد - كنت اعلم ان فيه نظام خاص برياسة الاخ

محمود الحواتكى .

المدعى - كان عمله ايه ؟

الشاهد - رئيس فصيلة .

المدعى - مكونة ازاى الفصيلة ؟

الشاهد - ٤ مجموعات .

المدعى - والمجموعة مكونة ازاى ؟

الشاهد - المجموعة مكونة من ٧ افراد .

المدعى - واجبهم ايه ؟

الشاهد - ما اعرفش .

المدعى - افراد المجموعات يعرفوا بعض ؟

الشاهد - ما اعرفش .

المدعى - الاخوان يعرفوهم ؟

الشاهد - ما افتكرش .

المدعى - تعرف رؤساء المجموعات ؟

الشاهد - ايوه اعرفهم .

المدعى - مين هم ؟

الشاهد - صلاح ابو الخير وتوفيق شلبى وعبدالفتاح موسى .

المدعى - ايه نشاط الجماعات دى .. ماسمعتش اخبار عن

نشاط حيقيم به الاخوان .

الشاهد - ايوه سمعت كان فيه اخ فى يوم قال ان فيه نشاط

والإخ ده كان حلقة اتصال

الرئيس - انت بتقول انك فى المنطقة بس .

الشاهد - إيوه .

الرئيس - اش عرفك برؤساء المجموعات ؟

الشاهد - من الإخ محمود الحواتكى عرفنى بيهم .

الرئيس - قال لك ايه ؟

الشاهد - محمود الحواتكى كان مشغول وقال لى تجتمع

بيهم .

الرئيس - علشان ايه ؟

الشاهد - اجتماعات اسبوعية علشان ماتنقطعش الصلة بينهم

الرئيس - كنت بتجتمع معاهم علشان ايه ؟

الشاهد - الدراسات .

الرئيس - وبعدين ؟

الشاهد - وبس .

الرئيس - اشمعنى رؤساء المجموعات ؟

الشاهد -

الرئيس - قول لنا ايه اللى فهمه لك ؟

الشاهد - عرفنى بيهم وقال لى دول رؤساء المجموعات فى

الجيزة وهو كان اتخرج من معهد التربية ومشغول فى مسألة

تعيينه واخذ اجازة علشان يخلص مسألة التعيين فقال لى خد

بالك منهم وبعدين يبقى يستلمهم ثانى منى .

الرئيس - وبعدين ؟

الشاهد - وبس ... ده من حوالى شهر .

الشاهد - إيوه .

الرئيس - ومسكت محله ؟ وبعدين ؟

الشاهد - كنت التقى بهم اسبوعيا لحفظ القرآن والدراسة
وده كل الى حصل في هذا الشهر .

الرئيس - ايه حكاية حلقة الاتصال ؟

الشاهد - كان فيه عضو معين مكلف بالاتصال .

الرئيس - اسمه ايه ؟

الشاهد - خليل .

الرئيس - خليل ايه ؟

الشاهد - ما اعرفش باقى اسمه وكان مكلف بالاتصال وتبلغ

أوامر الجماعة لنا وفي يوم ..

الرئيس - امتى ؟

الشاهد - قبل الحادث بخمسة ايام قال انه سمع من بعض
الاخوان ان المسؤولين يفكروا في القيام بحركة اغتيالات لأعضاء
مجلس قيادة الثورة ويقوموا بحركة شعبية ... بعد كده انا
قلت له ان دى مسألة خطيرة ونزلت رحت لمحمود الحوانكى وقلت
له فقال ان دى مسألة خطيرة ولازم أروح اشوف ايه الحكاية
فنزلت واتصلت ببعض الاخوان المسؤولين ورجع ومعااه الأخ
عبد الفتاح القرشى وقال انه قابل أحد الاخوان المسؤولين فقال
له ان هذا الكلام ليس له نصيب من الصحة وان المرشد لاوافق
عليه وبناء عليه انا اغلقت المنطقة ونهت على الاخوان ان كل واحد
يقعد في بيته وما يتلقاش تعليمات ودى آخر حاجه عملناها في
المنطقة .

وكيل النائب العام - خليل ده الى كان يبلغك دائما التعليمات
الى تيجى من المركز العام عمله ايه او وظيفته ايه ؟

الشاهد - كان خليل حلقة صلة بين منطقة الجيزة وبين
المسؤولين في المركز العام .

وكيل النائب العام - الكلام الى يبلغه او التعليمات التى تبلغ

لكم من المركز العام بواسطة خليل وقال لك ان فيه خطة وضعت
لاغتيال اعضاء مجلس قيادة الثورة . هل هذا عبارة عن تبليغ من
المركز العام او تعليمات ؟

الشاهد - لم يقل ان هذا تبليغ انما هو قال انه سمع ان
الاخوان حيعملوا كذا وكذا وانا لم استوضح منه هل هذا مبلغ
لنا رسميا او لا .

وكيل النائب العام - هل كان هو دائما يتصل بك للتبليغ ؟

الشاهد - هو المسئول عن التبليغ

وكيل النائب العام - وهو لما يقول ان فيه خطة او تبليغ
يبلغها منين او كان ينتقل رأى مين لك ؟

الشاهد - من المسئولين في المركز العام .

وكيل النائب العام - وهو كان ينتقله لك او يبلغه لك بصفتك

رئيس المنطقة او رئيس الفصيلة ؟

الشاهد - انا مش رئيس فصيلة ورئيس الفصيلة كان
الحواكى .

وكيل النائب العام - كنت رئيس فصيلة بالنيابة عن الحواكى
وكان يبلغك التعليمات بصفتك ايه وايه الى قال لك او ايه الخطة
التي بلغها لك خليل ؟

الشاهد - قال لى باختصار ان الاخوان ناوين يفتالوا بعض
اعضاء مجلس قيادة الثورة وان الاخوان حيقوموا بحركة شعبية
بعد هذا .

وكيل النائب العام - ماسألتوش ان الحركة الشعبية دى
حتقوم ازاي ؟

الشاهد - قال لى انا لسه معنديش تفصيلات أكثر من هذا .

وكيل النائب العام - قال لك انا ماعنديش تفاصيل وفى
الوقت المناسب الاخوان حيبلفوك .

الشاهد - ايوه .

وكيل النائب العام - مين المسؤولين اللى يتصل بهم خليل ؟
الشاهد - انا لا اعرف المسؤولين وانما اعرف انه يتصل
بالمركز العام واشخاصهم لا اعرفهم .

وكيل النائب العام - طيب مين المسؤولين عن النظام السرى ؟
الشاهد - ما أعرفش .

وكيل النائب العام - ماتعرفش ابراهيم الطيب ؟
الشاهد - ايوه .

الرئيس - وجه الكلام ليه . انتم مش علموكم النظام فى
الجهاز السرى ؟

الشاهد - ايوه .

الرئيس - وعلموكم انكم تسمعونوا الاوامر بدون ان تناقشوها .
الشاهد - فيه مناقشة وابداء رأى .

الرئيس - وبعدين .

وكيل النائب العام - اين قابلت ابراهيم الطيب ومتى ؟
الشاهد - هوه دعا رؤساء المناطق فى اجتماع عشان تنظيم
لجان لمساعدة اسر المعتقلين وهذه كانت آخر مرة فى منزل فى
العباسية قبل الحادثة بعشرة ايام .

وكيل النائب العام - انت ماكلمتناش عن الخطة .

الشاهد - هو كلمنا عن تنظيم لجان لمساعدة اسر المعتقلين
وكيل النائب العام - بصفتك رئيس الفصيلة بالنيابة .

الشاهد - معرفش انما محمود الحواتكى كلفنى ان اقوم
مقامه الى ان يعين فى الوظيفة .

وكيل النائب العام - هل من المفروض انه يخفى عليك الامر
انت مش كنت قائم بعمل رئيس الفصيلة ؟

الشاهد - دى كانت حاجة خاصة بينى وبين محمود الحواتكى .

وكيل النائب العام - عملت رئيس فصيلة لمدة ادايه ؟

الشاهد - شهر الى ان تم تعيين محمود فى وزارة المعارف .

وكيل النائب العام - ماتعرفش مين المسئول عن رؤساء المناطق ؟ او رؤساء الفصائل يتصلون بمين ؟

الشاهد - معرفش غير خليل الذى يبلغنا التعليمات .

وكيل النائب العام - مين رؤساء المناطق الى حضروا اجتماع العباسية معاك ؟

الشاهد - لا اعرفهم لان هذه كانت اول مرة وآخر مرة .

وكيل النائب العام - اشرح الخطة التى بلغت اليك من خليل بالبدء فى اغتيال أعضاء مجلس قيادة الثورة .

الشاهد - هو بلغنى باختصار أنه سسمع بعض الاخوان يفكرون فى اغتيال أعضاء مجلس قيادة الثورة وبعدين الاخوان يقوموا بحركة شعبية فقلت له دى مسألة خطيرة وانا سمعت هذا الكلام فجيت ابلغك فانا اتصلت بمحمود الحواتكى فقال لى دى مسألة خطيرة ولازم اروح اشوف ايه الحكاية فنزل وكان معاه عبد الفتاح القرشى عشان يتصل بالمسؤولين وبعدين رجع وقال لى ده كلام غير صحيح والمرشد لا يوافق عليه وبناء عليه اغلقنا المنطقة .

وكيل النائب العام - الحركة الشعبية اساسها ايه او ايه هدف الحركة الشعبية ؟

الشاهد - ما اعرفش لانه ما ادايش تفاصيل خالص .

وكيل النائب العام - تقوم ازاى الحركة الشعبية افرض انه حصلت الاغتيالات والخطة اتنفذت يحصل ايه ؟

- الشاهد - الحركة الشعبية تهتف بشخصية معينة عظيمة .
وكيل النائب العام - مين ؟
الشاهد - استنتجنا ان الشخصية العظيمة دى هى اللواء محمد نجيب .
الرئيس - (لاحظ ان الشاهد ينظر الى الادعاء) أعوج رقبتك وبص لى .
وكيل النائب العام - استنتجت من ايه ؟
الشاهد - يقول الهتاف حيكون لشخصية عظيمة فاستنتجنا ان الشخصية العظيمة ربما تكون اللواء محمد نجيب .
وكيل النائب العام - مقالش لك انه صدرت تعليمات لشخص معين للبدء فى تنفيذ الخطة .
الشاهد - لا .
وكيل النائب العام - تعرف هنداوى دوير ؟
وكيل النائب العام - الم تقابله قبل سماع التعليمات ؟
الشاهد - لا ما قابلتوش .
الرئيس - ايه فائدة النظام الخاص ؟
الشاهد - الذى اعرفه انه تربية الشباب تربية فيها شيء من الخشونة وتربية من الناحية العسكرية بجانب التربية الروحية كالنط والقفز والجرى هذا كل الذى نفهمه عن النظام .
الرئيس - النظام الخاص علنى او سرى ؟
الشاهد - معظم الاخوان لا يعرفوه .
الرئيس - يعنى يبقى سرى او علنى ؟
الشاهد - سرى .
الرئيس - النط والقفز والتربية البدنية ايه السرية الى فيها .
الشاهد - مفيهاش سرية ؟

الرئيس - يبقى سرى ليه ؟

الشاهد - بقية الاخوان مايعرفوش هؤلاء الاعضاء .

الرئيس - ليه ؟ اذا كان الجهاز السرى يتنطط ويتربى تربية

جسمانية سليمة فليه الاخوان الآخرين مايعرفوش .

الشاهد - اللى اعتقده انهم كانوا ينقوهم ولايقولون للآخرين

حتى لايقول الباقي اشـمـعنى تنقوا دول وتدريبهم تدريب

خاص ويقومون برحلات .

الرئيس - يعنى كان فيه خيار وفقوس فى الدعوة الاسلامية ؟

الشاهد - هذا ما استنتجته ليه عملوها سرية علشان

الآخرين مايزعلوش .

الرئيس - يعنى كانوا يفضلوا او يميزوا ناس على ناس ؟

الشاهد - طبعا ده اللى اعرفه .

الرئيس - ده الفرض من السرية .

الشاهد - اللى استنتجته .

الرئيس - وحضرتك مدرس ؟

الشاهد - أبوه .

الرئيس - اهلا وسهلا وايه الفرض من الفصائل

والمجموعات ؟

الشاهد - انا مكنتش فيها واللى اعرفه انها زى الشعب

بتاعة الاخوان .

الرئيس - طيب ليه تبقى سرية مش يبقى الفرض اللى

فهموهولكم عنها غير حقيقى ؟

الشاهد - انا قلت لحضراتكم ان الشهر اللى كنت فيه رئيس

فصيلة مؤقت لم يحصل فيه الا اربع اجتماعات عادية .

الرئيس - ايه السرية فى هذا النظام من ناحية التربية البدنية

فاستنتجت انها كانت سرية على الآخرين علشان مايقولوش

اشمعى وبعدن اشتغلت شهر رئيس فصيلة ومكنش فيه
تربية بدنية يبقى اذن مفيش ما يدعو للسرية .

الشاهد - انا لم اقم باى نشاط غير الاجتماعات العادية وعلى
اساس انها حاجة مؤقتة لغاية مايجي محمود ويستلمها .

الرئيس - ايه معلوماتك عن النظام السرى ؟

الشاهد - فيه شباب معين يختار من افراد الشعب . ويكون
وصل الى مرحلة معينة من التربية الجسمانية فيدرّب تدريب

فيه شىء من الخشونة العسكرية وعلى الرحلات .

الرئيس - ايه الغرض من التربية العسكرية ؟

الشاهد - للجهاد

الرئيس - جهاد ايه ؟

الشاهد - فى القتال وفلسطين كما كنت اظن .

الرئيس - فى القتال وفلسطين كما كنت تظن امال كنت

تفكر ايه ؟

الشاهد - ده اللي كنا نفتكره لكن دلوقتى الانجليز

الرئيس - زعق

الشاهد - اعتقد ان الاخوان فى النظام بيستعدوا للقتال فى

فلسطين او القتال .

الرئيس - وهل الجهاد فى فلسطين او القتال يكون بالتربية

البدنية ؟

الشاهد - والتربية العسكرية فى حينها ولم يدربوا عسكريا

الرئيس - التربية العسكرية . ويستلزم ايه التدريب

العسكرى ؟

الشاهد - التدريب على اطلاق النيران .

الرئيس - منين تعرف انهم ما ادربوش على اطلاق النيران ؟

الشاهد - لانى ما ادربتش

الرئيس - اش عرفك

الشاهد - معنديش معلومات

الرئيس - احنا بنكلم عن الجهاز السرى

الشاهد - دى معلوماتى

وكيل النائب العام - كان فيه معسكر فى كرداسة

الشاهد - سمعت

وكيل النائب العام - مارحتش تدرب فيه

الشاهد - لا

وكيل النائب العام - هل كنت فى الحرس الوطنى ؟

الشاهد - لا ولم اطلق النار فى حياتى . ومعسكر كرداسة

كان يقام فى الصيف باشتراك ...

وكيل النائب العام - انت كنت احد اعضاء الجماعة . والسلاح

جالكم اخيرا وكنتم بتدربوا دوريا فى معسكر كرداسة .

الشاهد - قلت انى سمعت ان فيه معسكر فى كرداسة وكانوا

بيدفعوا اشتراك خمسة قروش وهذا كل ما عرفناه عن كرداسة

وكيل النائب العام - مجموعتكم لم تدرب

الشاهد - لا .

الرئيس - لما كنت فى المجموعة كانت غرضها ايه ؟ المعروف ان

المجموعة الذى كنت فيها جزء من الفصيلة والفصيلة جزء من

المنطقة والمنطقة جزء من النظام العام للاخوان فهل الفصيلة وهى

جزء من المنطقة كانت من الجزء العلنى ؟

الشاهد - طبعا مش علنية .

الرئيس - يعنى سرية نظام خاص فتبقى جزء من النظام

الخاص وانت كنت احد اعضاء النظام الخاص امال ليه انت بتقول

انك مادخلتش الا لما مسكت بدل محمود الحواتكى .

الشاهد - حضر اجتماع رؤساء المناطق فى العباسية .

الشاهد - انما ما كنتش مسئول عن الفصيلة الا لما كنت بدل
الحواتكى .

الرئيس - هوه ده اللى علموكم عن الاسلام مش علموك ان تكون
صريح وتبين كلامك ولا تغش ولا تدور .

الشاهد - ايوه .

الرئيس - طيب ماتقول انك انت احد اعضاء النظام السرى
الخاص .

الشاهد - انا قلت هذا فى اقوالى فى التحقيق

الرئيس - نحب نسمعه فى المحكمة

الشاهد - ايوه .

الرئيس - ايه التدريب العسكرى اللى ادرت عليه ؟

الشاهد - ما ادربتش عسكريا ، انما كان تدريب بدنى نروح
معسكرات بس كده .

الرئيس - وايه التدريب البدنى ده وفى اى معسكر ؟

الشاهد - رحت معسكر كرداسة .

الرئيس - انت لسه بتقول انك ما رحتش كرداسة وانك
سمعت عنه بس .

الشاهد - كانوا بيعملوا اعلان فى الشعبة عن المعسكر وبعض
الاخوان كانوا يقضوا بعض ايام هناك بعد دفع الاشتراك .

الرئيس - والله انكم وصتمتم المسلمين وانكم وصمة فى جبين
المسلمين واعتقادی الشخصى ان الاسلام لم يصل الى هوة كما
وصل على يد جماعة الاخوان المسلمين لانكم كلكم كذابين

وكيل النائب العام - هل فهمت من خليل الذى بلغك الخطة
الموضوعة ان التعليمات ابلغت لمناطق اخرى ؟

الشاهد - ماقالش .

وكيل النائب العام - اليس هو المكلف بتبليغ الخطة من الرئاسة

الى المناطق ؟

الشاهد - ما أعرفش معنديش معلومات .

وكيل النائب العام - وايه اللي عملته بعد ان أبلغك خليل
بالاغتياالات التي تدبر ؟

الشاهد - قلت للاخ محمود الحواتكى لاني شكيت في الامر
خاصة وان الخبر خطير فقال لى لما أروح استطلع الحقيقة ونزل
هو وعبد الفتاح القرشى وقابل الاخ محمود والمسئولين .

وكيل النائب العام - هل سبق ان أبلغك خليل تعليمات او كلام
ظهر بعد ذلك انه كذب ؟

الشاهد - طبعاً لا .

وكيل النائب العام - أمال ليه شكيت ؟

الشاهد - لخطورة التعليمات ولما بلغتها لمحمود نزل مع عبدة
الفتاح القرشى ولما رجع قال لى انه اتصل بأخ موثوق بيه ونفى
الخبر .

وكيل النائب العام - احنا في خليل هل سبق أن أبلغك كلام
كذب وايه الاجراء اللي اتخذهت لتمنع هذه الكارثة ؟

الشاهد - أمرنا الاخوان كل واحد يقعد في بيته كل اخوان
المنطقة .

وكيل النائب العام - هل بلغت رؤساء المجموعات ؟

الشاهد - لا .

الرئيس - أمال بلغت مين ؟

الشاهد - لايجيب

وكيل النائب العام - اليس المفروض أن النظام الادارى هو
الذى يقوم بالحركة الشعبية وانت مسئول عن هذا النظام ؟

الشاهد - الاخ محمود كان موجود وقررنا انا وهو . هو يبلغ
الناحية الخاصة به وانا أبلغ الناحية الخاصة بى .

الرئيس - انت مش قررت دلوقت ان محمود كان فى اجازة من الفصيلة فهل يصح انه يرجع فى الاجازة ويترأس الفصيلة ؟

الشاهد - ماكنش فى اجازة ده كان مجرد اذن بالغياب

الرئيس - يعنى الفى الاجازة ؟

الشاهد - كنت لسة متفاهم معاه .

الرئيس - لكن الى هذه اللحظة انت كنت مسئول عن الفصيلة

فهل ابلغت رؤساء المجموعات ؟

الشاهد - لا .

الرئيس - اسمهم ايه ؟

الشاهد - سعد ربيع وعبد الفتاح القرشى .

الرئيس - ودول من النظام الخاص والا لا ؟

الشاهد - ابوه

الرئيس - تبقى انت بلغت ناس فى النظام الخاص

الشاهد - المسئولين عن الناحية الادارية غير المسئولين عن

النظام الخاص

الرئيس - مين الوكيل بتاعك فى الشعبة ؟

الشاهد - مليش وكيل لانى رئيس منطقة مؤقت .

الرئيس - مؤقت هنا ولا تعرف شيئاً عن النظام الخاص رغم

انك عضو فى احدى المجموعات وقلت انك سمعت عن معسكر

كرداسة ومع ذلك ثبت انك رحى معسكر كرداسة واتمرنت فيه

الشاهد - مفيش تمرينات ده كان برنامج رياضى .

الرئيس - وانا ما قلتش انك اتمرنت على حاجة ثانية فليه

شكيت فى التمرين اللى قلت عليه

الشاهد - مشكتش فى حاجة .

الرئيس - طيب بتنفى التمرين ليه ؟

الشاهد - كانت برامج رياضية بس

الرئيس - تدريب أو تمرين . كمل وبعدين
الشاهد - بس قررنا غلق المنطقة وأمرنا ان ما حدش من
الاخوان يتصل بأحد .

وكيل النائب العام - هل يجتمع النظام السرى فى المنطقة ؟
الشاهد - لا

وكيل النائب العام - آمال يجتمع فين ؟
الشاهد - فى البيوت

وكيل النائب العام - ايه علاقة قفل المنطقة والاخوان لا يتصلوا
بأحد ويعدوا فى بيوتهم اذا كان المفروض انهم يجتمعوا سرا .
الشاهد - كانوا يجتمعوا بمجرد ...

الرئيس - هل يمكن لأحد أعضاء النظام الخاص أن يتصل
بأحد أفراد المجموعات الأخرى عن غير طريق رئيس القفيلة ؟
الشاهد - لا .

الرئيس - اذن يبقى الحاجة المعقولة انك تسبب المنطقة
مفتوحة آمال ليه انت قلت لهم اغلقوا المنطقة ؟

الشاهد - خوفا من أحد يعمل حاجة من نفسه .

الرئيس - ما انت تقدر لما يدريك تعليمات ماتبلغهاش
الشاهد - يصح ينفذ .

الرئيس - مش لما تقول له ماتلقاش أوامر مش ينتظر ؟
الشاهد - واجب يقول .

الرئيس - المسألة تبقى تأدية واجب شكلية .

الشاهد - من الناحية العملية هو المسئول عن كل تصرفاته
من ناحية الاتصال . لكن احنا قررنا قفل المنطقة وما حدش
يتصل بحد وكل واحد يقعد فى بيته .

الرئيس - لما يقعدوا فى بيوتهم ما يروحوش شغلهم ؟

الشاهد - لا . بعد الشغل ما يتصلوش بحد .

الرئيس - وما يقعدوش في القهوة ؟

الشاهد - لا يقعدوا في القهوة .

الرئيس - كان قبل الحادثة بأد ايه ؟

الشاهد - حوالى يومين .

وكيل النائب العام - هل تعرف على عبد المنعم .

الشاهد - نعم .

وكيل النائب العام - هل كان عضو في النظام الخاص ؟

الشاهد - اسمع انه من النظام الخاص .

وكيل النائب العام - وتعرف ايه عن الاسلحة التى ضبطت

عنده ؟

الشاهد - ما أعرفش .

وكيل النائب العام - مش انت رئيس فصيلة ؟

الشاهد - انا كنت رئيس مؤقت بس ومعديش معلومات .

وكان نشاطى مؤقت الى ان يتعين محمود وكنت اجتمع بالاخوان

اجتماعات عادية .

وكيل النائب العام - لما سلمك الرئاسة معرفتش مكان

الاسلحة .

الشاهد - لا .

الرئيس - ايه نظلم تسليح الجماعة ؟

الشاهد - ما عنديش معلومات واسعة في الحكاية دي .

الرئيس - لما كنت عضو في الجماعة مش كنت تعرف ان
الفصيلة مكونة من اربع جماعات وكل جماعة لها رئيس ورديف

الشاهد - كل معلوماتى ان الفصيلة مكونة من ٢٨ شخص

ومقسمة الى اربع جماعات كل جماعة تتكون من سبعة اشخاص

الرئيس - والرئيس والرديف يقوا ٣٠ والا الرئيس والرديف

من ضمن الجماعات .

الشاهد - ما عنديش معلومات واسعة في الحنة دي

الرئيس - بتفرقوا ما بين الحنة والحنة ازاي ؟

الشاهد - حنة ازاي

الرئيس - كل حاجة عندكم حنة

الشاهد - ما عنديش معلومات

الرئيس - قلت في اقوالك في التحقيق ان خليل ابلغك ان
الخطه تبدأ باغتيال الرئيس جمال

الشاهد - ايوه

الرئيس - ماقلتش ليه هنا دلوقتى

الشاهد - قلت ان فيه فكرة لاغتيال بعض أعضاء مجلس

قيادة الثورة

الرئيس - اذكر لنا كل تفاصيل الخطه كما بلغت اليك

الشاهد - قال انه سمع من بعض المسؤولين هناك ان فيه

خطه لاغتيال أعضاء مجلس قيادة الثورة ومنهم الرئيس جمال

ثم قيام الاخوان بحركة شعبية وتهتف باسم شخصية عظيمة
معينة .

الرئيس - تبدأ خطه الاغتيال بالرئيس جمال او يكون منهم

الشاهد - قال لى منهم الرئيس جمال ثم يقوم الاخوان

بحركة شعبية تهتف باسم شخصية معروفة استنتجنا انها
محمد نجيب .

الرئيس - مين استنتج ؟

الشاهد - احنا كلنا

الرئيس - مين ؟

الشاهد - انا ومحمود .

الرئيس - هل كان خليل حلقة اتصال بينكم وبين المركز العام ؟

الشاهد - أيوه

الرئيس - ما هي الاوامر التى ابلغها لكم قبل هذا ؟

الشاهد - اوامر ادارية

الرئيس - زى ايه ؟

الشاهد - زى الاجتماع بتاع رؤساء المناطق لرعاية أسر المعتقلين والاوامر دى كان القصد منها ان كل منطقة تكون لجنة من عدة افراد لرعاية أسر المعتقلين ودرس حالتها وعما اذا كانت تحتاج لاي شئ وعلى المجموعات ان تحاول ان تساعد كل أسرة من هذا القبيل

الرئيس - وانتهيتم على ايه ؟

الشاهد - اخذنا هذه التعليمات وكنا بصدد تكوين هذه

اللجان .

الرئيس - هل هذه هي المرة الوحيدة التى اتصل بك فيها ؟

الشاهد - أيوه

الرئيس - بس المرة دى التى اتصل بك فيها فى مدة الشهرين

بتوع رياستك للمنطقة .

الشاهد - أيوه بس

الرئيس - مين قال لك عليه انه ضابط اتصال ؟

الشاهد - هو خليل قدم لى نفسه وقال لى انا فلان من

اخوان بين السرايات والصلة بين المنطقة والمسؤولين فى المركز

العام .

الرئيس - ازاي تثق فيه وانت لا تعرفه ؟

الشاهد - اتصلت بالحواتكى وقال لى انه فعلا من الاخوان .

الرئيس - هل تعرف محمود عبد اللطيف

الشاهد - لا

الرئيس - تعرف مين فى منطقة امبابه ؟

الشاهد - ما اعرفش حد

الرئيس - ما تعرفش هنداوى دوير ؟

الشاهد - قابلته مرة في اجتماع رؤساء المناطق
الرئيس - تعرف ابراهيم الطيب ؟
الشاهد - عرفته في اجتماع رؤساء المناطق ولم اكن اعرفه
قبل ذلك .

الرئيس - مين اللى ضمك لجماعة الاخوان ؟
الشاهد - من حوالى سنة ١٩٤٩ او ١٩٥٠ بدأت انضم
لشعبة الجيزة وكنت قبل هذا التاريخ اسمع محاضرات في
المركز العام

الرئيس - ايه السبب في انك حببت تتأكد من شخصية
خليل وتروح تسال الحوانكى ؟

الشاهد - لانه قدم لى نفسه وقال لى انه الصلة بينى وبين
المركز العام ولم اكن اعرفه وكنت عايز اعرف ان كان اخ ولا لا
الرئيس - امال منتظر انه يقول لك ايه ؟

الشاهد - انا حببت انى اتأكد انه اخ صحيح وان كان حد
يعرفه من المنطقة او لا

الرئيس - اخ او مش اخ مسلم او غير مسلم

الشاهد - محمود قال لى ايوه اعرفه

وكيل النائب العام - متى تشكل النظام الخاص بالوضع
الجديد ؟

الشاهد - معنديش معلومات ومحمود هو الذى يعرف
المعلومات .

وكيل النائب العام - مش كنت رئيس منطقة بقى لك اد ايه ؟
الشاهد - انا عملت رئيس منطقة من شهرين ومعنديش
معلومات

وكيل النائب العام - متى انضمت الى المجموعة ؟

الشاهد - من شهرين او ثلاثة

وكيل النائب العام - لما تشكلت المجموعات قبل كده مش
كنت عضو فيها وعاصرت تشكيل المجموعات فى الاول ؟

الشاهد - أيوه

وكيل النائب العام - ألم تقم بأعمال رئيس المنطقة فكيف
لا تعرف متى شكل هذا النظام ؟
الشاهد - معرفش

وكيل النائب العام - اشمعنى اختاروك رئيس منطقة وليه ؟

الشاهد - شبه توحيد فى العمل لانى كنت ماسك أعمالها

وكيل النائب العام - ماعمل محمود الحواتكى فى المنطقة ؟

الشاهد - قائد فصيلة

وكيل النائب العام - وهل قائد الفصيلة مستقل عن رئيس

المنطقة ؟

الشاهد - أيوه

وكيل النائب العام - الحواتكى وصلاح توفيق قالوا انك

شكلت الفصيلة مع الحواتكى وبعدين توليت رئاستها

الشاهد - لا أبدا الحواتكى هو المسئول واللى كان رئيس وانا

كنت رئيس مؤقت الى ان ينتهى من مسألة التعيين

وكيل النائب العام - كان فيه منشورات تيجى لكم ؟

الشاهد - لا

وكيل النائب العام - اخوانك توفيق ثابت وصلاح أبو الخير

قالوا انه جالك منشورات

الشاهد - لا

الرئيس - المفهوم ان رؤساء الشعب يكونوا اعضاء فى الفصائل

الشاهد - يصح بس انا ماعنديش خبر مؤكد .

الرئيس - اما ان يكون فيه تناسق او ان لا يكون هناك تناسق

الشاهد - يصح

الرئيس - يصح او مايصحش ؟

الشاهد - انا اتكلم بالنسبة لما هو حاصل فى الجيزة لان ده

اللى اعرفه

الرئيس - الدليل ان رئيس الشعبة لازم يكون عضو في المجموعة انك انت كنت عضو في المجموعة .

الشاهد - دا كان مؤقت

الرئيس - لماذا لم يختاروا غيرك ؟

الشاهد - الاخ يوسف هارون قال لى اذا اعتقلت فقم باعمالى فى الشعبة وهو كان مسئول ولما اعتقل انا عملت رئيس الشعبة . ودى كانت حاجة مؤقتة مدة الاعتقال .

الرئيس - ولماذا لم يختاروا شخصا اخر بدلا منك ؟

الشاهد - هم بلغونى بان اقوم مقام الرئيس مدة الاعتقال

الرئيس - مين قال لك ؟

الشاهد - يوسف هارون

الرئيس - ايه يوسف هارون ده ؟

الشاهد - المسئول عن الشعبة

الرئيس - هل كان عضو فى النظام ؟

الشاهد - معنديش معلومات

وكيل النائب العام - قلت انك لما ذكرت للحواتكى مابلغه اليك خليل من التعليمات الخاصة بخطة الاغتيالات . الحواتكى ذهب ثم رجع وقال انه اتصل باخ مسئول واكد له ان الخبرده غير صحيح فمن هو الاخ المسئول او من هم المسئولين الذين اتصل بهم الحواتكى ؟

الشاهد - ماعرفش وقبل ماامسك بدله كان هو الذى يتصل بهم

وكيل النائب العام - المفروض انك تعرف من هو رئيس النظام السرى فمن تعتقد انه اتصل بهم ؟

الشاهد - محمود الحواتكى هو المسئول عن هذا النظام .

وكيل النائب العام - زى مين المسئولين دول ؟

الشاهد - المسئولين في المركز العام

الشاهد - طبعاً احد اعضاء مكتب الارشاد

وكيل النائب العام - ليس من المفروض أنه يتناقش معه

الشاهد - ودى كانت حاجة سريعة وهو نزل علشان يتأكد

بسرعة .

وكيل النائب العام - تعرف ابراهيم الطيب رئيس الجهاز في

القاهرة .

الشاهد - ماعرفش ..

وكيل النائب العام - محمود الحواتكى قال لك كده ؟

الشاهد - لا ..

وكيل النائب العام - قلت ان محمود الحواتكى قال لك ان

ابراهيم الطيب هو احد اعضاء الجهاز السرى المسئولين ..

الشاهد - قلت انه قال لى ان ابراهيم ده هو المسئول عن

النظام .

وكيل النائب العام - كان المفروض انك تقول للحواتكى روح

اسال ابراهيم الطيب

الرئيس - وابراهيم الطيب كان رئيس الاجتماع ؟

الشاهد - ايوه

الرئيس - على الاقل كان مفهوم انه رئيس رؤساء المناطق ..

كان ضابط اتصال ..

الشاهد - ماعرفش ..

الرئيس - يعنى هو ضابط اتصال والا رئيس ؟

الشاهد - هو كان رئيس الاجتماع ..

الرئيس - هل يراس اجتماع رؤساء المناطق ؟

الشاهد - طبعى يراسه ..

الرئيس - يعنى على الاقل ابراهيم الطيب فهمولك على انه

رئيس ؟

الشاهد - فهمت انه رأس الاجتماع
الرئيس - ابراهيم الطيب شغلته ايه في جماعة الاخوان
المسلمين ؟

الشاهد - ما كنتش اعرف

الرئيس - الشعبة والفصيلة تتبع مين ؟

الشاهد - تتبع المركز العام طبعا .

الرئيس - مين رئيس المركز العام ؟

الشاهد - مكتب الارشاد والمرشد .

الرئيس - ومين المسئول عن ادارة هذا الجهاز ؟

الشاهد - ما عرفشى ..

الرئيس - ماتعرفشى مين المسئول عن ادارة هذا الجهاز ؟

الشاهد - النظام العام او النظام الخاص ؟

الرئيس - لا .. البلد ؟ .. مين المسئول عن الجهاز ؟

الشاهد - مكتب الارشاد والمرشد

الرئيس - مين المسئول عن ادارة هذا الجهاز .. مين الرياسة ؟

الشاهد - ما عنديش معلومات ..

الرئيس - ماتعرفش رياسة الاخوان مين ؟

الشاهد - مكتب الارشاد والمرشد .

الرئيس - مالك عمال تلف وتدور ..

الشاهد - لا والله ..

الرئيس - حلق اوى يعنى ؟

الشاهد - لاحلق ولا حاجة ..

الرئيس - طيب ماتقول .. مين رؤساء الاخوان ؟

الشاهد - مكتب الارشاد والمرشد .. ده اللي اعرفه .

الرئيس - لما تيجى لكم اوامر تصدر منين ؟

الشاهد - باسم المركز العام .

الرئيس - ايه المركز العام ده .. مين الرياسة بتاعته ؟

الشاهد - مكتب الارشاد والمرشد العام .

الرئيس - لما تيجى اوامر تيجى باسم مين ؟ ..

الشاهد - ...

الرئيس - هي الاوامر اللى تيجى لكم يصح ما يكونش

المرشد العام صدق عليها ؟

الشاهد - ساعات تيجى الاوامر شففيه .

الرئيس - يعنى تيجى من غير مايصدق عليها المرشد ؟

الشاهد - ما قدرش اجزم .

الرئيس - يعنى شاكك ؟

الشاهد - ايوه .

الرئيس - يعنى الاوامر الشففيه يحتمل ان تكون من عند

المرشد او من غيره ؟

الشاهد - ايوه ..

الرئيس - وتقطعها ليه ؟

الشاهد - ما قلت لحضرتك اتنا قفلنا المنطقة .

الرئيس - من الذى اعطاك الامر بانشاء جهاز سرى ؟

الشاهد - ما اعرفش .

الرئيس - لماذا انضميت كأحد اعضاء الجماعة .. جماعة

الاخوان انشأوا جهاز سرى مالکش صوت علشان تقول ايه

النظام السرى ده ؟

الشاهد - طبعى سألت ..

الرئيس - بأمر مين انشئ الجهاز ده ؟

الشاهد - ما اعرفش .

الرئيس - انت عضو فى الجماعة والجماعة صدر لها امر ..

.. هذا الامر كان كتابي والا شفهي ايه شكل هذا الامر ؟

الشاهد - طبعاً شفهي ..

الرئيس - الاوامر الشفهية بتقول انت لازم تتحقق منها ..
هل تحققت من أمر انشاء الجهاز السري او النظام السري انه
امر شفهي صادر من المرشد ؟

الشاهد - لم اتحقق .

الرئيس - لماذا انضمت الى هذا الجهاز ؟

الشاهد - على اعتبار انه بيقوم ببرنامج ..

الرئيس - مخالفا في ذلك النظام بتاع الجماعة .. مش كده ؟

الشاهد - يصح ..

الرئيس - ... ما تقولش يصح .. قل : آه او لا ..

يصح .. ده ايه ؟

الشاهد - ..

الرئيس - ايه حكاية المنشورات ؟

الشاهد - ما اعرفش حاجة .

الرئيس - ماقرأتش منشورات طول وجودك في جماعة

الاخوان المسلمين ؟

الشاهد - ايوه .

الرئيس - كذاب .. اختار عشرة من الافندية المحترمين

الموجودين في الجلسة واسألهم تجددهم يقولوا لك انهم قرأوا
هذه المنشورات .

الشاهد - عملي في المدرسة لم يكن يسمح لي

بقراءة المنشورات .

الرئيس - انت كنت مسئول عن المنطقة ؟

الشاهد - كنت باسمع عنها ..

الرئيس - ألم تعط لك منشورات لتوزيعها ؟
الشاهد - والله ما حصل وأنا مسئول عن هذا القسم .
الرئيس - انت مسئول عن كل شيء .. مسئول عن الفصيلة
ومسئول عن الجماعة ومسئول عن السرية ومسئول عن الانضمام
من غير ماتعرف ومسئول عن مخالفتك الاخوان المسلمين
ومسئول عن الكذب بتاعك .. مدرس وكذاب ومنافق ...
مدرس بتدرس لاولاد صغيرين واطفال تعلمهم من نشأتهم
الكذب والنفاق باسم الاسلام .

وكيل النائب العام - كلمة واحدة أخيرة .. لما بلغت اليك
الخطبة أو التعاون مع خليل ؛ انت قلت انك ما اتصلت بش برؤساء
المناطق في حين ان ماهو ثابت في التحقيق انك ابلغته قبيل ارتكاب
الحادث بان يستوثق من افراد جماعته وان يكونوا مستعدين .
الشاهد - لم يحدث هذا .

الرئيس - نص الاخوان المسلمين على الاقل الى وقفوا امامنا
الآن كذابين .. على الاقل فيه نص صادق ونص كذاب .. يعنى
على الاقل فيه ٥٠ ٪ منكم كذابين و ٥٠ ٪ صادقين دى نسبة
الدعوة الاسلامية ونشرها بين طبقة مخصوصة .. يعنى نشر
الدعوة بتقوم بها جماعة نصفها كذابين ..

الدفاع - ما هى الدراسات التى كنتم تباشرونها في
النظام الخاص ؟

الشاهد - دراسات اسلامية صرفة .

الدفاع - هل من ضمن هذه الدراسات دراسة
القانون الجنائي ؟

الشاهد - لا يا فندم .

الدفاع - ثبت في قضية معروفة اسمها قضية (السيارة

الجيب) ان النظام الخاص بيدرّس بعض الاسس القانونية
واهمها كيفية الدفاع عن النفس .

الشاهد - ما حصلش وما أدوناش حاجة من دى .

الدفاع - هل من ضمن هذه الدراسات ان الكذب حلال
امام المحقق ؟

الشاهد - لا يا فندم .. ما درسناش حاجة زى كده .

الدفاع - فيه وثائق ضبطت فى سيارة ومن بينها هذه التعليمات

الشاهد - ما حصلش ..

الدفاع - من المصلحة ان تقرر هذا اذا كان الامر صحيحا .

الشاهد - لم ندرس هذا .

الدفاع - انت قررت بانه بلغتكم خطة حاصلها الاعتداء على

بعض حضرات الضباط ومنهم الرئيس جمال عبد الناصر فمن

هم الذين كانوا سيقومون بتنفيذ هذه الخطة ؟

الشاهد - ما بلغنيش حاجة .

الدفاع - ألم تفكر ؟

الشاهد - ما كانش فيه وقت للتفكير .

الدفاع - هل لدى جمعية الاخوان المسلمين جهاز سرى

خاص بالتنفيذ غير الجهاز اللى انت فيه ؟

الشاهد - لا أعرف .

الدفاع - هل الاعتصام بالسلبية فى التحقيق من ضمن

التعاليم اللى كنتم بتلقونها ؟

الشاهد - لا

الدفاع - ثابت ده فى القضية التى اشرت اليها .. الاعتصام

بالسلبية والاجابة : لا أعرف ما اعرفش ..

الدفاع - ماهو مرتبك الذى تتقاضاه من الدولة ؟

الشاهد - ١٩ جنيه ..

الدفاع - بخلاف العلاوات ؟

الرئيس - موجهها كلامه للشاهد - الى الخلف در
(وهنا ادار الشاهد وجهه ناحية النظارة وظهره الى هيئة المحكمة)

الرئيس - موجهها كلامه لجمهور المتفرجين - مدرس يياخذ
١٩ جنيه ويبيعهم اولاد حضراتكم والاطفال بتوع حضراتكم اللي
بتجبهوهم وبتودوهم المدارس ..

ثم قال السيد الرئيس للشاهد : الى الخلف در ، فعاد
كما كان (ضحك) -

الدفاع - دى مأساة .. مايمكنش تضحك .. بعد ان
عرفت الخطة اللي حينفذوها الاخوان المسلمين ، هل استمر
اعتقادك بان هذا الجهاز معمول للنط والقفز ؟
الشاهد - لا طبعى .

الدفاع - اذن اعتقدت ان هذا الجهاز للقتل والتدمير . ؟
الشاهد - ايوه

الرئيس - الخطة اللي وصلتك على اعتبار انها خطة . . .
جاية من رئاسة الاخوان ... اى رئاسة دى ؟


الشاهد - ما اعرفشى .. انا كنت رئيس منطقة مؤقت .
الرئيس - كعضو .. بلاش رئيس .. كعضو لما يجيلك
اى امر او اى بلاغ عن نية موجودة فى جماعة الاخوان بخطة
موضوعة .. مين اللي يضع هذه الخطة ؟


الشاهد - المسئولين .

الرئيس - مين هم المسئولين ؟

الشاهد - كثير .. المركز العام مسئول ..

- الرئيس - الحيطان يعنى ؟ .. مين .. ماتقول ؟
الشاهد - أعضاء مكتب الارشاد .
- الرئيس - مين .. أمثال مين .. قل الاسماء كلها ..
الشاهد - أعضاء مكتب الارشاد والمرشد العام .
- الرئيس - قل أسماؤهم .
- الشاهد - الدكتور خميس حميده . عبد المعز عبدالستار .
حامد أبو النصر . محمد فرغلى . كمال خليفة . كمال الدين
حسين (ضحك) .. عاوز أقول حسين كمال الدين . البهى
الخولى . منير الدله . دول اللى متذكرهم .
- الرئيس - تذكر واحد اسمه حسن الهضيبي ؟
الشاهد - ده المرشد العام ..
- الرئيس - يعنى ده مشى من الرؤساء ؟
الشاهد - أنا كنت باذكر أعضاء مكتب الارشاد ..
- الرئيس - أنا ماقلتلكش اذكر أعضاء مكتب الارشاد ، أنا
قلت لك تذكر أسماء الرؤساء ..
- الشاهد - وحسن الهضيبي .
- الرئيس - الدين الاسلامى بيعلم الرماية والسباحة وركوب
الخيال والا بيعلم النط ؟
- الشاهد - الرماية والسباحة ..
- الرئيس - ليه ماتعلمتوش ده ؟
- الشاهد - ماعلموناش .
- الرئيس - مافكرتش ان الدعوة دى تبقى ماشية غلط ؟
الشاهد - الواحد بيعلم اللى فى طاقته .
- الرئيس - انت قررت الان ان الجهاز ده معمول للتقيل
يعنى تنط فى كرش اللى عاوز تقتله ؟ .. (ضحك) مع السلامة
(وعلى اثر ذلك انصرف الشاهد)





DATE DUE

LIBRARY



AUB LIBRARY

962.053:M214mA:v.1:c.1

محكمة الشعب: المضبطة الرسمية لمح
AMERICAN UNIVERSITY OF BEIRUT LIBRARIES



01060411

962.053
M214 mA
V.1

